

mm

441

N

**KITAB**  
**BOENGONG SITOENGKŌJ**

GEUKARANG NGON GEUHIMPŌN LÉ

**L. B. TEUNGKOE MOHAMAD NOERDIN**



BIBLIOTHEEK KITLV



0096 9855

**ANTIQUARIAAT BATAVIA**

Dorpsstraat 171


NL-2992 AA Barendrecht

The Netherlands

# KITAB BOENGONG SITOENGKŌJ

GEUKARANG NGON GEUHIMPON LÉ

L. B. TEUNGKOE MOHAMAD NOERDIN







## MOEKADIMAH

Dalam kitab njoë teuseuboet padoem-padoem boh haba ngon kisah bahasa Atjèh djameun dilèe (haba djameun).

Oebé njang ka tō' thèe kamoë, gohlom na njang peuteubiet geukarang haba-haba njoë njang djigala' lé oereueng le; niba' sabab njankeu gèt haba njoë geupeugèt keu saboh boekoe batjan keu 'oemoem ma'noesia.

Sabab njang djeuet geupeuteubiet kitab haba djameun njoë, di ateuh neulakèe ngon meukeusoet niba' pseudoeka toean Verheul, dilèe gobnjan djeuet keu Kanteulè di Lhō' Soekōn Atjèh, djimeusabab ngon toelōngan niba' pseudoeka toean R. A. Prof. Dr. Hoesein Djajadiningrat geukarang ngon geuhimpōn lé L. B. Teung-koe Mohamad Noerdin Kantō Adviseur voor Inlandsche Zaken, djeunoë ka djeuet peugawoë di Kantō Balai Poestaka di Weltevreden. Niba' haj geupeuteubiet kitab haba njoë, djeuet takheun le that teurimong gaséh keu Siripeudoeka toean Beusa Atjèh njang gala' bri beulandja geupeugèt kitab njoë.

---



## I. HABA ANEU'MIET BIE' OEREUENG LE 'AKAJ

Jōh saboh masa dilèe djameun, na sidroë aneu' miet agam njang le that 'akaj; lheuēh njan meuseuhoe nan aneu' agam njan, hingga meugah trōih djeueb-djeueb teumpat, geupoedjoë nan aneu' miet njan, bandoem oebé silingka nanggroë njan doem geuthèe na.

Teuma ho makén tréb, ho meugah lé, hingga trōih keudéh ba' radja nanggroë; lheuēh niba' njan, ba' si'oeroë radja joe meuhej aneu'miet njan geukeumeung tji tanjong 'akaj, geujoe dja' meuhej oeba' sidroë meuntroë; lheuēh sabda niba' radja, landja lé djidja' meuhej aneu'miet njan lé meuntroë radja njan; hana padoem tréb teuneuréb djidja', teuma djiriwang meuntroë njan, landja djiba aneu'miet njan oe meuligöë radja.

Ban saré trōih oeba' radja, di aneu'miet njanpi landja djidja' seumah Kali Radja nanggroë njan; doedoë niba' njan, radjapi neumarit ngon aneu'miet njan: „Di oelön na koeleungo haba njang sahèh niba' meuntroë; djipeugah na lam nanggroë oelön njoë sidroë aneu'miet bie' oereueng le 'akaj, teutapi hana that koepatéh; sabab keureuna ka meugah ngon meuseuhoe doem oeba' gob, geukheun: „Kah oereueng le 'akaj", njankeu djeuet kah koemeuhej keunoë. Djakalèe njo bit kah oereueng le 'akaj, lagèe ban gob peugah ngon djipeuhaba lé oereueng nanggroë, djikheun: „Djeuet kah bri djaweueb, peue njang koetanjong oeba' kah", djeunoë ba' kapeugah!"

Lheuēh neukheun meunan lé radja, teuma di radja njanpi neuteumanjong oeba' aneu' njan, kheun radja: „Djeunoë ba' kapeugah lé kah haj Nja'! Ie njang na di la'öt padoemna le? Padoemna le seunoekat ngon hingga?"

Teuma djaweueb aneu'miet njan: „Ampön dèelat Toeankoe Tjahi 'Alam dèelat, boet tameung thèe neule ie di la'öt, njan bandoem boet moedah, oeba' laman hana pajah; teutapi njang paté' namasipada lakèe oeba' Toeankoe Tjahi 'Alam, bahlé djeunoë

lé deungon sigra Toeankoe Ampōn joe lhob doemna ie kroeng ilé oeba' doemna ra'jat lam dōnja; soepaja doemna ie njang kana dalam la'ōt, bè' na meutamah-tamah; meungnjo sabé meutamah-tamah, pakri é' djeuet tasoekat ngon tapeuhingga? Wa'tèe ka leungka doempat Toeankoe theun ie kroeng ilé, deungon sikeudjab lé djeuet namasipada peuteuntèe ngon reudjang, seureuta reudjang lé djeuet meu'oh ngon meudoem neule doemna ie la'ōt njan, oeba' Tjahi 'Alam".

Ban radja leungo meunan seumah, teuma radja njanpi ka rab keumeung teukhém. Lom la'én niba' njan teumanjong radja neumeusabda oeba' aneu' njan: „Djeunoë kapeugah lé kah haj Nja'! Bintang njang na di langèt, padoemna neule? Djeunoë ba reudjang lé kapeuhingga!"

Teuma seu'ōt aneu'miet njan: „Ampōn Toeankoe Meukoeta 'Alam! namietneu njoë meuhon karōnja oeba' Dèelat Toeankoe, si'ōn keureutaih njang leubèh raja niba' lam doem".

Ban radja leungo meunan seumah, teuma Radja joe Peudahna Meuntroë: „Dja' tjo' si'ōn keureutaih njang raja silagoëna!" Doedoë niba' njan, trōih djimè keureutaih oeba' radja lé Teungkoe Peudahna Meutroë, landa radja peudjō' oeba' djaroë aneu'miet njan; di aneu'miet njanpi djisambōt keureutaih njan niba' djaroë radja deungon hōreumat ta'além.

Doedoë niba' njan djiisoet saboh djarōm njang na djiisoedéh niba' djaroë badjèe droëdji, teuma landja djitob-tob ban saboh keureutaih raja njan, tjoet ngon raja peunoh bandoem han sapat bla; lheueh njan barō djipeuseumah seureuta ngon djipeudjō' oeba' djaroë radja, sadjan ngon djibeu'oeet djaroë, djimarit ngon radja: „Djakalèe dèelat Toeankoe bileueng, oebé na tité' njang na dalam keureutaih njoë, djimeusabé-keu le ngon bintang njang na di langèt dōnja, hana leubèh hana koereueng".

Lheueh djipeuseumah meunan lé aneu'miet njan, jōh njankeu radja teukhém ngon teusinjom; bitpi meunan, hana neukheun sapeue lé, malingkan neupiké keu tjeureudé' ngon bidja'sana 'akaj aneu'miet njan: „Salang djih mantong tjoet, sidoemnoë tjeureudé'; adat 'oh raje' siribèe kali ganda meutamah bidja'".

Lheueh niba' njan, teuma radja salén aneu' njan, neubri peukajan njang djroh roepa, seureuta neukarōnja ngon deureuham,

doea lhèe plōh neu' keu blandja. Hana padoem lawét doedoë  
lheueng, neutjo' aneu' njan lé radja, neupeudoeë' dalam Koeta  
Meuligoë sadjan-sadjan droëgeu; 'oh rajeu' batjoet, radja bōh  
aneu' njan, neupeudjeuet keu Peudahna Meuntroë radja.

---

## II. HABA WA'SIET RADJA OEBA' ANEU'NEU PEUET DROË BANGTA

Na sidroë Radja raja, ba' djameun dilèe saboh masa neukheura-djeuen ba' saboh nanggroë, le aneu'neu di radja njan, padoem-padoem droë aneu' agam ngon aneu' inong, aneu'neu njang agam tjit peuet droë sagaj, njang la'én niba' njan, bandoem bie' oereueng inong; le that aneu' ngon tjoetjoneu doem toeha ngon moeda.

Ba' si'oeroë di radja njan teuka sakét keumeung tō' hat teuka adjaj. Jōh njan lé radja meuhej aneu' agamneu njang oelèe bara, teuma trōih lé djiteuka keunan, lheueh djiseumah ngon djitjōm djarōë, landja lé djidoee'.

Sabda radja oe'ba' aneu'neu: „Haj aneu' meutoeah! Djeunoë lōn bri wa'siet ba' gata saboh soerat; ban njang na meuseuboet dalam soerat njoë, sikali-kali bè' ta'oebah! Ada' teukeudi ka tō' djandji Pōteu Alah oelōn maté teuka adjaj, lōn ba' tatanom lam rimba raja, hana rila lōn niba' teumpat njang la'én”.

Teuma seu'ōt aneu' radja njan: „Ēntja'Alah Toeankoe Ampōn! ban njang amanat niba' Doeli Sroëpada, tan na meu'oebah”. Lheueh djiteurimong soerat wa'siet ajahdji njan lé Bangta njang oelèe bara, ladjoe djitjōm djarōë ajahdji, djibeudoih djiwoë ladjoe oe roemoh droëdji.

Lom teuma seuningoh niba' oeroë njan, landja lé Radja joe meuhej aneu' agamneu njang keudoea. Ban saré trōih aneu'neu njan keunan ba' ajah droëdji njan, 'oh djikalon ajahdji hana mangat asoë, seureuta ngon djimoë teubiet ie matadji; jōh njan lé djitanjong: „Peuë njang sakét njang ajah rasa? neupeugah ba' laman sipada, pakon ajah moeroh aneu'nda keunoë? Peue na sabda ngon rahsia?”

Teuma seu'ōt radja seureuta ngon neumeusabda: „Njang lōn panggé gata keunoë hé boh até keureuna lōn keumeung peugah saboh wa'siet ngon amanat; djeunoë lōn bri saboh soerat keu gata,

oebé haba wa'siet dalam soerat njoë, aneu', bè' sagaj ta'oebah, njoë leupeue soerat; ada' teukeudi ka tō' adjaj djandji Alah, maté lōn, bè' han tatanom lōn, koeboe lōn meuhah dalam Blang-raja".

Jōh njan teuma seu'ōt aneu' radja: „Njang njan ho djidja' di ajah! kon nakeu kamoë njang kira! oebé njang amanat ajah, tan sagaj oelōntoean peuriba! Njang djeunoë neukira di ajah! Neulakèe ba' Alah, ba' reudjang neubri poeléh, phoej badan mangat asoë." Lheueh djikheun njan oeba' ajahdji, djitjo' soerat wa'siet njan, trōh lam kipè, djiseumah ajahdji ladjoe djigisa woë oeba' roemoh droëdji; peue njang ka geuwa'siet ngon geupeu'amanat lé ajahdji, tan na sagaj djipeugah sapat; maséng-maséng séb meung lam proet droëdji mantong, tan sagaj djipeulahé ba' barangsoë.

'Oh ka lheueh riwang aneu'neu njan, teuma lomp meunan tjit, seuningoh niba' oeroë njan, radja joe meuhej aneu' agamneu njang keulhèe, adoë niba' njang ka riwang boenoë. Ban saré trōih oeba' Ajahdji radja, lheueh djidèelat ngon djiseumah, teuma sabda radja oeba' aneu'neu: „Njang djeuet lōn meuhej gata keunoë haj boh até, lōn keumeung peugah amanat oeba' gata aneu', seureuta lōn peudjaroë ba' gata saboh soerat wa'siet; oebé njang ka lōn seuboet dalam soerat njoë, bè' na sagaj meu'oebah ban njang lōn wa'siet njoë oeba' gata; ada' teukeudi Alah bri habéh 'oemoe lōn, bè' han tatanom lōn lé gata, ba' tapeugèt djeurat koeboe lōn, sinan tatanom dalam Banda-raja; njoë soerat wa'siet lōn bri lam djaroë gata."

Teuma seu'ōt aneu'neu njan, djikheun: „Hanpeue salah, sabda Dèelat njang ajahnda, tjit laman sipada peudoe' ateueh djeumala, ban njang sabda tan na meutoeka, deungon beureukat apoeah ajah tan na meuriba". Lheueh djisambōt soerat njan, landja djidèelat, tjōm di djaroë seumah ba' gaki lakèe idin meuhon woë oe roemoh tangga droëdji.

'Oh ban lheueh riwang aneu' agamneu njang keulhèe njan, saré ban beungoh oeroë njang keupeuet njan, lom sabda radja njan, neujoee ba sabda oeba' aneu' agamneu Bangta njang toelōt. Ba' masa njan radja sakétpi makén leubèh meutamah lajèe ngon poetjat ie moeka. Ba' oeroë njan hana é' neutrōn lé oe Balé Rōm, radja neudoe' dalam atana ateueh keuta rab ngon teumpat peuradoean. Ban saré tō' aneu' agamneu njang toelōt njan, lheueh djidèelat ngon djiseumah, sabda radja: „Tadoee' haj aneu'



meutoeah! Njang djeuet lôn joe toeeng gata keunoë, lôn meung peudjaroë ba' gata saboh soerat wa'siet, seureuta ngon lôn keumeung peugah doemna amanat, lôn harab bè' na meutoeka ba' oeroë doedoë. 'Oh ka tan lôn, haj aneu', gata ngon tjèedarateu doemna, bè' moepaké ngon bè' meuda'wa, doempeue boet ba' moepakat, ba' na tameutjèewarat ngon meuntroë 'oelama. Lôn njoë njeum ka rab keumeung tō' hat tinggaj dōnja peukeue akhirat, njoë na saboh soerat lôn peudjō' ba' djarōë gata, wa'siet amanat lam soerat njoë, bè' na meu'oebah ngon meuriba. Ada' maté lôn, koeboe makam di lôn dalam Meuseugit-raja; sinan ba' tatanom lôn, ba' tajoe beuet oeroë malam bè' na reuda hingga tō' an siribèe oeroë, bè' na soenjoë talakèe doe'a keu lôn."

Lheuh neukheun njan, radja bri soerat wa'siet njan oeba' aneu'neu njan, teuma djiwoë lé leugat di aneu' radja njan oeba' teumpat droëdji; maséng-maséng ka na ngon soerat wa'siet ajah droëdji. Ban peuet wa'siet njan ka meutanda tangan ngon tjab radja, maséng-maséng djitrōh keudroëdji, hana moeboenjoë oeba' tjèedara njang na.

Doedoë niba' njan nakeu siboeleuen lheueng, di antara njan, teukeudi Allah Ta'ala, tō' hat djandji maté radja; tinggaj wa'sietneu ba' peuet droë aneu'. 'Oh ban saré poetōih hoeeh radja raja, trōn lé oereueng ngon 'oelama moeplōh ribèe, bandoem ngon doekatjita, geumoepakat geumeung tanom radja. 'Oh ka meuhimpōn doemna wadi meuntroë oelèebalang ngon 'oelama, beudoih lé aneu' radja, Bangta njang toeha, ladjoe djipeuleumah wa'siet ajahdji soerat niba' radja: „Wa'siet koeboegeu geujoe tanom droëgeu lam Rimba-raja". Ban geukalon meunan lé Teungkoe wadi, meuntroë ngon oelèebalang doemna 'oelama, djaweueb doemna 'oelama: „Wadjéb ta'ikōt ban njang wa'siet niba' Soelōthan, hareuem meu'oebah"!

Teuma nakeu si'at doedoë niba' njan, beudoih lé sigra Bangta njang keudoea, ladjoe di Bangta njanpi djipeuleumah soerat wa'siet niba' ajahdji radja raja njang ban maté njang geujoe tanom droëgeu koeboe makam lam Blang-raja. Ban lami geu'eu soerat, meunan wa'siet niba' radja, bandoem 'oelama ngon wadi meuntroë oelèebalang ka djeuet keu gameum, gadoh 'akaj bitjara. Ba' masa njankeu reujōh soebra oereueng 'a'oe ban saboh nanggroë, trōn lé keunan Bangta keulhèe, lom di djih njanpi djipeuleumah soerat



wa'siet ajahdji radja, geujoe tanom droëgeu dalam Banda-raja, sinankeu koeboe ngon makam. 'Oh geukalon soerat wa'siet njan, lom makén leubèh meutamah soesah niba' njang ka.

Doedoë niba' njan, teuma lom djibeudoih Bangta njang keupeuet, di djih njanpi djipeuleumah soerat wa'siet ajahdji radja, djikheun: „Lôn lakée tanom gobnjan, ban njang wa'siet droëgeu dalam Meuseugit-raja". 'Oh geukalon meunan ban peuet boh soerat wa'siet njan, ba' masa njankeu makén that lagoon goendah Bangta peuet droë, seureuta meuntroë 'oelama ngon doemna oelëebalang peutoea ra'jat; djikheun: „Wadjéb geupoeboeet bè' oebah niba' wa'siet droëneu keudroë ban njang ka geupoewa'siet dalam soerat Bangta peuet droë, ba' meunankeu djeunoë tapeulakoe!" Ba' masa njankeu doemna 'oelama ka gadoh 'akaj, habéh djimita djeueb-djeueb Kitab Pikhah ngon djeueb-djeueb Kitab Tarèh radja-radja; bandoem hana meuteumeung masa'alah njang meunan ban.

Ba' oeroë njan, teutabkeu hana djeuet geutanom radja raja njan. 'Oh banlami soebob seuningoh niba' oeroë njan, meung beungèh treu' Bangta peuet droë, djikheun: „Meung hana reudjang tatanom Ajah oelôn meusén ban njang ka geupoewa'siet dalam soerat peuet njoë, bandoem gata njang bie' 'oelama koepoh maté koeba-lôt ngon boelèe djo', bandoem koejoe töt ngon apoej hoe."

'Oh geuleungo meunan narit aneu' radja Bangta peuet droë njan, bandoem 'oelama ka habéh gabra. Di dalam nanggroë njan, na lom sidroë treu' 'oelama raja njang that malém silagoon. Ban saré tröih 'oelama njan keunan, kheun 'oelama njan: „Bè'lé neupoe-meureuka doemna 'oelama njang la'én. Keu boeet masa'alah tanom Radja meusén ban wa'siet njoë, oelöntoeanteu njang peuna, tjarat ba' neubri tanggö, oelöntoeanteu khaloeet oemoe toedjöh oeroë. Meung han é' na masa'alah njan, oelöntoean bahlé neutöt dalam apoej hoe, oelôn rila maté sadjan radja raja njoë!" — Jöh njan Bangta peuet bri tanggö, keu Teungkoe njan.

'Oh tö' ba' oeroë njang keunam, jöh njan lé lom kha Bangta peuet droë, makén beungèh that, sabab djikalon masa'alah njan, hana' é' lom moeproë; manjèt radja ka rab brö'; ada' meungkon na djiböh euntjien-kaphö ngon oebah, meuhah ka hantjöh beureutöh. Pakat Bangta peuet droë ngon oelëebalang wadi meuntroë, singoh oeroë geumeung töt Teungkoe 'oelama njan. Kheun Bangta peuet: „Meung djiko 'oelama sipaléh njan; ka lapan oeroë manjèt Ajah-

koe radja, gohlom teupoebarōh; meung njan han é' djibitjara, peue goena djih djeuet keu 'oelama?"

Ba' oeroë njang keunam njan, trôn lé keunan sidroë moerid 'oelama njan, sidroë oereueng moeda bahlia, that tjeureudé' niba' njang na; trôn njan djidja' kalon Teungkoedji: „Pakri ban? peue na geuteumée masa'alah boeet tanom radja, bè' na meu'oebah niba' wa'siet droëneu dalam peuet soerat wa'siet?" 'Oh ban saré meuteumée ngon Teungkoedji njan, landja lé moea meutjôm, bandoea droë geumoemoëmoë; kheun Teungkoe 'oelama ba' aneu'-moerid droëneu njan: „Lôn haj aneu'! singoh oeroë meuhah maté moewoë ba' asaj moela, geupoh lé aneu' radja, sabab hanaé' meuteumée masa'alah ngon tanom radja, meusén ban njang lam soerat wa'siet peuet". Teuma seu'öt moeridneu njan: „Teungkoe! bè' that goendah; oelöntoean geunantoë teungkoe, bahlé oelöntoean singoh geutôt, meung bè' droëneu njang Teungkoe oelôn! Éntja Alah oelöntoean peuna masa'alah njan, singoh oeroë tatanom Radja!" Ban geuleungo meunan lé Teungkoe, teuma geumè moeda bahlia njan oeba' aneu' radja Bangta peuet droë.

Ban saré tō' ba' aneu' radja peuet, seumah 'oelama njan oeba' aneu' radja dikeue hadapan doemna Meuntroë Oelèebalang: „Oereueng moeda bahlia njoëkeu geunantoë oelöntoean, djih njoë aneu' moerid di oelôn, djih njoëkeu njang é' peuna masa'alah njoë, singoh oeroë djikheun djitanom radja." Jōhnjan lé seu'öt Bangta peuet, seureuta ngon djitanjong: „Bit njo meunan hé oereueng moeda?" Teuma seumah oereueng moeda njan: „Sabét meunan, Toeankoe Ampōn! Meung njo Toeankoe Ampōn keumeung tanom radja raja, meung hana radja, niba' adat pakri ban ngon tatanom? Meung njo neumeung joe tanom radja, ladém neubōh lōn dilèe keu Radja. Njan barō djeuet oelöntoean tanom radja".

Doedoë niba' njan moepakat Bangta peuet droë, seureuta ngon doemna oelèebalang, wadi ngon meuntroë; geubōh moeda bahlia njan keu geunantoë radja raja, soepaja djeuet geutanom radja njang maté. Jōh njan ba' oeroë njan lé geudèelat ngon geutabaj; njang phōn djihej ampōn lé Bangta peuet, doedoë niba' njan teuma meuntroë ngon wadi oelèebalang ra'jat.

Jōh njan teuma meusabda moeda bahlia njan: „Ka sabét ba' gata doemna oelôn djeunoë djeuet keu radja raja?" Teuma seumah sigala njang na, seu'öt sabda niba' Bangta peuet seureuta doemna:

„Toeankoe Ampōn! sabét droëneu radja niba' kamoë doemna!”

Lom trōn sabda ba' Radja Moeda Bahlia: „Meung ka sabét meunan, ba' tapeu'asé keu oelōn djeunoë lé sigra oereueng ngon- ngon parang, ba' na limong ribèe droë; lham ngon oereueng pi ba' na limong ribèe droë; tjangkōj ngon-ngon oereueng njan pi ba' asé limong ribèe droë, djeunoë lé sigra ban limong blaih ribèe; lom lōn lakèe oetōih ba' na limong ribèe droë.”

Ban geuleungo sabda meunan, geupeu'asé lé ban njang neula- kèe lé radja; 'oh ka leungkab sidoempue kana, jōh njan lé Radja Moeda Bahlia njan brangkat oe dalam rimba raja. 'Oh saré ka trōih dalam rimba raja, sabda Radja Moeda Bahlia oeba' doemna ra'jat, geutanjong oeba' doemna njang halé: „Peue djimeunan teupat njoë doem ba' doemna gata? Ba' tadjaweueb narit sabda oelōn!”

Seumah doemna ra'jat oelèebalang meuntroë seureuta ngon Bangta peuet: „Teupat njoë djimeunan rimba raja”. Lom meu- sabda radja: „Njo bit-bit njoë nandji oeteuen rimba raja.” Seu'ōt lé sigala njang na: „Njoëkeu njang djimeunan oeteuen rimba raja.” „Meung njo njoë nandji rimba raja, djeunoë tatjah ba' reudjang keu oelōn ban sineuna.”

Jōh njan lé djitjah rimba njan lé oereueng limong blaih ribèe droë, han djan doea djeuem djimoeboeet, ka habéh teureuban ban sineuna, ka peungeuih lé sapan-sapa. Lom teuma sabda radja oeba' sigala doemna: „Peue djimeunan teupat njoë djeunoë?” Seumah sigala doemna: „Teupat njoë djeunoë Toeankoe Ampōn njoë djimeunan blang raja”. Sabda radja: „Bit njo njoë djeunoë nandji blang raja?” Seu'ōt doemna oereueng: „Sabét Toeankoe Ampōn teupat njoë nandji blang raja.” Lom trōn sabda radja: „Meung njo njoë ka sabét ban takheun njan, djeunoë lé ba' ta- peugèt keu oelōn ba' padang blang raja njoë siribèe boh roemoh, la'én niba' njan lom keudè ngon peukan, bandoem ba' djroh ngon koekōh.”

Ban djileungo sabda meunan, jōh njan lé djipeudong roemoh, keudè ngon peukan doem moebandja oebé-bé raja bandoem sa- bé-sabé, doemna tanoh pat njang lhō' djipeusabé, bandoem djroh ka djipeurata. Jōh njan lé radja joe doemna sèedaga djimaniaga, djimeukat sidoempuee djinèh barang, kana bandoem di sinan, ra- mé silagoëna oereueng meukat ngon oereueng moebloë, doemna

oereueng nanggroë djitrôn keunan, agam inong ta'eu meusa'-sa'. Teuma doedoë niba' njan, lom sabda radja oebea' Bangta peuet, seureuta oebea' doemna meuntroë panglima ngon ra'jat, seureuta ngon oebea' doemna Teungkoe 'oelama: „Tapeugah lé gata njoë doemna, peue djimeunan teumpat njoë djeunoë?” Seumah lé sigala doemna: „Dèelat Ampôn! djimeunan teumpat njoë djeunoë, njoë geukheun nandji banda raja”. Lom sabda radja: „Bit-bit njo teumpat njoë nandji banda raja?” Seu'öt lé doemna tantra: „Sabét njo teumpat njoë Toeankoe Ampôn djimeunan banda raja”.

Lheueh njan lom sabda radja: „Meung ka sabét ba' doemna gata ban njang takheun njan, ba' tapeudong keu oelôn, djeunoë lé ba' sigra, saboh meuseugit raja teumpat oereueng seumajang Djeumeu'at ngon seumajang Peureulëe si'oeroë simalam limong wa'tèe.” Ban lami geuleungo sabda meunan, jöh njan lé geupeugèt di sinan saboh meuseugit raja, lom pi peuneugèt dji njan djroh silagoëna. 'Oh ban saré lheueh meuseugit njan, lom sabda radja: „Peue djimeunan djeunoë teumpat oereueng seumajang njoë?” Teuma seumah doemna: „Teumpat njoë djimeunan meuseugit raja.” Lom sabda radja: „Meung ka sabét ban takheun njan, djeunoë lé ba' tapeugèt keu oelôn saboh koebah njang raja, kandang koeboe teumpat koetanom manjèt radja raja njoë.”

Ban lami lheueh sabda niba' radja, jöh njan lé djipeugèt ngon sigra pantaih silagoëna; ba' oeroë njan lé leungka. Ban saré beuningoh, seuningoh niba' oeroë njan, ba' masa njankeu geu'ara' manjèt radja raja njan, geutanom ba' koeboe kandang dalam meuseugit raja. Djimeunan teumpat: „Rimba Padang Banda Meuseugit raja”.

Saré lheueh geutanom radja raja njan, di Radja Moeda Bahlia njan djima'djoej keudroëdji niba' kheuradjeuen radja. Teuma moepakat oereueng doemna, geuböh Bangta njang toeha lam doem keu radja raja lam nanggroë njan. Moeda bahlia njan geuböh keu Peudana Meuntroë Radja. Njankeu oereueng njang that tjeudaih ngon bidja'sana; djareueng na meunan dalam dônja, lom pi doemna 'èleumëe tadjam sibeuna, njang han é' poetöih ba' doemna 'oelama. 'Oh tö' ba' Moeda Bahlia njan, poetöihlé ngon sigra.

### III. HABA PA' PANDÉ NJANG NGEUT SILAGOËNA, BIT NGEUTDJI NJAN, SOESAH BA' TAPIKÉ DI ATEUEH DOEMPEUE BOEETDJI NJAN.

Na saboh haba, geupeunan haba njan Haba Pa' Pandé; djih njan lakoë-binoë, bandoea djih djidoeë' di sinan dalam gampông ba' roe-moh poeroemohdji. Ba' si'oeroë kheun poeroemoh oebea' lakoë droë-dji njan, nan Pa' Pandé: „Peue di droëneu é' neudoeë' sabé di roe-moh? Ada' neudja' oe kroeeng-kroeeng, kadang é' meuteumeung deut-deut boeta. Neudja'keu ba' reudjang, bè' djan djoela oeroë!”

Ban djileungo meunan lé Pa' Pandé kheun poeroemohdji njan, teuma beudoih Pa' Pandé, tjo' ngon gampét ikat ba' keu'ieng droë-dji, sandang boebèe, tidji' ngon ama'; landja djidja' ce kroeeng. 'Oh tō' oe kroeeng, peudoeë' boebèe ngon ama', ladjoe djitamba' djillob abeue' raja; lheueh leungka ka djillob, teuma djitamba' ateueeng beuleutong ba' theun boebèe; 'oh leungka seumamba' njan, landja lé djitheun boebèe 'oh gèt that djab djigeuntèn ngon tanoh kliet na oebé raja. Teuma ladjoe lé djipoephōn, djiseuet phōn beungohkon, djiseumeuseuet tō' 'an oebea' wa'tèe tjoet oeroë, barōkeu thō ie di abeue' raja njan.

Le lagoëna djiteumée eungkōt lé Pa' Pandé oebé-bé raja, deut, blaneub, oedeueng ngon meuhong oebé-bé sapaj, bieng geuteuem ngon bieng tjakaih le silagoëna, ta'eu doem meu'euj-meu'euj; la'-én njang di lam boebèepi le that djilōb eungkōt, 'oh peunoh saré arat, po' tō' oebea' djabdji. Jōh njankeu Pa' Pandé piléh bandoem eungkōt njan, habéh djitie' oe darat doem, oebé-bé na, seun-seun saboh djigeulawa lé oe darat; djikalon mata eungkōt njan bandoem, hana meung sabohpi djiteumée njang boeta.

Jōh njankeu Pa' Pandé beungèh ngon moepōt-pōt lagèe raja, djikheun: „Eungkōt paléh hana lagoë, na meung saboh njang boeta mata? Pajahkoe that ba' koeseumeuseuet; phōn beungohkon,



djeunoë ka tjot oeroë-oeroë! Djeunoë peukeu koepoewoë oe roemoh?" Lheueh djikheun njan, djsinthōng lé teuma eungkōt njang na lam boebèe; njang njanpi dji'eu lom, bandoem matadji hana njang boeta.

Beungèh Pa' Pandé, djitjo' boebèe, djigoelam ba' bahō, djitidji' ngon ama'; ladjoe djipeuteupat, djiwoë oe roemoh droëdji.

Di poeroemoh Pa' Pandé njan, tjit ka teuprèh-prèh ba' ampeuet reunjeun droëdji, djiprèh lakoëdji poewoë eungkōt. Ban saré tō' Pa' Pandé, djitanjong lé reudjang, kheun poeroemohdji: „Toh eungkōt njang neudja' mita, niphōn beungohkon 'oh teugeulintjé oeroë-oeroë barō neuwoë?"

Seu'ōt Pa' Pandé: „Hana koepoewoëdji, bandoem habéh koeboih bie' eungkōt paléh, hana njang boetapi meung saboh; njankeu sabab habéh koeboihdji bandoem; djéhpāt doem teutie'-tie' di binèh kroeng, tadjā' eukeudroëteu, meungnjo hana tapatéh. Ban djileungo meunan lé poeroemohdji njan, jōh njankeu beungèhdji raja keu Pa' Pandé, seureuta djikheun: Haj soela, ngeut paléh, teugoh koekheun: „Deut-deut boeta", pakri ba' meuhatkeu njang boeta mata mantong? Njan sagaj njang kamita, haj soela dèe!"

Doedoë niba' njan, teuma landja trōn poeroemohdji njan ngon teudab-dab; djitjo' gampét raja doea boh, ladjoe djidja' oe kroeng ba' teumpat abeue' Pa' Pandé seumeuseuet boenoë. Ban tō'dji keunan, dji'eu eungkōt doem meutaboe teutie'-tie' saboh saho. Jōh njan tahedji, 'oh teukab djaroë-djaroëdji. Lheueh njan landja djipiléh bandoem saboh-saboh; 'oh meusapat na saboh raga raja, doemnan le di eungkōt njan. Teuma ladjoe djiseu'ōn djipoewoë oe roemoh, tō' oe roemoh djipeusieng bandoem. Lheueh gléh ka soetji djsirah, djilawo' sira, djibōh ie asam aweueh ngon tjamplic; jōh njan lé djitagoeen, ladōm djireundang. 'Oh ka masa' bandoea peue, teuma barō djitagoeen boe na saboh kanèt raja.

Jōh njan teuma kheun inong njan ba' lakoëdji Pa' Pandé: „Hai neubeudoih, neudja' eu Teungkoe si'at, lōn meung kanoeri. Joe beuet boe keu aroeah meung sikaj breueh". Seu'ōt Pa' Pandé: „Di lōn hana koetori Teungkoe, njang toh doë Teungkoe? Pakriban roepa gobnjan?" Seu'ōt poeroemohdji njan: „Bit agam njoe meung Teungkoe hana djitoeri? Teungkoe njang meudjanggōt raja, njankeu gobnjan bè' hana neutori".

Ban djileungo meunan, trōn lé Pa' Pandé, batjoet-batjoet dja'

peuleuheuen-leuheuen, sabab hè'dji raja ban lheueh djiwoë ba' dja' seumeuseuet, meutamah lom teungoh djipiké, hana djitoeri Teungkoe. Jöh njankeu djidja' keudéh-keunoë, hana moeroempo' ngon Teungkoe, sabab Teungkoe hana lom djitoeri; njang dji'ambat-ambat, tjit meung ban kheun poeroemohdji: „Teungkoe bie' meudjanggöt raja, njankeu njang dji'ingat sabé sara djidja' njan.

Teuma ba' teungoh djidja'-dja' njan, leumah lé dji'eu saboh kamèng Randō', bie' meudjanggöt raja, teungoh loeéh òn kajèe ba' peunageue. Dalam até Pa' Pandé: „Njoëkeu Teungkoe, njang dji-joe dja' meuhej lé poeroemohkoe". Teuma kheun Pa' Pandé oe-ba' kamèng Randō' njan: „Haj Teungkoe, neumeulangkah si'at oe roemoh lõntoean; poeroemoh lõntoean keumeung kanoeri meung sikaj breueh". Teuma djimeusoe kamèng njan soedji: „Mbè'-mbè'". Seu'öt Pa' pandé: „Handjeuet bè', haj Teungkoe, ba' neumeulangkah djeunoë lé ba' sigra! Treu' beungèh poeroemoh oelõntoean djimoepèt-pèt keu oelõntoean". Bitpi djikheun meunan, di kamèng Randō' njan ban lakoe droëdji, meunan-meunan tjit sabé djimeusoe. Toenoe até Pa' Pandé, djidrob kamèng njan, djibōh taloë, la-djoe djihoeë poewoë oe roemoh, peutamong oe leuen droëdji. Ban lami tō' oe leuen, djitawō' poeroemohdji reudjang-reudjang: „Haj tratrōn reudjang! Njoë pat Teungkoe, ka lõn peutamong keu gata".

Ban djileungo meunan lé inong, trōn lé poeroemoh Pa' Pandé ngon teudab-dabdj. Djisangka bit ka tō' Teungkoe, djitanjong lé: „Pat Teungkoe, hoka gobnjan? Pakon han tajoe é'geu keunoë la-djoe?" Seu'öt Pa' Pandé: „Djéhpap Teungkoe, teungoh neudong ba' pageue, dang neupèt òn kajèe, hana leumah ta'eu?" Ban djileungo meunan, landja djitoelèh, dji'eu. Njang na leumah djikalon lé poeroemohdji njang na teudong ba' pageue tjit meung kamèng Randō' raja, teungoh rèt òn kajèe. Ban djikalon meunan, seureuta lé hoe beungèhdji ngon djimeuseurapa lagèe raja: „Haj soela, kon njan Teungkoe, njan kamèng Randō' raja. Keupeue kamè keunoë keu kèe, haj soela paléh?"

Teuma seu'öt Pa' Pandé, djikheun: „Meung kon njoë Teungkoe, njang toh tjit? Hom, di lõn hana koetoeri!" Seu'öt mong ngon beungèhdji raja: „Haj soela! Teungkoe njang ngoej peukajan poe-téh, moebadjèe hadji, njan ba' kamè keunoë! Keupeue kamè keu kèe bie' kamèng Randō' raja, haj soela ngeut?"

Teuma teubiet lom Pa' Pandé di gampōng, djidja' seutèt taloë

blang. Ba' djidja'-dja' njan, dji'eu lé leumah saboh kawan koe' poe-téh, meutaboe dalam blang. Dalam até Pa' Pandé: „Njoëkeu njang djikheun Teungkoe Hadji lé poeroemohkoe". Peutoë lé Pa' Pandé batjoet-batjoet, djimarit ngon hōreumat seu-reuta ngon djroh adab, djikheun oeba' koe' kawan: „Haj Teungkoe meutoeah, neumeulangkah droëneu bandoem oe roemoh oelōntoean; poeroemoh oelōntoean keumeung kanoeri batjoet". Ban djileungo lé koe' soe oereueng marit, teukeudjōt koe' njan; habéh doem djipo saboh saho seureuta djikli' koe', djimeusoe doem: „Kèb-kèb-kèb-kèb!" Seu'ōt Pa' Pandé: „Hana kèb, haj Teungkoe! Tjit ban barō masa' djitagoeen lé poeroemoh lōn, mantong seu'oeem-seu'oeem. Gèt neutamongkeu landja, pakon neudja' meuda'wa? Na mangat, bè' djiseurapa lōn treu' lé oereueng inong di roemah". Meunan-meunankeu sabé djimarit Pa' Pandé ngon koe' po.

Ho njang djipo koe' njan, sabé djiseutèt lé Pa' Pandé, djipeutjro' keudéh-keunoë, djitijeueb ban saboh blang. Jōh njankeu hè' Pa' Pandé, teubiet reu'ōhdji lam-lam mata, hana é' djiteumée drob koe' njanpi meung saboh. Di koe' njan, njang saboh njanpi ka tjré ngon kawandji, sabab sabé djipeutjro' djipeulho'-ho' ngon djipeuha'-ha' lé Pa' Pandé; njankeu aratdji that, hana djitoeho peu-lheueuh droëdji lé. Jōh njankeu djipo oe gampōng, djidong tjōng oe paneu' di leuen roemoh Pa' Pandé.

Teuma woë Pa' Pandé oe gampōng, tamong lam djoerōng reudjang-reudjang, landja oe gaki reunjeun, seureuta djitawō' poeroemohdji, djikheun: „Hoka gata heu, haj tatrōn reudjang keunoë! Njoë ho Teungkoe Hadji, ka geutamong". Jōh njan lé beudoih poeroemoh Pa' Pandé, trōn oe sramoë reunjeun, seureuta djileueng lé tika ngon teudab-dabdji. Leueh njan ladjoe djitrōn oe ampeuet reunjeun, seureuta ngon djitanjong ba' lakoëdji: „Pat Teungkoe? Pakon han tajoe é' ladjoe meulangkah keunoë oe sramoë? Tika-tika ka teuleueng". Seu'ōt Pa' Pandé: „Teungkoe Hadji djéhpāt mantong neudong di tjōng oe". Ban djileungo meunan lé inong njan, jōh njan lé djitangaih, seureuta djipeusingèt takoeedji, dalam atédji: „Pakon di Teungkoe njan neudja' dong oe tjōng oe? Peue salèh grahneu, neumeung djéb ie oe?" Joh njan lé leumah dji'eu saboh koe' poe-téh that boelèe, teudong di ateueh peu-leupeue' oe.

Ban djikalon meunan lé inong, seureuta lé ngon djimeuseurapa



lagèe raja: „Haj soela, keupeue kapeutoenjo' oeoba' kèe koe' dong keudroëdji ditjông oe? Peue dawō' kah? Kon njan Teungkoe, haj la! Teungkoe oereueng lagèe geutanjoë tjit, bie' ma'noesia, kon bie' hiweuen meureugasitoea". Di poeroemohdji njan sabé lam djimoe-pèt-pèt hana teudōh. Ban djileungo lé Pa' Pandé kheun poeroemohdji meunan, jōh njan tahedji keudroë, meuklèb-klèb matadji mantong, seureuta djikheun: „Hana koedja' toeri Teungkoe dikèe njoë bie' ngon hè'koe raja! Lom djidja' meuseurapa keu kèe, bit koe-thèe inong njoë tjeukén raja".

Teuma seu'öt inong njan: „Haj paléh, handjeuet tajoe meung sapeuepi. Peukeu goena di agam njoë sidroë? Bōh dja' é' kah keudéh oe roemoh! Bahlé koedja' eu keudroëkoe Teungkoe. Njan ngon eungkōt lam blangong ba' ka'eu', bè' katinggaj kapeuha-béh ba' mie; kèe koedja' eu Teungkoe".

Jōh njan lé djitrōn inong njan, djidja' eu Teungkoe. Teuma é' lé Pa' Pandé, dja' keumiet boe ngon eungkōt, ngon proetdjipi deue' silagoëna. Peue lom ban djikalon boe ngon eungkōt ka masa', peue takira? Jōh njan lé djikaréh boe, na saboh seutooe' raja, djiteumo' ngon eungkōt ban saboh blangong raja. Peue lalè? Djidoe' lé, dji-simpan, djisoeëb, djipadjōh bandoem habéh boe bandoem, habéh ngon-ngon eungkōt ban saboh blangong raja.

Di poeroemoh Pa' Pandé njan, hana padit na tréb djidja', trōih lé ba' saboh meunasah; dji'eu na sidroë Teungkoe teungoh neutoeeng ie seumajang. Kheun inong njan, djimarit ngon Teungkoe njan: „Oelōntoean lakèe langkah Teungkoe si'at oe roemoh oelōntoean hadjat keumeung joe beuet boe keu aroeah meung sikaj breueh". Ban neuleungo meunan lé Teungkoe njan, neupalét seu-reuban ba' oelèe, neutjo' ngon toengkat, landja lé neutrōn, neudja' meu'ikōt-ikōt ngon inong njan.

Ban saré trōih oe gaki reunjeun roemoh Pa' Pandé, jōh njan neugeureuhèm Teungkoe seureuta ngon neusrah gaki, ladjoe neu'é' oe sramoë reunjeun, neutiti, landja neudoe' ba' tika doee'. Di poeroemoh Pa' Pandépi dji'é' landja saré mèhmoh, djidja' eu boe njang djikeumeung bri keu Teungkoe. Ban djimeung dja' bōh, ka hana sapeue na lé! Teungkoe ka teuprèh di sramoë, boe ngon eungkōt bandoem ka hana lé, ka habéh djiseuba lé Pa' Pandé. Njang na dji'eu tjit meung Pa' Pandé, teu'éh di sramoë likōt, teungeut teuhanta sabab hè'dji, ban lheueh poemadjōh.

Jōh njan lé djipeugoë Pa' Pandé teungoh éh lé poeroemohdji, seureuta djikheun: „Haj soela, beudoih! Bè' kaboeta, koejoe eu boe ngon eungköt. Pakon ka'éh? Soë padjōh boe ngon eungköt 'oh é' habéh bandoem? Péuekeu koebri djeunoë keu Teungkoe? Pakon kapoemalèe kèe, e geutob sôm?" Seu'öt Pa' Pandé: „Ka lōn padjōh habéh bandoem, sabab hè'koe that ba' koedja' mita Teungkoe boenoë, lompi ka takheun lé gata boenoë, hana tabri koetinggaj; njankeu djeuet koepadjōh 'oh habéh bandoem". Ban djileungo meunan lé inong njan, makén meutamah beungèh ngon toenoe atédji keu lakoédji njan, seureuta ngon djimeuseurapa lagèe raja, 'oh sroh djeuet keu paké raja. Sarè 'a'oe djimeuda'wa lakoë binoë; djeuet keu malèedji that di inong njan oeba' Teungkoe, hana djitoepat som lé moekadji njan.

Ban neuleungo meunan lé Teungkoe njan, oereueng moepaké rujōh meuda'wa, teuma kheun Teungkoe njan: „Haj Nja', bè'keu rujōh lé! Kanoeri gata, Poteu Alah peutō, oebé njan ka taniet. Éntja' Alah, seulamat gata 'doea niba' marabahja dōnja njoë". Lheueh neukheun meunan, neutrōn di Teungkoe njan, neuwoë oeba' teumpat droëneu. Di inong njan teungoh tjeumaröt sabé, seureuta ngon djimoë, saré prō'preue' ngon ie matadji, sabab malèedji sileupaihna keu Teungkoe njan. Jōh njan djikheun keu lakoédji: „Haj soela, kapeu'ajéb kèe oeba' Teungkoe, kapeupoe-tōih asa gob, hanā koeteumèe bri sapeue! Pajah mantong geudja' keunoë oeba' roemoh kèe, haj soela, waba sampōh!"

Ba' masa njankeu teuma teusréh ba' até poeroemoh Pa' Pandé, nietdji njan djikeumeung wèh di roemoh droédji, djimeung dja' lam oeteuen hō njang tō' langkahdji; djikheun lam até droédji: „Kèe hana djeuet koemeudoe' dong lé ngon agam ngeut njoë, akhé djeuet keu paloë raja". Lheueh djipiké meunan, djitjo' lé saboh goeni raja, djipasoë lé doempene alat ngon beukaj batjoet sapeue keu peunadjōh dja' di rèt, seureuta ngon peukajandji idja badjèedji na limong nam kré', 'oh peunoh saboh goeni raja. Asoë goeni njan, na disinan: idja ngon badjèe, sikeumbong minjeu', srahi meulisan, lom njang djibōh boh mano' ngon boh ité'; la'én niba' njanpi na tjit djibōh sadjan, njang di koenjèt ngon sira tjampli, sidoempene alat teumagoen, na didalam goeni njan; la'én njang di bie' ranoeb, pineung, gambé ngon bakōng, breueh gampét

ngon plō' roetoe-tjoeka, boh asam ngon blatjan doempoe na, hana sapeue njang tan.

Lheueh ka sieb djipasoe bandoem, teuma dji'ikat, djitjoeet babah goeni njan, 'oh kong that ngon taloe awé. Ladjoe teuma djipeudoe' dilikōt pintō rambat, sabab nietdji, 'oh soebob teubiet padja singoh beungoh, djikeumeung peudja' ladjoe sidroëdji, bè' na djithèe lé lakoëdji Si Pa' Pandé. 'Oh ban saré seupōt oeroë ba' malam njan, di Pa' Pandé teutab dji'éh keudroëdji, proeetdji ka troë; dji'eu lakoe haj poeroemohdji dawō' seumimpan, di Pa' Pandé djipoera-poera hana djithèe, djipeunteugent droëdji, 'oh meugro-gro. 'Oh ka djoela malam, di inong njanpi dji'éh keudroëdji, hana lé sadjan ngon lakoëdji njan, sabab ka beungèh raja' jōh boenoë oeroë. 'Oh saré ka bandoea djimeu'éh-éh, ka teungeut, ba' oemoe teungoh malam beudoih lé Pa' Pandé batjoet-batjoet, djidja' ploih goeni raja njan, djipeusoh asoë goeni njan bandoem, djidja' peudoe' oeba' saboh teupat njang la'én dja'ōh batjoet ngon meusom. Teuma djilōb droëdji njan oe dalam goeni njan, dji'ikat babah goeni, djitjoeet poentja taloe didalam.

Ba' masa njankeu teutab Pa' Pandé teungeut dalam goeni njan, djipalét droëdji ngon idja badjèe njang na di sinan nam limong kra'; la'én niba' njan na tjit sadjan ngon breueh gampét saboh eumpang meusadjan ngon eungkōt thō, la'én hana sapeue lé dalam goeni njan; bandoem ka djipeusoh, ka djipeudoe' ba' saboh teupat.

'Oh ban lami soebob moeréh oeroë, beudoih lé poeroemoh Pa' Pandé, djitjo' goeni dabeuehdji njan, ladjoe djiseu'ōn, djipeudja' sidroëdji ngon hana ngondji. Nakeu kira-kira koetika wa'tèe boe lam djiseu'ōn sabé hana piōh, teuma kheun Pa Pandé djipeu'om-'om soedji lam goeni, djikheun: „Haj, pakon han tapiōh dilée?”

Ban djileungo soe oereueng teumawō' lé inong njan, jōh njankeu teuka teumakōtdji; djingieng wie oeneun ngon djipaléng oe likōt, hana leumah dji'eu oereueng. Lheueh njan djipeukreueh atédji, lom djipeudja' ladjoe bagaih-bagaih, lom atédjipi so'mo' raja, makén meutamah teuka teumakōt. Teu'ingat lam atédji: „Soe njan boenoë, salèh soe Djén? Adat meung na ngonkoe, meuhat hana that teumakōtkoe meunoë ban; njoë salèh sabab dji'eu

sidroëkoe mantong, salèh djimeudaja kèe lé Djén paléh njan. Bitpi meunan!" Lam djipeudja' sabé hana piòh, hingga kakeu rab djipeunab tjot mata oeroë, hana djipiòh tjit. Jòh njankeu lom djimeusoe Pa' Pandé didalam goeni, djikheun: „Haj pakon han tapiòh dilèe si'at, oeroë ka djoela!"

Ban djileungo lom soeara meunan, makén leubèh lom meutamah teumakòtdji di inong njan; djingieng wie oeneun ngon djitoelèh oe likòt, hana leumah djieu oereuengpi meung sidroë. Jòh njankeu djiseumpom goeni niba' oelèedji njan.

Di Pa' Pandé njan meung djiiem droëdji mantong sinan lam goeni, moebalòt-balòt ngon moepajéh, ba' that lé ba' sakétdji, keumong toeleueng-toeleuengdji, hana tjit djimeusoe pi meung batioet, sabab djitakòt that keu poeroemohdji njan. Teuma 'oh ltheueh poeléh niba' hè'dji, di inong njan lom djiseu'òn teuma goeni raja njan, ngon djipeukreueh atédji. Ladjoe djipeudja' sidroëdji rèt lam oeteuen raja, hana djipeudoeli padang ngon rimba, hana djipiòh lé sagaj. Ladjoe djidja' tadjam, ho njang tò' langkah badji djipeudja' landja. Doedoë niba' njan, kakeu tò' oeba' wa'tèe akhé leuhō awaj 'asa, mantong lam djidja' sabé hana piòh, lom meutamah ngon hè'dji that. Teuma djimeusoe lom di Pa' Pandé njan di dalam goeni seuneu'òn: „Haj tapiòh dilèe si'at! Oeroë ka rab wa'tèe 'asa".

Ban djileungo lom meunan soeara oereung teumawō', jòh njankeu lom makén leubèh teuka teumakòt seureuta ngon teukeudjòtdji raja, lom ngon jodji 'oh meutat-tat, teuka poetjat ngon-ngon moekadji. Adat ta'iréh, bit hana lé darah ba' moekadji meung sitidjoh. Jòh njan leubha' lé djiseumpom, meunan sabé, doea lhèe peuet go lam djiseumpom-seumpon goeni njan sabé. Di Pa' Pandé dalam goeni ka habéh reumon asoë-asoëdji; ban saboh badandji ka teubiet darah 'oh meuheue-heue, habéh basah goeni-goeni.

Ban djikalon meunan lé inong njan, jòh njan djikheun: „Alah haj beh! Ka habéh rō meulisankoe, lom ngon sikeumbōng minjeu' koepi ka habéh beukah. Alah, haj ma, sajangkoe that!" Jòh njankeu djiploih taloë awé, neu'ikat babah goeni njan, djikheun: „Èh peue doë njoël!" Ban djikalon oereueng teudoe lam goeni, jòh njankeu teukeudjòtdji ngon teukli'dji lagèe raja, 'oh meukriew-kriewdji saré. Doedoë niba' njan lom djitaré', djisoet idja njang ka me-

goempie batjoet-batjoet. Teuma leumah lé dji'eu lakoëdji Si Pa' Pandé ka pangsang teudoe lam goeni raja.

Ba' masa njankeu teuma lom djitjeumaröt lagèe raja, djikheun: „Haj soela, waba sampöhkeu! Peue boetkeu keunoë kadja' lōb lam goeni dabeueh kèe? Si waba poeta paléh! Koeseu'ōn kah si'oeroë soentō' dalam goeni njoë; patōt kapeulakoe droëkeu meunan?” Doedoë niba' njan barō poeléh pangsang Pa' Pandé, jōh njankeu lom makén leubèh that djimeuseurapa. Seu'ōt Pa' Pandé: „Sabab koepeulakoe meunoë sajangkoe keu gata sidroë, tameung boih droëteu, tameung maté lam oeteuen rimba. Ada' ka maté, bahkeu sadjan-sadjan geutanjoë doea! Djeunoë hokeu tō' geutanjoë njoë? Lom ngon oeroëpi ka keumeung seupōt, bōh gèt tabeudoih niba' padang njoë, kadang é' meuteumèe roemoh-roemoh ladang atawa rangkang-rangkang lam oeteuen”.

Doedoë niba' njan landja lé bandoea djih djibeudoih disinan, djidja' lé ladjoe bandoea meu'ikōt-ikōt lakoë binoë. Teukeudirōlah ba' djidja'-dja' njan meuteumèe ngon saboh doesōn lam rimba raja njan, le that dji'eu ba' teupat njan roemoh ngon djambō doem ka habéh tiréh, tamèh-tamèh doem dji'eu ka keumeukab. Lompi disinan le ladang ngon lampōih, bie' kajèe njang djeuet tapadjōh boh dji, lagèe ba' drien, rambōt, mangoih ta, oe, pineung ngon mamplam. La'én njang di ba' djō' le sileupaihna timoh, njang di ba' keumiroë njanpi le that, ba'dji oebé-bé raja, doem moebandja ban silingka gampōng njan. Doemnan le roemoh raja-raja, oereueng ka hana lépi meung sidroë, bandoem ka habéh djiseuba lé Milōn-raja njang doee' lam rimba Tasa'-tasé'.

Didalam roemoh njan doem le that djiteumèe makanan, bie' sagèe roemia ngon sagèe djō'. Njang hana disinan, tjit meung roekōn breueh padé; meung njang la'én, sidoempeue na; meung di boelèe djō' ngon aneu' krèh djeueb-djeueb roemoh doem ta'eu meuseu'è. Hingga nakeu padoem lawét teutab djidoee' disinan, ba' si'oeroë kheun Pa' Pandé ba' poeroemoh dji: „Geutanjoë bè' tadoee' lé lam doesōn njoë, koetakōt paloë. Njoë bie' seungoeë that, hana teuka oereuengpi meung sidroë; roemoh raja-raja, oereueng hana. Njeumkoe na njang poepaloë disinoë. Adat han, pakon djeuetkeu soh gampōng meunoë ban? Salèh-salèh njeumkoe na djipeutoë Milōn keunoë, njankeu njang peuhabéh oereueng disinoë”.



Jōh njankeu Pa' Pandé djitoemoeweueh djeueb-djeueb roemoh, teuma djiteumée disinan doea boh geundrang ngon soeroenè, la'én niba' njan lom teuma meuteumée doea boh mata bliōng raja. Doe-doë niba' njan djipasoë bidjèh krèh lam goeni, djipoepeunoh tjamppli tjoet lam eumpang panjang, djitjò' ngon boelèe djò' doea boh beunalòt goempie raja. Ladjoe djipeudja' bandoea droëdji lakoë binoë, djiseu'ōn dabeueh 'oh saratdji saré. Ba' sara djidja' njan di Pa' Pandé dawō' djimeungeundrang, djikeutjōj-keutjōj ngon djijjōb soeroenè sipanjang rèt oeteuen rimba. Ba' masa njankeu habéh teukeudjōt doemna binatang asoë rimba, djiploeeng 'oh djeu'ōh seumeureueng oe lam rimba Tasa'-tasé'.

Padoem lawét lam djidja' sabé di Pa' Pandé njan bandoea djih lakoë binoë, teuma tō' ba' rimba roemoh Ni Gogasi raja. Ba' masa njan di Ni Gogasi raja njan lakoë binoë hana di nanggroëdji, djih bandoea ka leupaih djidja' dalam oeteuen rimba ba' nanggroë la'én. Sabab ba' nanggroë droëdji njan ka koereueng makanan, habéh djipoebinasa lé Milōn. Ban saré tō' Pa' Pandé lakoë binoë keunan, ladjoe lé bandoea droë dji'é' oebea' roemoh Gogasi raja. Disinan moedah doempeue le that makanan, na breueh, na padé, na ngon eungkōt thō; la'én njang di blatjan doem meutja'-tja', moeboeliet-boeliet oebé-bé boh oe; moedah that doempeue, le that peunadjōh disinan areuta Ni Gogasi. Teuma di poeroemoh Pa' Pandé landja lé reudjang djimagoeen keutjah-keutjōh sidroëdji. 'Oh saré masa' boe ngon eungkōt, djitōt reundang ngon panggang. Bandoea djih landja doe' poemadjōh, 'oh troëdji raja.

Doedoë niba' njan beudoih Pa' Pandé, djitjo' blatjan njan doea lhèe boh tja', ladjoe djitōt ba' dapoe. Lheueh djitōt ka masa', djibalōt lam idjadi, djiseungeu meunan mantong sara dji'éh tō' an malam dji'éh sadjan ngon tja' blatjan njan. Peue takira! Ba' malam njan djitrōn lé tikōih roemoh soh, djimeukeureudja tjrab-tjrieb, djiploeeng keudéh keunoë. 'Oh ban saré teungeut Pa' Pandé, peue takira, djitrōn lé doem keunan meukawan-kawan, djidja' padjōh blatjan njan. Ba' masa njankeu habéh djikab lé tikōih njan, habéh ngon-ngon djarōë bibi Pa' Pandé, doemna sirat goekèedji habéh djireupang lé tikōih njan. Hana meung sapeue djeuet djimoemat lé, peudéh ngon ngiloe hana djitoeho ba lé; bibi ateueh ngon bibi barōhdjipi ka hana lé, habéh djigoenténg bandoem lé tikōih. Meung djimaritpi, hana soë toepeue lé peue njang djikheun.

'Oh ban beungoh oeroë, beudoih poeroemoh Pa' Pandé, djihej lakoëdji: „Haj soela, beudoih! Oeroë ka djoela, bè' kaboeta lé! Dja' poedéb apoej, koemeung tagoeen boe". Jõh njan beudoih lé Pa' Pandé, meukèh-meukèh dja' ba' dapoe. Djipeukab apoej, hana é' djeuet apoej; sabé-sabé lôn sabab hana djeuet djimoemat djaroeëdji sakét. Kheun poeroemohdji: „Ba' reudjang kapeukab, haj soela! Bè' djan djoela oeroë na mangat tadja' mita peue njang tan. Pakon doë han kapeuhoe ba' that, na mangat reudjang hoe? Peue hana babahkeu, haj rimoeeng kab!" Seu'õt Pa' Pandé: „Han djeuet koe'oehoe, babah-babahkoe ka hangkét". Seu'õt poeroemohdji: „Peue sabab sakét babahkeu, haj soela?" Teuma seu'õt lom Pa' Pandé: „Hangkét djaroeë babah, bibi-bibi ka eungkõih ka'!" Lom tanjong poeroemohdji: „Haj, pakon djikab djaroeëkah ngon bibi lé tikõih, haj soela? Peue kapadjõh beuklam?" Seu'õt Pa' Pandé: „Hadjõh beuhatlan". Lom kheun poeroemohdji: „Di gobpi na geupadjõh blatjan, hana lagèe kah kaseungeu saboh-saboh tja', oebé-bé nan raja habéh kaseuba. Peuekeu han djikab djaroeë ngon bibikeu lé tikõih? Djeunoë kapeuhoekeu apoej ba' reudjang meukab, mangat koetagoen peunanta'keu bè' djan djoela oeroë."

Jõh njankeu Pa' Pandé peuhoe apoej, meusoe babahdji mantong: „Heuh-heuh!" Apoej hana djitém hoe meung batjoet. Lom kheun poeroemohdji: „Haj soela, pakon meuheuh-heuh babahkeu mantong? Peue sabab apoej han é' hoe?" Seu'õt Pa' Pandé: „Bibi-bibikoe ka eungkõih ka'." Lom teuma djiseu'õt poeroemohdji: „Haj soela, boetkah lagèe Si deue' njang ka lapeue-boelõ. Patõt kaseuba blatjan sara ngon ka'éh? Peuekeu han djilirang bibikeu lé tikõih?" Teutabkeu Pa' Pandé ba' peuhoe apoej, djijoe lé poeroemohdji. Djeuetkeu peudéh matadji sabab keunong asab; jõh njankeu teubiet ie idõng ngon ie matadji 'oh meudjohdjoh.

Ban djikalon meunan ban, teuma beudoih lé poeroemohdji njan, seureuta ngon djikheun: „Beudoih kah keudéh! Djéh tjampli katjo', kadja' péh, mangat koetagoen eungkõt thõ". Beudoih lé Pa' Pandé, djitjo' tjampli, ladjoe djipeusieng tangké. Lheueh njan teuma ladjoe djipéh ba' batée neupéh. Peue takira ba' masa njan! Ban saré keunong tjampli teupéh ba' djaroeëdji njan, jõh njan lé dji'é' peudéhdi, han djitoeho ba lé. 'Oh meu'i'i djimoë ba'e, sabab siadji sileupaihna, hana djitoepat peugah lé. Doemnankeu sakétdji

silagoëna! Ba' masa njankeu ta'eu djigröb-gröb Pa' Pandé ngon djitindja', djimeunari ban saboh roemoh raja njan. Ban dji'eu meunan Pa' Pandé gröb-gröb ban saboh roemoh, jöh njan lé kheun poeroemohdji njan: „Haj soela, peue kapeulakoe? Koejoe péh tjampI, pakon kagröb-gröb, kameunari ban saboh roemoh lagée oereueng poengo-boei? Peue njang ka kateumée girang that atékeu di kah, haj soela?”

Seu'öt Pa' Pandé seureuta ngon djimoë ba'e, djikheun: „Hang-kétkoe that heudéh raja!” — „Pakon peudéhkeu, haj maté geutjang? Peue kabkeu njang djeuetkeu meunan?” Seu'öt Pa' Pandé: „Heudéh djaroëkoe, eungköh ka'.” Kheun poeroemohdji: „Toh mèn koe'eu pakri ban?” Ban djikalon tapa' djaroë Pa' Pandé ngon- ngon doemna sirat goekèedji, ka habéh djilhoet lé tiköih, sabab euntjit djimat tja' blatjan hana djsrah djaroëdji, lom kheun poeroemohdji njan: „Haj soela, peukeu han djiseuba djaroëkeu lé tiköih, euntjit kamat blatjan hana kasrah djaroëkeu njankeu karasa! Bie' si waba seungeu blatjan hana kira-kira”. Teukeudirölah ngon sabab keunong ie tjampI njan ba' djaroëdji, hana djeuetkeu keumong, teuma poeléh loeka djaroë Pa' Pandé njang ka djikab lé tiköih, di bibidji njanpi ho makén poeléh lé batjoet-batjoet. Nakeu kira-kira doe boeleuen teuneuréb djidjoe' ba' roemoh raja njan, doempueu keu moedahan, hana lé soesahdji sapeue, sabab disinan kana doempueu beukaj, peunadjöh makanan damoh, le breueh padé areuta Gogasi.

Di Pa' Pandé njan, boetdji geunab oeroë hana teudöh sabé lam djipèh geundrang ngon djijöb soeroenè, tō' an malam njankeu sabé boetdji hana piöh. Ada' taleungo, bit é' toenjè goe-goeloenjoeengteu, soe geundrang ngon soeroenèdji njan, sabé meu'é-è ngon doem-doem tjhōj. Nakeu kira-kira 'oemoe nam boeleuen teuneuréb ka djidoe' dalam roemoh njan, teuma bandoea djihnjan lakoë binoë djipoemoela ngon djimeulampöih, seureuta ngon djimeuladang lam rimba raja. Djipoela disinan sidoempueu peunoela bie' teubée, gambé, bakōng, tjampI tjoet ngon tjampI awé, troeeng, ranoeb, pineung, oebé roekōn ba' kajèe njang djeuet tapadjöh, bandoem na djipoela lé poeroemoh Pa' Pandé.

Teukeudirölah ba' saboh masa, teuma woë lé Gogasi keunan, bandoea droë lakoë binoëdji, djidja' saweue roemoh droëdji njan. Phōn di djeu'ökhon soe ka keureutam-keureutoem, sabab reubah



ba' kajèe ba' meusipa' ngon gakidji ba' wa'tèe djidja'. Ban dji-leungo meunan riõh lam rimba lé poeroemoh Pa' Pandé, that toenjè soedji keureutam-keureutoem dalam rimba, jõh njankeu teu-keudjõt ngon teumakõt dji raja. Ladjoe lé djiwoë ploeng oe roemoh djidja' peugah ba' lakoëdji Pa' Pandé, djikheun: „Haj Dalém, gèt tabeudoih, geutanjoë taploeeng di sinoë! Djéh Gogasi ka djiwoë keunoë, meuh at maté geutanjoë bandoeateu sigo djipadjõh”. Jõh njan lé seu'õt Pa' Pandé, djikheun ba' poeroemohdji: „Bahkeu djiteuka keunoë hana koetakõt. Dja'lèh é' keudéh di gata oe para, bah kèe lawan Gogasi raja njan”. Lheueh djikheun njan, ladjoe didjih njan djimeugeundrang, djipèh sabé meusoe: „Doem-doem tjhõj, doem-doem tjhõj”. Meudjan djijõb lé ngon soeroenè, mangat that soedji 'oh meu'è-'è lagèe oereueng meu'ara' dja' euntat lintõ ngon darabarõ.

Di gogasi njanpi makén lé toë djiwoë ladjoe hana lalè. Ban djileungo soe geundrang ngon soeroenè, meusoe ba' teuntang roemohdji njan, jõh njankeu teudja' teudongdji, teuka teumakõt dalam atédji, seureuta djikheun ba' poeroemohdji: „Haj Poetroë, geutanjoë gèt tapiõh di sinoë dilèe, atékoe hana mangat. Peue salèh soe njan toendjaj that meusoe di gampõng ba' roemoh geutanjoë? Bah koedja' eu dilèe si'at. Teumakõtkoe salèh 'njo Radja Milõn njang sa'ti ka tõi'dji keunoë, salèh ka djidoe' lam roemoh geutanjoë. Meung 'njo bit 'njo sidjih njan, geutanjoë leubèh gèt taploeeng niba' teumpat njoë, taminah oe nanggroë la'én ba' djeu'õh that.”

Lheueh djimoepakat Gogasi lakoë binoë, djitinggaj poeroemohdji njan diloea doesõn, seureuta djikheun: „Gata, Poetroë, tadoe' taprèh disinoë, lõn koetamong sidroë dilèe oe gampõng”. Jõh njan djitamong lé Gogasi agam peuleuheuen-leuheuen dalam gampõng oeba' roemoh droëdji ngon teumakõt dji raja. Di Pa' Pandé njan, ba' wa'tèe njan teungoh laloë dawõ' djipèh geundrang, sabé hana piõh. Jõh njankeu djimeusoe Gogasi raja, djideumpé'-deumpé' djitanjong: „Soë njan di roemoh kèe?” Teuma seu'õt lé Pa Pandé, ngon djipeutjho soedji: „Bhè' hana katoesoë kèe Soelõtan Radja Milõn Sa'ti? Sabab hana lé makanan di nanggroëkoe, njoëkeu koepeuteuka keunoë ba' kah, koedja' mita kah ka padoem tréb! Sabé koeprèh-prèhkeu, oeroë njoëkeu barõ koe'eu

moebajeukenkeu keunoë! Ba' gèt kaprèh, sinan bah koesingklakeu ngon hékeumat sa'tikoe njoë."

Ban djileungo meunan lé Gogasi raja, jōh njankeu makén leubèh teuka teumakōt dalam atédji, seureuta djikheun lé Gogasi: „Adat njo kah Soelōthan Radja Milōn, tjoeba peuleumah gigoë-keu meung sineu'!" Jōh njankeu Pa' Pandé lhom saboh mata bliōng raja, njang tadjam sileupaihna, seureuta djikheun: „Njoë ka'eu keudroëkeu pakri ban roepa? Ngon gigoë njoëkeu koemamoh toleueng doemna asoë rimba." Ban djikalon gigoë mata-bliōng njan lé Gogasi, dalam atédji djikheun: „Bit kreueh silagoëna lom ngon tadjam sileupaihna. Oegah lé atédji makén meutamah, teuka teumakōtdji. Ka poetjat moeka-moekadji di Gogasi njan. Sabab teumakōtdji that, ladjoe djisoerōt djiploeeng na limong plōh deupa, teuma lom djiriwang ngon djipeukreueh atédji, djidja' tanjong, djikheun: „Ada' njo kah bit-bit Radja Soelōtan Milōn, tjoeba peuleumah misèkeu meung si'ōn". Jōh njankeu Pa' Pandé soenjoe boelée djō' ban saboh geunoelōng raja.

Ban djikalon meunan lé Gogasi, makén leubèh lom teuka teumakōtdji keu Radja Milōn. Lom djikheun lé Gogasi: „Tjoeba peuleumah lom gigoëkeu njang la'én meung sineu' treu', mangat koethèe bitnjo kah njoë Radja Milōn njang doee' lam roemoh kèe njoë."

Jōh nankeu seu'ōt Pa' Pandé, djipeukeudjōt Gogasi ngon soe-ara ringot, seureuta djikheun: „Haj soela, le that habakeu kameu-toelèh lagèe ngon kèe. Kaprèhkeu sinan, mangat koetrōn koenjeuihkeu ngon gigoëkoe njoëkeu njang ka kajém koenjeuih binatang asoë rimba doemna, bie' meureugasitoea". Leubab lé, soe matabliōng djitie' oe tanoh, bliōng njang leubèh raja niba' lam doem, lom ngon tadjamdji sileupaihna di matabliōng njan, lom ngon poetéhdji that meukilat-kilat. Ban djikalon meunan lé Gogasi, makén leubèh lom teuka teumakōtdji keu Radja Milōn. Sara djiploeeng njan djikheun meunoë: „Toeengkeu keu kah roemoh kèe, meung doemnan gigoëkeu njan, bitkeu é' habéh doemna asoë rimba kaseuba lé kah. Di kèepi hana koedja' riwang lé keunoë, bie' nanggroë koereueng makanan, peue koedja' deumba? Bahkeu ting-gaj keu kah meung roemoh raja saboh."

'Oh tō' Gogasi agam ba' teupat poeroemohdji moepiōh njan, teuma habéh djipeugah doem haj éhwardji jōh di gampōng, seu-

reuta djikheun: „Alah haj Poetroë, ada' meung tadjaj' gata sadjan, salèh ka moepaloë; meuhat djireubôt gata ba' djaroe lôn lé Radja Milôn Sa'ti, bit-bit dalam roemoh geutanjoë ka djidoe' djih". Sidoempeue haj njang djipeuleumah boenoë lé Pa' Pandé, habéh bandoem djipeugah keulakoean oebea' poeroemoh droëdji Gogasi inong. Lheueh djimeuhaba njan, landja djipeudja' di Gogasi njan bandoea droë lakoë binoë, djiwèh oe nanggroë la'én. Teuma teutabkeu Pa' Pandé bandoeadji lakoë binoë djidoe' lam roemoh Gogasi raja njan. Dalam doesôn njan djimeuladang poela doempue teunaman; hingga maté habéh oemoedji bandoea droë ba' teumpat njan.

---

#### IV. HABA SINJA' AGAM TJOET.

Na saboh nanggroe raja; njang kheuradjeuen ba' nanggroe njan sidroe radja raja, nan radja njan Radja Djalé. Ba' simalam di radja njan neumeuloempoë: na njeum leumah neukalon radja niba' saboh nanggroe ka djeuet keu keubeue, doemna teungkoe 'oelama ka djeuet keu keuleudè, sahbanda ka djeuet keu boej, inong gasien ka djeuet keu poetroe, njankeu sagaj loempoë radja njan. Ban lami teukeudjöt, neu'eu ka beungoh oeroë. Teuma sabda radja oeba' boedjang: „Djeunoë tadja' gata ba' reudjang oeba' goerèe oelön ban peuet droë wadi njang meugah; ba' oeroë njoë lé droëneu ban peuet droë ba' tō' keunoë ba' oelön, sabab oelön keumeung peugah haba rahsia.”

Ban boedjang leungo sabda radja meunan neumeutitah, jöh njan lé djiteubiet oe loea dalam, djipeuteuka oeba' goerèe peuet, njankeu meuntroe wadi radja, gob njankeu njang leubèh raja niba' njang na; di baröh radja, njankeu njang leubèh raja meureutabat. Seureuta djikheun lé boedjang: „Ampön teungkoe, njang pajöng nanggroe! Sabda radja niba' soelötan, droëneu teupanggélan.” Lheueh djipeugah teupanggélan, landja djigisa, djiwoë di djih njan oe dalam oeba' Radja Djalé.

Doedoë niba' njan tröih lé goerèe radja wadineu njang peuet droë, djitamong lé jöh njan oeba' radja ngon-ngon tantradji doem meuroej-roej, 'oh peunoh dalam, le that oereueng 'oh seuleusa'. Bandoem njan djikeumeung leungo peue sabda radja, peue rahsia, njang djeuet boenoë ban soeboh boedjang djidja' teudab-dab, ploeng keudéh, ploeng keunoë.

Ban lami halé goerèe peuet keunan, jöh njan lé geudoe' maséng-maséng atueh koeroesi njang meulia, geumeungadab oeba' radja. Teuma trön lé sabda niba' radja oeba' wadineu njang raja, goerèeneu njang peuet droë: „Hoka teungkoe droëneu ban peuet droë njang goerèe oelön?” Jöh njan seu'öt sabda lé goerèe peuet:

„Ampōn Dèelat!” Lom kheun radja: „Njang djeuet oelōn panggé meuhej droëneu keunoë bandoem, keureuna oelōn kheunda' peugah saboh rahsia: Beuklam Toehan peuleumah oeba' oelōn, hana oelōn toepeue ma'na. Harab oelōn, droëneukeu njang peuet droë, mée bōh ta'bi loempoë oelōn njoë!”

Jōh njan lé seu'ōt goerèe peuet: „Peue po loempoë? Pakon meu'eu Toeankoe goendah that?” Seu'ōt sabda niba' radja: „Haj teungkoe doemna! Beuklam oelōn meuloempoë, leumah bōreuhan Alah ta'ala. Na njeum lōn eu radja ba' saboh nanggroë ka djeuet keu keubeue, teungkoe 'oelama ka djeuet keu keuleudè, sahbanda ka djeuet keu boej, inong gasien ka djeuet keu poetroë; njankeu sagaj loempoë kamoë, djeunoë bè' han teungkoe bōh ma'na.”

Ban geuleungo meunan sabda radja lé goerèe peuet, njang neu-loempoë lé radja, teuma neudjaweueb lé: „Éntja' Alah, Dèelat Toeankoe! Bahkeu kamoë laman paré'sa oeba' doemna kitab ta'bi, na deungon tan; tjit kamoë bri ma'loem oeba' Dèelat Toeankoe!” Jōh njan teuma geubeudoih lé bandoem, geumoewoë-woë maséng-maséng teubiet di dalam, landja oeba' teupat droë; ka'a-ka'oe ban saboh nanggroë, djikheun: „Radja neumeuloempoë 'adjajéb silagoëna.”

Ba' masa njankeu di goerèe peuet ta'eu dèhdoh ngon mèhmoh raja; hana meung djab lé boh poenggōngdji ba' tika, dawō' boeka kitab djéh, boeka kitab njoë, eu kitab djéh, eu kitab njoë; doempat ka habéh djiparé'sa, sapatpi hana é' meung moebajeuen loempoë radja njan. Doedoë niba' njan moepakat ban peuet droë goerèe njan sapeue kalam. Teuma geubeudoih ban peuet droë, geutamong ba' radja; 'oh tō' ba' radja, lheueh geudèelat ban njang adat seureuta ngon djipeuseumah: „Dèelat ampōn Toeankoe. Kamoë njoë ban peuet ka lheueh paré'sa 'ba' doemna kitab ta'bi loempoë, teutapi hana meuteumeung ban ta'bi loempoë Dèelat Toeankoe.”

Ban neuleungo meunan djipeuseumah lé goerèe peuet, teuma lom trōn sabda niba' Radja Djalé: „Djeunoë oelōn kheun ba' teungkoe doemna, meung han é' neupeunjata ban ta'bi loempoë oelōn, droëneu njoë ban peuet droë oelōn poemeureuka, koepoh maté.” Ban goerèe peuet leungo sabda meunan, jōh njankeu makén

teumakōtdji raja, bandoem ka poetjat moeka. Teuma seumah niba' goerèe peuet: „Dèelat ampōn, bri tanggōh keu kamoë doemna, 'oemoe lhèe plōh oeroë niba' Sroëpada!” Seu'ōt sabda radja seureuta neukheun: „Meungnjo teungkoe meutanggōh, njan hana peue, djeuet kamoë prèh, bè' 'an lhèe plōh oeroë teuneuréb, ada' ba' lhèe plōh boeleuen pi djeuet tjit oelōn prèh, asaj ba' é' neupeugah ban ta'bi loempoë oelōn njan.”

'Oh ban saré lheueh geuleungo sabda meunan, njankeu barō phōn na batjoet mangat até goerèe peuet; jōh njan lé neutaubiet di dalam niba' poteu radja, landja woë oe gampōng droëgeu maséng-maséng. Doedoë niba' njan lom moepakat goerèe peuet droë; 'oh ka séb tjoekōb pakat piké ban peuet gob njan, teuma landja geudja' meudiwana, ho njang langkah ba. Nakeu 'oemoe lhèe oeroë lam geudja' sabé, teuma teukeudirōlah meuteumeung ngon sidroë aneu' miet goebeue kamèng. Di aneu' miet njanpi, 'oh ban leumah dji'eu goerèe radja dja', landja lé djiroempa', djipeurab, djidja' seumah, seureuta djibōt djarōë, djikheun: „Teungkoe ampōn doemna, ho hadjat langkah? Hantom poeroë neubeurangkat oeba' padang oeteuen rimba njoë. Salèh peue neukeumeung dja' mita? Lōn eu bangon sang-sang na boetneu njang meuseuké!”

Ban goerèe peuet leungo meunan seumah niba' aneu' miet goe-moebeue njan, jōh njan seu'ōt goerèe peuet: „Alah haj nja', bè'-keu tatanjong lé gata! Keureuna kamoë njoë, na saboh boet njang djeuet keu soesah raja, ka geubōh lha' badjoë lé Radja Djalé; meung hana é' moebōh ta'bi, ban ta'bi loempoë radja njan, meuhat kamoë njoë ban peuet geupoh maté, meuhatkeu kamoë séb ka njawong oedéb lam dōnja njoë.” Lheueh djileungo meunan narit goerèe peuet lé aneu' miet goemoebeue njan, lom djiseu'ōt aneu' njan, seureuta djitanjong ba' goerèe radja: „Peue njang geuloempoë lé radja? Tjoeba, teungkoe ampōn, bri thèe oeba' oelōntoean; kadang-kadang mée neubri lé Alah ta'ala é' djeuet oelōntoean bōh ta'bi!” Ban geuleungo seumahdji meunan, lompigeuleungo naritdji that bidja', teuma geupeugah lé goerèe peuet ba' aneu' njan ban njang ka geuloempoë lé radja. 'Oh ka habéh moephōm, djileungo bandoem, doedoë niba' njan djibeu'oet djarōë ba' goerèe peuet, seureuta djikheun: „Teungkoe ampōn, bè' soesah até! Éntja' Alah ta'ala, oelōntoeankeu njang bōh ma'na ta'bi loempoëgeu njan; teutapi tjarat oelōntoean njoë ba' neula-



kèe dilèe niba' djah tjoet oelöntoean di gampōng ano, nan-geu si poelan."

'Oh geuleungo meunan lé goerèe peuet, jōh njan lé geutanjong ba' aneu' njan: „Haj nja', gata njoë soë nanteu geu'oeroh lé gob? Ba' tapeugah oeba' kamoë njoë!" Seu'ōt aneu' njan: „Oelōn, toean teungkoe, nan gob meuhej Sinja' Agam Tjoet". Lheueh geuleungo nandji Sinja' Agam Tjoet, landja lé di goerèe peuet njan geupeuteuka oeba' roemoh apa aneu' njan. Ban lami tō' keunan, landja lé djipoemeulia lé apa Sinja' Agam Tjoet, ban njang lagèe adat reusam kanoen goerèe meuntroë radja.

Doedoë niba' njan geulakèe lé goerèe radja Sinja' Agam Tjoet njan oeba' apa droëdji, oedéb maté geutoeeng keu aneu' droëgeu lé goerèe peuet! Teuma di apadji njanpi han djeuet han djibri, ban njang ka geulakèe lé goerèe radja. Jōh njan geutjo' Sinja' Agam Tjoet njan, geupoewoë oeba' roemoh goerèe peuet; ngon moepakat ban peuet gob njan, geusalén peukajan keu Sinja' Agam Tjoet njan ngon peukajan njang indah that sang aneu' radja. 'Oh tō' oeba' seuningoh niba' oeroë njan, ban lami beungoh oeroë, geumè aneu' njan oeba' radja. Ban saré trōih ba' radja, teuma seumah niba' goerèe peuet: „Ampōn niba' Dèelat Toeankoe, njoëkeu aneu' di kamoë, njang é' bōh ta'bi ma'na loempoë Dèelat Toeankoe ampōn."

Doedoë niba' njan radja meusabda oeba' aneu' njan: „Djeuet, haj nja', tapeugah lé gata oebé ma'na loempoë kamoë?" Teuma seu'ōt seuneumah niba' aneu' agam njan: „Éntja' Alah, Dèelat Toeankoe! Tjoeba Dèelat Toeankoe ampōn tji peugah oeba' laman Sipada, peue njang ka Dèelat Toeankoe ampōn loempoë; ba' neubri ma'loem oeba' laman Sipada njoë."

Jōh njan lé trōn sabda radja neupeugah oeba' aneu' njan, hana oebah ban lagèe njang ka neupeugah oeba' goerèe peuet. Doedoë niba' njan seu'ōt Sinja' Agam Tjoet: „Éntja' Alah Toeankoe ampōn, oelöntoeankeu njang peugah bōh ta'bi ma'na loempoë Toeankoe, teutapi tanggōh laman Sipada oeba' Toeankoe lam 'oemoe doea thōn teuneuréb, seureuta djeunoë ba' Toeankoe ampōn karōnja keu laman Sipada saboh peudeueng, saboh kréh, saboh boengkōih ranoeb ngon reunggét ba' na limong reutōih neu'." Teuma djaweueb niba' radja: „Njang njan djeuet kamoë peuna, hana peue; djeuet lōn bri ban njang lakèe gata, doea thōn

tanggōhpi djeuet tjit lōn prèh." Jōh njan lé radja karōnja keu Sinja' Agam Tjoet njan peudeueng, kréh, boengkōih ranoeb, reunggét. Ba' masa njan lé ngon khōdeumat Sinja' Agam Tjoet sambōt doemna beuneuri radja njan di nab goerée peuet, doedoë niba' njan djiwoë Sinja' Agam Tjoet njan oe gampōng, sadjan-sadjan ngon goerée peuet.

Nakeu padoem oeroë Sinja' Agam Tjoet njan djidoe' sadjan ngon goerée peuet, teuma djilakée idin, landja djidja' beuet oeba' sidroë teungkoe siah 'oelama raja. Ban lami tō' djih keunan oeba' teungkoe njan, jōh njan lé djimeugoerée, djibeuet ba' teungkoe siah njang meugah silagoëna malém. Sidoemna peukajandji ngon alat: kréh, peudeueng ngon reunggét, bandoem njan djipeudjō', djikeubah oeba' djarōë teungkoe njan. Hana padoemna tréb djibeuet di sinan ba' teungkoe siah njan, teuma di Sinja' Agam Tjoet njan hana djibeuet lé, malingkan djidja'dja' keudroëdji mantong keudéh keunoë, hingga tō' djidja' oeba' roemoh sidroë teungkoe sahbanda; djilakée doe' droëdji di sinan, dji'eu lampōih roemoh njan seuma' raja doem meunaleueng.

Teuma djitjo' saboh tjangkōj lé Sinja' Agam Tjoet njan, bandoem dji'eumpoë, 'oh gléh. Nakeu padoem oeroë djih di sinan, ka habéh gléh doemna naleueng lam eumpōih njang silingka roemoh teungkoe sahbanda njan, doempeue ka djroh ngon meusiga', boeet Sinja' Agam Tjoet; pat-pat na dji'eu tanoh njang lhō', bandoem djipeusabé ngon djipeurata. Ban djikalon meunan djeumot lé sahbanda, teuma teuka sajang dalam até sahbanda njan keu Sinja' Agam Tjoet, seureuta djiparé'sa oeba' aneu' njan, kheun sahbanda: „Haj nja' gata njoë njang keubit, peue nan gob meuhej? Peugah ba' teupat oeba' oelōn, soë nan oereueng tjihi' gata?" Seu'ōt aneu' njan: „Nan oelōn Sinja' Agam Tjoet. Ma lōnpi ka hana lé, ajah lōnpi ka tan; njankeu djeuet oelōnteu dja' ho njang langkah ba, soë njang na tém peusajang keu oelōntoean njang jatim piatoe. Aleuhamdoe lélah! Ada' ka hana soë tém peusajang, pakri oelōn bah? Ka meunan gra' niba' Alah di ateueh oelōntoean sidroë!"

Ban geuleungo naritdji meunan lé sahbanda, teuma kheun sahbanda: „Meung njo meunan gata, haj nja', gètkeu gata tadoe' di sinoë sadjan ngon oelōn. Gata njoë bah oelōn toeeng keu aneu' oelōn dōnja akhirat, meusén aneu' droë lōn hana oebah."



Teuma seu'öt Sinja' Agam Tjoet: „Éntja Alah, djeuet ba' oelōntoean. Meungka teungkoe tém peusajang, saboh ba' teungkoe, siribèe niba' oelōntoean!” Hingga teutabkeu Sinja' Agam Tjoet djidoe' sadjan teungkoe sahbanda njan: peue njang na boeet njang geujoe peulakoe, njan bandoem djipoeboeet; ban njang geujoe njan, bandoem hana meu'oebah; peue njang geupeu'amanat, hantom na meutoeka; peue njang geupeuharab, hantom na binasa. Njankeu sabab makén that leubèh djigaséh lé sahbanda njan keu Sinja' Agam Tjoet njan.

Doedoë niba' njan geujoe aneu' njan meukat barang, meuniaga doe' ba' keudè, sadjan-sadjan ngon aneu' droëdji. Padoem lawét djimeukat di sinan ba' keudè, teuma ka makén that oetōih raja ba' djisoemoerat, lom ngon kira-mirapi ka tadjam silagoëna, lompi ngon laba hareukat njan le that djiteumèe. Padoem lawét djidoe' di sinan djimeukat, teuma ba' si'oeroë djimarit Sinja' Agam Tjoet, djimoepakat ngon dalémdji aneu' teungkoe sahbanda njang agam: „Haj dalém, tjoeba neupiké lé droëneu njang ba' ingatan oelōn: geutanjoë meuniaga njoë gèt bè' lé tabloë barang di sinoë, leubèh gèt tadja' bloë keudroëteu oe Poelo Pinang; meung njo tabloë keudroëteu di Poelo, meuhat meuteumèe hareukatdji lipat peuet; lompi geutanjoë ka na doea droë, sidroë doe' di keudè, njang sidroë boengka meungantoë-gantoë. Djeunoë ba' neulakèe saboh soerat tjab niba' djah, keuteurangan keu oelōn njang aneu' gob njan, soepaja moedah ba' bloë-moebloë, lom na djeuetkeu reudjang meutoeri ngon doemna sèedaga Poelo.”

Ban djileungo narit meunan lé aneu' teungkoe sahbanda njan, jōh njan lé djipatéh: njo bit meunan ban njang djikheun lé adé'-koe Sinja' Agam Tjoet, seureuta djiseu'öt: „Meunanpi gèt tjit, haj adé'. Djeuet oelōn marit ngon ajah.” Lheueh njan djiwoë aneu' sahbanda njan oe roemoh, seureuta djimarit ngon koe droëdji teungkoe sahbanda, djikheun: „Haj ajah, adé' oelōn njang nan Sinja' Agam Tjoet djilakèe dja' oe Poelo Pinang, djikeumeung dja' bloë barang keudroëdji, bè' lé tabloë barang di sinoë, hana le meuteumèe hareukat; ada' tadja' bloë keudroëteu, é' meuteumèe hareukat lipat peuet. Lompi adé' djilakèe saboh soerat keuteurangan niba' droëneu, njang djih njo aneu' droëneu, djidja' bloë barang oe Poelo Pinang. Djeunoë pakri ba' timangan niba' djah?” Teuma djaweueb teungkoe sahbanda: „Ada' nabsoedji meunan,

njanpi djeuet tjit. Peue na salah; atra djih njanpi njo aneu' di geutanjoë. Bahkeu tatji kadang-kadang é' meu'oentöng!" Lheueh njan seu'öt aneu' njan: „Njang ba' ingatan lönpi meunan tjit. Meung njo meunan, gêtkeu bahlé lön joe dja' djih njan oe Poelo Pinang. Padoem djeuet oelön bri pangkai keu djih?" Seu'öt sahbanda: „Bè' le that, tabri dilèe meung lhèe plöh ribèe reunggét. Seureuta ngon lön bri saboh soerat lön keu djih, lön böh keuteurangan lam soerat njan: Sinja' Agam Tjoet njoë njo aneu' di oelön. Ba' le gaséh ngon sajang doemna tóké dan toean-toean njang sèedaga di Poelo Pinang atawa njang di Singapoera keu djih, seureuta na djimè pangkaj dalam djaroë lhèe plöh ribèe reunggét."

Lheueh geusoerat ngon ka keumaih pakat teungkoe sahbanda ngon aneu' droëgeu, teuma geuhej Sinja' Agam Tjoet njan, geupudjaroë saboh soerat keuteurangan seureuta ngon reunggét lhèe plöh ribèe. Lheueh djisamböt lé Sinja' Agam Tjoet, landja lé dji-boengka, djidja' oe Poelo Pinang. 'Oh tō' djih oe Poelo Pinang, teuma djimeutoeri ngon doemna sèedaga kaja, kheun Sinja' Agam Tjoet: „Tabé' tóké, tabé' toean!" Djawueub sèedaga: „Tabé' sohbat! Mangkala mari sohbat?" Seu'öt Sinja' Agam Tjoet: „Inilah deungan kapaj njang barō masō' tadi pagi hari." Lom kheun sèedaga: „Sila masō' dō' sohbat bajé'! Nègeuri manakah sohbat ni datang? Barang apakah njang heunda' ditjari?" Seu'öt Sinja' Agam Tjoet: „Kita na' tjari barang rampaj-rampaj, seureuba seudikét; kita moedaj ta' manja', gama'-gama' leubéh koerang ada tiga poelöh riboe reunggét," seureuta djipeuleumah soerat keuteurangan niba' teungkoe sjahbanda poelan.

Ban djikalon meunan lé sèedaga, jōh njan lé djibri hōreumat lom ngon djigaséh silagoëna keu Sinja' Agam Tjoet njan, seureuta djipeutoeri ngon doemna sèedaga njang kaja-kaja. Doedoë niba' njan kheun sèedaga kaja: „Ta' apa sohbat! Beurapa sohbat na' ambé' barang kita bōléh kaséh, djangan takōt kita bōléh bagi, asaj sohbat lén kali sohbat meuniaga sama kita, djoeaj beuli sama kita orang. Lagi kita harab sama sohbat seungala barang oetan: geutah, rotan, dama, pinang, lada, soemboe bada', gadéng gadjah, kajoe gahroe, tjeundana, itoe kita harab seumoeanja sohbat djangan djoeaj sama lén orang!" Teuma seu'öt Sinja' Agam Tjoet: „Njang toe ta' apa soemmapōn, kita bōléh bagi dalam tangan sohbat sini." 'Oh ban djileungo meunan lé sèedaga, jōh

njan lé teusinjom-sinjom, mangat that atédji di sèedaga njan, sabab teuntèe ka meuhát le meuteumeung barang oeteuen doedoë keu djih. Di Sinja' Agam Tjoet njan atra tjit tjeudaih that ba' djimarit bahsa Meulajoe, bahsa Inggréh, bahsa Kléng; taleungokeu djimarit, soedji geureudèt-geureudot keudéh keunoë, taleungo „Èn-na tjaidé? nala tjaidé?"; ladôm taleungo „Nogot" keudéh, „nogot" keunoë; ladôm taleungo djimarit „Nè-nè! Ja-ja"; djimeutalèh-talèh, han tatoepeuepi meung sikrè', salèh peue-peue njang djibitjara njan.

'Oh saré ltheuh djibloë barang nakeu joem lhèe plòh ribèe reunggét; la'én niba' njan lom njang djimeu'oetang barang Poelo, nakeu joem lhèe peuet reutôi ribèe reunggét. Djipeudieng peunoh sarat doea boh kapaj raja, doemna barang njan djipoewoë oe ba' teungkoe sahbanda. Saré trôih oe nanggroë, djiteungoh Sinja' Agam Tjoet njan, djiwoë ladjoe oe ba' tjoet abangdji oe keudè, seureuta djikheun oe ba' aneu' teungkoe sahbanda: „Haj tjoet abang, djeunoë neu'é' droëneu oe la'ôt, neudja' peuteungoh doemna barang geutanjoë!" Teuma djitanjong lé aneu' teungkoe sahbanda: „Padoemna adé, tabloë barang?" Seu'ôt Sinja' Agam Tjoet: „Njan pat bôb léh kira-kira, neukalon keudroëneu, haj Tjoet Abang!" 'Oh ban dji'eu léh kira-kira lé aneu' sahbanda njan, jôh njan lé teukeudjôtdji raja, seureuta djikheun: „Peue doë djipeulakoe Sinja' Agam Tjoet njoë? Ka maté bandoem geutanjoë! Meung barang njang djibloë toenoëpi na lhèe plòh ribèe, teuma la'én lom njang djitanggôh djimeu'oetang na joem lhèe reutôi ribèe reunggét! Ngon peukeu tabajeue? Pat tatjo' reunggét' sidoem-doem nan?"

Jôh njankeu soesah até aneu' sahbanda njan, ladjoe djiseuranta doemna sèedaga njang na lam banda njan, djipoebloë barang njan lam kapaj di la'ôt, seureuta djikheun: „Hoka gata doemna, oereueng keudè ngon geudông? Peue-peue na tameunabsoe barang? Na ba' oelôn, djéh pat djeunoë na lam kapaj di la'ôt. Tapeutrôn sampan, dja' tapeudieng! Tapeuteungoh keunoë oe darat gata bandoem, ta'é' djeunoë oe la'ôt sadjan ngon oelôn!" Ban lami djileungo meunan lé oereueng peukan, jôh njan dji'é' lé oereueng meureutôi-reutôi oe lam kapaj njan, seureuta djipeuteungoh doemna barang njan oe darat. Bandoem djimeutjo'-tjo' ban njang nabsoe droëdji maséng-maséng; nakeu tinggaj barang kira-kira hareuga

lhèe plòh ribèe reunggét treu', njang la'én bandoem ka habéh dji-poebloë di la'ót lé aneu' sahbanda njan keu oereueng meukeudè. 'Oh ka habéh teungoh doemna barang oe darat, teuma teumanjong Sinja' Agam Tjoet oeba' tjoet abangdji, aneu' teungkoe sahbanda: „E dalém lôn, tjoet abang, doemna barang geutanjoë njang la'én, hoka neuba? Njoë njang na lôn kalon barang nakeu hareuga lhèe plòh ribèe, pada haj barang njang lôn poewoë leubèh niba' hareuga lhèe reutôi hèn plòh ribèe! Hoka tjoet abang ba?”

Teuma seu'ót aneu' sahbanda: „Alah, haj adé! Ka oelôn poebloë bandoem jòh di la'ót; njang na tinggaj di geutanjoë, njoëkeu barang oebé joemdji lhèe plòh ribèe reunggét; njang la'én bandoem ka habéh djimeutjo'-tjo' lé oereueng njoë.” Kheun Nja' Agam Tjoet: „Èh, peue doë neupeulakoe di tjoet abang, peue tjit njang tameukat teuma di geutanjoë?” Seu'ót aneu' sahbanda: „Bè' goendah, haj adé' meutoeah! Meung ka habéh barang njoë, kon djeuet tadjà' lom gata oe Poelo Pinang? Njang djeuet lôn poebloë meunan, na mangat reudjang meusapat doemna areuta gob; meung ka meuteumeung hareukat meung batjoet, kon kakeu djeuet?” Lheueh ka habéh lagót doemna meuneukat njan, doedoë niba' njan djikira bandoem pangkaj ngon laba, bandoem habéh djipeusoetji ngon kira-mira; jòh njan djiteumèe hareukat: nakeu kira-kira sireutôi limong plòh ribèe reunggét. Doedoë niba' njan, nakeu kira-kira 'oemoe doea boeleuen lheueng, lom djiboengka Nja' Agam Tjoet njan, djidja' bloë barang oe Poelo, seureuta ngon djidja' bajeue oetangdji ba' sèedaga. Jòh njankeu meuseuhoe nan Sinja' Agam Tjoet njan ba' djeueb-djeueb sèedaga, djipoedjoë, djikheun: „Orang bajé', meuniaga beusa'!” Teuma ba' dja' go njan njanpi lom djipoewoë barang, leubèh le niba' njang dilèe, peunoh sarat peuet boh kapaj raja.

Ban lami trôi hèn lom oe nanggroë, teuma landja lé djipeutrôn sambō', djitrôn Sinja' Agam Tjoet, djiteungoh oe darat, djidja' meuteumèe deungon tjoet abangdji aneu' sahbanda, kheun Sinja' Agam Tjoet: „Djeunoë, tjoet abang, neu'é' droëneu oe la'ót, neuteungoh keunoë oe darat doemna barang geutanjoë, peunoh sarat peuet boh kapaj!” Seu'ót aneu' sahbanda seureuta djitanjong: „Padoem na hareuga tabloë barang di Poelo?” Seu'ót Sinja' Agam Tjoet: „Peue tjoet abang tanjong? Njan pat

bōb léh kira-kira; bandoem djeuet tjoet abang kalon keudroë.”

Ban djikalon léh kira-kira lé aneu' sahbanda, jōh njan lé dji-moetjab, djikheun: „La hola wa la /koeata! Ka tjilaka geutanjoë! Peue djipeulakoe di Sinja' Agam Tjoet njoë? Peue djikeumeung poematé oelōn ngon ajah?” Jōh njan lé djiploeeng oeba' ajahdji teungkoe sahbanda, seureuta djipeugah: „Peue doë lakoe, haj ajah! Sinja' Agam Tjoet lom ka djimoeboeet leubèh niba' oeroë djéh, njoë djeunoë leubèh lom le djibloë barang, 'oh é' sarat peuet boh kapaj raja! Peue djipeulakoe?” Ban djikalon léh kira-kira lé sahbanda, jōh njankeu meu'asé'-asé' oelèedji, seureuta djimoe-tjab: „Sōbeuhanalah, ka maté geutanjoë, haj aneu' po! Pat ta-tjo' reunggét sidoem-doem noë le?”

Teuma neutubiet lé teungkoe sahbanda njan keudroëneu oe peukan, jōh njankeu djiseuranta doemna sèedaga, djipoebloë doemna barang njan di la'ôt. Njang na tinggaj njankeu sagaj oebé joemdji sireutōih nam plōh ribèe, la'én niba' njan bandoem ka djipoebloë keu gob. Ba' go njan leubèh le djiteumèe laba, nakeu kira-kira lhèe reutōih ribèe reunggét; ba' masa njankeu makén leubèh djigaséh lé teungkoe sahbanda keu Sinja' Agam Tjoet. Teuma 'oh lheuëh djipeusapat doemna reunggét, laba ngon pang-kaj, lom djiboengka Sinja' Agam Tjoet, dja' oe Poelo; njanpi teuma lom djipoewoë barang, leubèh le niba' dilèe.

Doedoë niba' njan teuma leumah teusréh lam até teungkoe sahbanda: „Sinja' Agam Tjoet njoë gètkeu koepewawén ngon Sinja' Tjoet, aneu' droëkoe; koetoeeng djih keu meulintèe oelōn, soepaja doemna areuta njoë hana moeweue' oe loea keu gob la'-én”. Teuma nakeu antara padoem oeroë lheueng, landja lé dji-peukawén Sinja' Agam Tjoet ngon aneu' droëdji njang inong, nan-dji Tjoet Moerinin, lom ngon roepadji di aneu' njan djroh sileu-paihna; teutapi tjit meung gatib mantong, hana djipeulahé dji-meukeureudja, lompì hana djipeuthèe oeba' waréh kawōm oereueng lingka.

Padoem lawét Sinja' Agam Tjoet njan djidoe' di sinan, djeuet keu meulintèe teungkoe sahbanda, ba' si'oeroë Sinja' Agam Tjoet lakèe idin ba' ajahdji, nan teungkoe sahbanda. Djidja' njan oeba' neumat la'én, ba' saboh teumpat banda ramè, djimè reunggét ngon-ngon blandja dja' di rèt tjit sireutōih siplōh boh sagaj; la'én niba' njan lom ngon saboh boengkōih ranoeb moeboh roe meuih, seu-



reuta ngon alat sinjata: saboh peudeueng meutampō', lom ngon saboh kréh meusarōngan. Ban lami trōih keunan, di Sinja' Agam Tjoet njan ladjoe lé sigra djimita inong gasien njang meuseukin that. Doedoë niba' njan teuma meuteumée sidroë inong, areutadji meung sineu'pi tan. Kheun Sinja' Agam Tjoet ba' inong njan: „Haj tjoet da, neubri idin keu oelōntoean, lōntoean keumeung siwa djoe-rèe niba' droëneu.” Seu'ōt inong gasien njan: „Di lōntoean na saboh djoerèe mantong, sabab roemoh lōn roemoh oebit lom ngon brō' that; di oelōntoean hana sapeue pi na, meuseukin that, teutapi meungnjo djeuet ba' droëneu njan djeuet ba' lōn, djeuet geutanjoë éh bandoea dalam saboh djoerèe mantong”. Kheun Sinja' Agam Tjoet: „Meunan di lōnpi djeuet tjit”. Landja lé djidoe' teutab lam roemoh inong njan. Djeueb-djeueb oeroë djibri lé Sinja' Agam Tjoet siplōh reunggét ba' inong gasien njan; reunggét njan ka djeuet keu siwa.

Wa'tèe dji'éh malam Sinja' Agam Tjoet sinan, tjit sidroëdji sa-gaj dalam keuleumboe njan, ban siseun lingka binèh keuleumboe njan bandoem djigeuntèn lé Sinja' Agam Tjoet; di inong njan tinggaj sidroë éh di loea keuleumboe, amankeu teutab sinan dji'éh di loea keuleumboe Sinja' Agam Tjoet éh, djidjaga sinan sabé djeueb-djeueb malam tō' 'an beungoh.

'Oh ban saré beungoh oeroë, beudoih Sinja' Agam Tjoet njan, ditjo' toengkat saboh, ladjoe djileupè', djipoh sigo oeba' boh poeng-gōng inong njan; meunankeu sabé djipoeboeet lé Sinja' Agam Tjoet keu inong njan. Di inong njan oeroë malam sabé djih lam teupiké ngon soesah atédji, keureuna hana djitoe'oh poephōm, djikheun lam atédji: „Peue salèh meukeusoet geupoeboeet meunan?” Lom dji'ingat dalam até droëdji: „Pakon meunoë geupeulakoe di gob njoë keu oelōn? Peue sabab salèh djeuet keu meunoë? Salèh peue gob njoë? Hantom na koeteumée agam njang moemeunoë, sibagoë gob njoë wa'tèe beungoh ban soeboh geubeudoih ba' geu'éh, landja lé geupoh oelōn ngon toengkat sigo oeba' boh poenggōng oelōn. Gob njoë peue salèh njang geumeukeusoet geupoeboeet meunoë ban?”

Teuma doedoë niba' njan 'oh saré trōih ba' siplōh oeroë, kakeu habéh reunggét sireutōih neu', bandoem ka djibri keu inong njan. Teuma kheun Sinja' Agam Tjoet: „Djeunoë, tjoet da, oelōn ka habéh blandja; reunggét njang oelōn dilèe si'at, lōn dja' tjo' pang-



kaj keu siwa djoerée. Harab lôn ba'le gaséh sajang gata keu oelôn, bè' taloepe bitpi lôn woë; na tjit lôn tinggaj sinoë ba' gata geunantoë badan oelôn: peudeueng meutampō' saboh, kréh meusarōngan saboh, boengkōih ranoeb seureuta alatdji moeboh roe meuih ban peuet poentja. Lheueh djipeudjō' bandoem alat njan oe ba' inong njan, landja lé djitrôn Sinja' Agam Tjoet di sinan, djipeuteupat woë meudarat oe roemoh poeroemoh droëdji, ba' teumpat teungkoe sahbanda.

'Oh ban saré tō' oe ba' sikhān rêt, teukeudirōlah rōh meuteumèe ngon sidroë inong Abeusi. Jōh njankeu teupiké lam até Sinja' Agam Tjoet: „Gètkeu oelôn drob inong njoë di sinoë; moedahmoedahan ngon sabab inong Abeusi njoëkeu é trōih ban meukeusoet oelôn". Lheueh teupiké meunan, landja djiwa lé, djidrob inong gob, njang teungoh dja' keudroë, lé Sinja' Agam Tjoet njan. Jōh njankeu teukeudjōt inong Abeusi njan seureuta ngon djimeulawan lagèe raja, lom ngon djikli', djimeuhej bantoe, djikheun: „Toelōng, haj toelōng! tatoelōng lôn! Njoë oereueng poengo, ka djiwa lôn! Lôn njoë ka djidrob lé si tjilaka, lôn dji keumeung taki di rêt raja, lôn djipoemalèe lé si tjilaka njoë! Haj toelōng, tatoelōng lôn njoë ba' reudjang!"

Teuma teuka lé keunan mata-mata, sadjan-sadjan ngon djamada, djidrob Sinja' Agam Tjoet ngon inong Abeusi njan; adat dalam nanggroë njan, tjit pantang raja oereueng wa inong di teungoh rêt raja. Saré lheueh dji'ikat, ladjoe djiba oe ba' hakim nanggroë njan. 'Oh tō' djiba oe ba' hakim lé djamada, ladjoe lé geuparé'sa ba' Sinja' Agam Tjoet, kheun hakim geutanjong: „Haj bit di gata, na talho inong njoë di rêt raja?" Seu'ōt Sinja' Agam Tjoet: „Inong njoë na oelōntoean lho." Lom kheun hakim: „Peue gata salèh na djilhab poengo aneu' boeleuen?" Seu'ōt Sinja' Agam Tjoet: „Oelōntoean, phōn niba' éndatoe tō' 'an ba' lôn, niphōn tjoetkon tō' 'an djeunoë, hana tom na meurimbaih teuka peunjakét poengo! Pakri bah djeuet droëneu kheun lôn poengo?" Lom kheun hakim: „Kah njoë tjit njo poengo! Ada' kah kon poengo, pakon tjit kadrob poeroemoh gob di teungoh rêt?" Seu'ōt Sinja' Agam Tjoet: „Pakri lôn bah, ada' kakeu rōh ba' oelōntoean drob? Djeunoë hana peue, djeuet lôn neuhoekōm lé droëneu! Ban njang laja', ban njang atōran hoekōm ba' teungkoe, tjit oelōntoean teurimong, tan na da'wa; teutapi oelōntoean lakèe dilèe niba' teung-

koe ampôn disinoë peuneusan amanat oelöntoean, bè' han ba' neu-peutō' dilèe oebea' peuet pat. Lheueh njan barō djeuet neupeulakoe ban njang meukeusoet niba' hoekōm droëneu!"

Seu'ōt niba' hakim njan: „Bōh hana peue, kapeugah ba' kamoë djeuet kamoë joe peutō' ban amanat kah." Lheueh njan trōn lé hoekōm niba' hakim oe ateueh Sinja' Agam Tjoet njan, hoekōm geujoe poh maté. Teuma lé geujoe mè sidjih njan oebea' Panté Kroeeng Mirah, hoekōm teupang geulho lam krōeeng raja; seureuta jōh njan lé bandoem ka sieb alat, asé teupang, srampang ngon tjeukam. Bandoem oereueng kirōh raja, ramé ra'jat deumpé' soera' meusé taga, na sang oereueng njang keumeung poh moesōh madoe radja.

Jōh njan lé teuma marit Sinja' Agam Tjoet, seureuta ngon dji-beu'oet djaroë oebea' hakim: „Hoka teungkoe doemna? Ada' neukeumeung poh oelöntoean njoë, nan djeuet han neupeutō' ban amanat oelöntoean njoë dilèe oebea' peuet pat; lheueh njan teuma barō djeuet neupoh oelöntoean maté! Meung gohlom moebalah narit niba' peuet boh teupat njan, hana harōih lom oelöntoean njoë neupoh maté; doedoë teuma djeuetkeu teukeusé di ateueh droëneu doemna." Teuma seu'ōt hakim nanggroë: „Peue amanat kah? Kapeugah ba' reudjang!" Seu'ōt Sinja' Agam Tjoet: „Teungkoe ampôn, gaséh sajang droëneu doemna keu oelöntoean oereueng maté! Djeunoë ba' neubri haba oebea' Soelōtan Radja Djalé, neupeugah keudéh narit niba' oelōn njang nan Sinja' Agam Tjoet, njang keumeung bōh ma'na loempoë Toeankoe. Djeunoë djih njan na di gampōng poelan neumat ano; djeunoë djih njan geumeung poh maté, salahdji sabab djilho inong gob di rèt raja; djeunoë ba' reudjang lé Toeankoe toelōng, neulakèe ba' hakim njan bè' geupoh maté; meung ka maté djih njan, meuhat hana soë lé peugah ta'bi loempoë Toeankoe."

Ban hakim leungo meunan haba, jōh njan lé geubri saboh soerat oebé haba neulakèe niba' Sinja' Agam Tjoet, seureuta ngon geujoe sidroë oereueng njang meuteuntèe dja' ba' radja. Saré tō' oereueng njan djidja' keunan ba' Radja Djalé, lheueh djidèelat ngon djipeudjō' soerat, djipeugah lé oebea' radja njan oebé ban njang amanat peuneusan niba' hakim nanggroë, ban njang haba niba' Sinja' Agam Tjoet. 'Oh geuleungo seumah meunan djipeugah, djaweueb lé sabda niba' radja: „Hana nan Sinja' Agam Tjoet

njang keumeung bōh ma'na loempoë oelōn, malingkan goerëe peuet! Gèt djeunoë tariwang keudéh ba' pantaih, tajoe poh landja sidjih njan ba' maté! Pakon gala' djilho inong gob? Bahkeu djirasa di si aneu' sōm njan!"

'Oh djileungo meunan sabda radja, teuma di oereueng njanpi landja djiriwang woë oeba' hakim ngon djibri thèe oeba' Sinja' Agam Tjoet, djipeugah ladjoe ban njang sabda niba' soelōtan. Teuma seu'ōt niba' Sinja' Agam Tjoet seureuta djikheun: „Meung njo ka meunan neukheun sabda niba' radja kakeu, ka djimeu'oengki tan, pakri lōn bah? Ba' bè'dji Alah bri! Djeunoë lom oelōn-toean lakèe ba' Teungkoe hakim, ba' neupeutō' ban amanat njang keudoea. Haj rakan meutoeah, tadjā' gata djeunoë reudjang keudéh oeba' goerëe oelōn, nan-geu teungkoe siah Poelan. Lompi di sinan na keuneubah oelōn ba' gob njan: saboh boengkōih ra-noeb soetra, moebōh roe meuih ban peuet poentja; la'én niba' njan na saboh peudeueng meutampō', lom na saboh kréh bie' meusarōngan seureuta ngon reunggét limong reutōih boh. Takheun ba' gob njan narit niba' oelōn, ba' le gaséh sajang gobnjan keu oelōn, ba' reudjang geutoelōng oelōn, ba' geulakèe lōn lé gob njan oeba' hakim, bè' geupoh maté; dèesa oelōn hana la'én sabab oelōn lho inong gob di rèt raja, boet njan djeuet ngon geuteubōih!"

Ban hakim leungo meunan peuneusan amanat, jōh njan lé geujoe dja' lom oereueng boenoë. Ban lami tō' djidja' oeba' teungkoe siah, teuma habéh doempue djipeugah ban amanat niba' Sinja' Agam Tjoet. Ban saré geuleungo lé teungkoe siah meunan peuneusan amanat, jōh njan lé geuseu'ōt seureuta ngon geupeuteukho' droëgeu, geukheun: „Hana Sinja' Agam Tjoet djibeuet di sinoë ba' oelōn; lompi hana djikeubah peudeueng, kréhpi hana, boengkōihpi tan, tan na djikeubah reunggét ba' oelōn. Ka djimeu-dèetjha, tajoe pohdji ba' maté! Pakon gala' djipeulakoe meunan boet ba' inong gob?" Ban djileungo teungkoe siah kheun meunan naritgeu, teuma di oereueng njanpi djibeudoih lé, djiwoë ngon pantaih oeba' hakim ngon ba' Sinja' Agam Tjoet. Jōh njan lé habéh djipeugah ban njang geukheun lé teungkoe siah njan, seureuta ngon djikheun lé oereueng njang dja' njan: „Bit njo gata Nja' Agam Tjoet! Tapoepajah oelōn, ka doea ho dja' tan na sapeue pa'idah; djeunoë hana koetém dja' lé! Bandoem narit gata boeha'

ngon brakah, njang tan djeuet tapeuna." Lom seu'öt Sinja' Agam Tjoet: „Teungkoe ampôn, oelöntoean hana boeha', hana brakah. Ban njang oelöntoean peugah njoë, doem sabét na; ka geukheun tan lé oelama, pakri tabah? Doedoë tjit geurasa keudroëgeu."

Lheueh njan lom neulakée niba' Sinja' Agam Tjoet: „Djeunoëpi lom ba' le gaséh sajang teungkoe doemna keu kamoë oereueng maté, bè' djeuet teukeusé di ateueh droëneu doemna ba' oeroë doedoë! bè' han neudja' oeba' ajah oelöntoean, lompì gob njan tha di oelöntoean, teungkoe sahbanda Ano di Banda Poelan. Ba' takheun oeba' gob njan peuneusan haba amanat niba' oelôn njang aneu' meulintée gob njan, nan Sinja' Agam Tjoet, ba' le gaséh sajang gob njan keu lôn, njang ka geuböh hoekôm salah maté lé hakim, sabab oelôn lho inong gob di rèt raja. Ka teukeudi, pakri lôn bah? Djeunoë ba' reudjang geutoelông oelôn lé gob njan njang ajah dan tha di oelôn; ba' geulakée lé gob njan niba' hakim ngon geuteuböih, bè' djan geupoh maté oelôn! Doedoë teuma hana goena lé; meung han, salèh djeuet keu seusaj ba' oeroë doedoë! Gètkeu djeunoë ba' reudjang geudja' teuböih; lompì di sinan ka na areuta hareukat droë lôn keudroë, leubèh niba' doea lhèe reutöih ribèe reunggét. Bè' han! Meunan takheun ba' gob njan, bè' han ba' le gaséh ngon sajang niba' gob njan keu oelöntoean njoë sidroë!"

Ban geuleungo djikheun meunan lé Sinja' Agam Tjoet njan, teuma lom hakim joeé dja' oereueng ba' teumpat toempō' sahbanda njan. 'Oh ban tō' keunan, ladjoe djipeugah lé ban njang peuneusan amanat niba' Sinja' Agam Tjoet. Jōh njan lé di teungkoe sahbanda njan, djipoera-poera peuteukho' droëdji seureuta djikheun: „Hana sagaj oelôn toeri njang tapeugah njan lé gata njang nan Sinja' Agam Tjoet; lompì hana oelôn peukawén aneu' oelôn ngon baranggasoë! Djeuet taparé'sa ba' oereueng lingka! Padjan na tom oelôn meukeureudja? Soë nan aneu' njang oelôn peukawén? Keu haj oereueng njang meudèetjha njan, tajoeé pohdji ba' maté! Ban njang laja' hoekôm ba' hakim, bahkeu geupeulakoe! Hana pseudoeli niba' oelôn sinoë. Pakon doesoëdji gala' djipoeboeet boeet badjeueng? Bahkeu djirasa geutjeukie'dji dalam kroeng!" Ban djileungo meunan narit niba' sahbanda njan, ladjoe djiriwang lé tadjam di oereueng njan oeba' hakim ngon ba' Sinja' Agam Tjoet. Oebé narit niba' teungkoe sahbanda bandoem njan habéh

djipeugah. Ban geuleungo meunan, teuma lom seu'öt Sinja' Agam Tjoet: „Ka geukheun tan kakeu! Meung bè' teukeusé ba' oeroë doedoë, oeroë doedoë tjit geurasa keudroëgeu maséng-maséng.” Di oereueng njang dja' njanpi makén moepôt-pôt, djikheun: „Peudoë djipeulakoe di sidjih njoë! Doempue narit sidjih njoë hana oebah ban oereueng poengo.” Teuma lom lakèe Sinja' Agam Tjoet: „Teungkoe ampôn, njang keubit oelöntoean njoë kon poengo. Djeunoë sigo treu' ba' raja seuleu'ah niba' droëneu doemna keu oelôn oereueng maté, atra tjit neuthèe oelôn njoë oereueng ka maté, bè' djeuet keu teukeusé ba' oeroë doedoë di ateueh droëneu njoë doemna! Djeunoë bè' han neujoee dja' oereueng oeba' roemoh inong gasien ano, nandji Sipoelénti, hana that djara' niba' teumpat njoë, toë di dalam banda njoë; oeba' djih njan na keuneubah oelôn: saboh peudeueng oelée meutampō', saboh kréh meusarōngan, lom ngon saboh boengkōih ranoeb ngon alatdji moeboh roe meuih. Neupeugah ba' djih njan, ba' raja gaséh sajang djih keu oelôn, neujoee kheun narit oelôn: „Djeunoë oelôn, nan Sinja' Agam Tjoet, ba' reudjang djitjo' lé djih dalam djaroë hakim ngon djiteubōih, djeunoë lé ba' reudjang djiteuka; dèetjha oelôn geuda'wa, lôn lho inong Abeusi di rèt raja, njankeu sagaj dèetjha oelôn, djeunoë teungoh geumeung poh maté lé hakim.”

Teuma seu'öt hakim: „Salèh kah njoë katipèe kamoë? Ka pa-doem go sabé kapoepajah gob? Seu'öt Sinja' Agam Tjoet: „Keu pajah teungkoe ampôn seureuta ngon rakanneu njan, tjit boet patôt, boet oereueng mat hoekôm. Teuma di oelôn njawong lôn loepôt; pakriku han mée teungkoe kira? Bandoem boet hoekôm, meuhat ngon paré'sa; meung han meunan, han sah gob neuplôn njawongdji. Meuhat ba' na ngon paré'sa ateueh sidroë-droë oereueng njang geuda'wa djimeudèetjha!” Ban hakim leungo meunan haba seureuta geukheun: „Bit po njoë kon oereueng poengo! Meung njo meunan, dja', haj rakan, sigo treu' kapeugah ba' inong njan; meung njo hana ban djih peugah njan, sidjih njoë kapoh ba' maté. Djeunoë kèe koeriwang dilée oeba' balè moehakamah; peue-peue haba ba' reudjang kabri thèe oeba' kamoë, sabab di sidéh le that la'én mantong hoekôm njang goh poetōih.” Ban dji-leungo meunan di oereueng njan, teuma landja lé djidja' bri thèe ceba' inong Sipoelénti; di hakim njanpi djiriwang oeba' balé teum-pat meuhokôm.



Ban saré trôih oereueng njan oebea' inong gasien njan, djipeugah lé jôh njan bandoem, ban njang amanat peuneusan niba' Sinja' Agam Tjoet. 'Oh saré djileungo meunan lé inong njan, jôh njan lé djikheun: „Sinja' Agam Tjoet njan hana djikeubah sapeue ba' oelôn; teutapi ba' tapeugah keudéh ba' hakim: „Sinja' Agam Tjoet njan bè' tabri geupoh! Lom ba' geuthèe keureuna sidjih njan na djimeu'oetang niba' oelôn, lhèe plôh ribèe reunggét, keu pangkaj djidja' meuniaga oe Poelo Pinang; meungnjo maté Sinja' Agam Tjoet njan, wadjéb teungkoe hakim keudroë bajeue bandoem areuta oelôn njan, ban lhèe plôh ribèe reunggét toenoë! Meung han meunan, bè' geupoh, tajoe prèh dilèe, tjit tō' oelôn oebea' gob njan.” 'Oh ban djileungo meunan peuneugah niba' inong njan, teuma di oereueng njanpi landja lé djiriwang, djidja' bri thèe oebea' hakim.

Jôh njan lé teuma beudoih inong gasien njan djimeukeumaih, djingoej ngon alat sinjata ban oereueng lakoë, djisandang peudeueng djilhat ngon kréh, mat peurisë di djaroë, ladjoé lé djiploeeng bagaih oebea' binèh Kroeeng Mirah ba' teupat njang geumeung poh maté Sinja' Agam Tjoet. Ban saré tō' inong njan keunan, seureuta djikheun oebea' oereueng njang na sinan: „Haj soerôt bandoem gata, han djeuet tapoh sidjih njoë lé gata doemna, sabab sidjih njoë na djimeu'oetang ba' lôn, lhèe plôh ribèe reunggét. Meung maté djih njoë, meuhak koetoentoet oe ateueh doemna gata njoë; lompi taleungo koekheun, hana koepatéh! Doem roepa Sinja' Agam Tjoet njoë djidja' gala' keu inong Abeusi djilho di rèt raja, salang ngon oelôn inong gasien njang gèt roepa, koemeunabsoe keu djih, han tjit djipoeboet boet njang badjeueng njan. Toh sa'si di inong Abeusi njan? Njang ba' piké oelôn, tjit inong Abeusi njan njang drob Sinja' Agam Tjoet njoë.”

Ban geuleungo djikheun meunan lé inong njan, teuma doemna oereueng njang na di sinan, habéh djisoerôt, seureuta ngon teuhah babahdji, hana djitoepeue djaweueb sapeue lé. Jôh njan-keu djiloempat inong njan keunan, landja lé djikoh doemna taloë njang ka teu'ikat ba' badan Sinja' Agam Tjoet, seureuta djidjō' lé peudeueng oebea' djaroë Nja' Agam Tjoet. Jôh njan lé teuma Nja' Agam Tjoet poera katja' tjang doemna oereueng njang keumeung lho djih lam kroeeng, doea-doeadji sadjan inong gasien



njan; jöh njankeu teukeudjöt doemna oereueng njan, habéh teu-reuban djiploeeng ban sineuna.

Doedoë niba' njan beudoih Sinja' Agam Tjoet, bandoeadji ngon inong meuseukin njan, ladjoe djiwoë lé oebea' ajahdji goerée peuet. Ban saré trôih keunan, landja djitamong oe lam koeta, seureuta ngon djibôt djaroe: „Ampôn teungkoe njang ajah kamoë, ban njang hadjat radja ka Toehan bri sampoë ngon sabab ékeutijeue oelöntoean.” Lheueh djikheun njan, teuma ladjoe djidja' seumah seureuta ngon djitjôm niba' teu'öt. Jöh njan seu'öt lé goerée peuet: „Aleuhamdœ lélah! Ba' meutoeah, ba' neubri leupaih lé Alah ta-'ala niba' sigalana mara baja, dönja akhirat ba' seulamat!” Lom seu'öt Sinja' Agam Tjoet: „Ngon apoeah ajah doemna, simata-mata Toehan karônja neupeuleumah oebea' oelôn hambaneu njang la'èh; niba' njankeu bè' lé ajah goendah! Éntja' Alah, djeuet oelöntoean bôh ban ta'bi njan di keue radja, droëneu doemna djeuet keu sa'si; sa'si njang la'én njang hana disinoë, njan djeuet doedoë tajoe panggé ba' radja. Bitpi meunan, oelôn lakée ba' ajah: 'Oh lheueh lôn bôh ma'na loempoë njan, landja lé radja njan ba' neupoh maté! Djeunoë droëneu doemna njang ajah oelôn ba' sieb alat sinjata, bandoem ra'jat ba' na toemba' ngon beudé, sikin panjang, peudeueng, kliwang, kira-kira peuet plôh ribèe oereueng, mangat tatamong doem oe dalam, na lôn dja' bôh ma'na ta'bi loempoë radja raja njan.”

Teuma seu'öt niba' goerée peuet: „Meung ka patôt niba' hoe-kôm ngon 'adat, ba' kamoë bandoem meuhat seureuta.” Jöh njan lé geukrah doemna ra'jat lé teungkoe goerée peuet, peudahna meuntroë Radja Djalé; ba' masa njankeu habéh djitrôn doemna oelèebalang ngon peutoea ra'jat, ka peunoh seuleusa' oe dalam koeta teungkoe meuntroë goerée peuet. 'Oh ka meuhimpôn bandoem, teuma geumeudoe' geumoepakat sabé oelèebalang. Doedoë niba' njan barô geutamong bandoem oebea' radja. Ban saré tō' oe dalam, jöh njan lé geubôt djaroe seureuta ngon geudèelat, lheueh njan seumah goerée peuet oebea' radja: „Dèelat ampôn Toeankoe, djeunoë Toeankoe Ampôn ka Alah bri seulamat! Sinja' Agam Tjoet ka tō' tanggôh keumeung bôh ma'na loempoë dèelat Toeankoe; ngon toelông Toehan Malikôn Rahman ka trôih djiwoë keunoë oebea' Toeankoe; oebé ma'na loempoë Toeankoe, kakeu lahé! Kamoë keumeung poebeuna bandoem keudroe mantong

njan hana djeuet, meuhat ba'na sa'si lom njang la'én; sabab Sinja' Agam Tjoet njoë djih ka kamoë toeeng keu aneu' seuboet: doemna boeet kamoë, djih njang toentoet. Djeunoë njang lakèe Sinja' Agam Tjoet, ba' ladém Toeankoe ampôn meuhej keunoë oereueng doea droë: teungkoe siah Marôlah lam toempô' neumat ano, lom ngon teungkoe sahbanda Po Poetéh lam banda poelan!"

Ban Radja Djalé leungo meunan seumah niba' goerèe peuet, teuma trôn lé sabda radja oeba' boedjang: „Djeunoë gata, hé boedjang, ba' reudjang lé djeunoë tatoeng keunoë keu kamoë teungkoe siah toempô' poelan, lom ngon sahbanda lam banda poelén; ba' sigra lé oeroë njoë tajoe teuka, keureuna boeet peureulèe raja. Doemna oereueng njang la'én tjit ka halé; meung njang geuprèh tō' tjit meung droëneu doea, sabab na saboh boeet raja njang that meuseuké; meung hana gob njan doea droë, njeum hana é' poetôih! Meunan takheun sabda niba' kamoë Soelôtan oeba' oereueng doea droë njan." Teuma beudoih lé boedjang doea droë, jōh njankeu djidja' ba sabda radja, seureuta ngon ra'jat iréng doea lhèe plōh droë ngon alat sinjata njang geubri lé teungkoe peudahna meuntroë goerèe peuet keu ngon boedjang radja njan. Hana padoem lawét djidja', tō' lé ba' teungkoe siah ngon oeba' sahbanda. Ban njang sabda niba' Soelôtan bandoem habéh djipeugah, lom ngon djibri thèe peue njang ka halé. Teuma doedoë niba' njan di oereueng doea droë njanpi maséng-maséng na geuba rakan droëgeu, djiseutèt di likôt lé moerit ngon sèedaga; teuma trôih lé teungkoe siah ngon sahbanda oeba' radja raja.

'Oh ka sieb halé bandoem keunan ba' radja, lheueh njan teuma seumah niba' Sinja' Agam Tjoet seureuta djimarit ngon djibôt djaroe, djikheun oeba' radja: „Dèelat ampôn, oelöntoean namiet, sipada harab, teungkoe siah bahlé ba' neudong di oeneun Soelôtan, di teungkoe sahbanda bahlé ba' neudong di wie Soelôtan; sabab droëneu doea njan, njang poebeuna ta'bi loempoë Soelôtan. Entja' Alah ta'ala, djeunoëkeu oelöntoean bōh ma'na ta'bi loempoë Toeankoe ampôn, ngon idin Alah seureuta ngon doemna Rasoej dan deungon idin niba' kawōih Poteu radja."

Teuma seu'ôt sabda niba' radja seureuta ngon niba' goerèe peuet dan niba' teungkoe siah ngon sahbanda. Jōh njan sabda radja: „Hana peue, djeuet djeunoë tapeugah lé gata, idin niba' oelôn seureuta ngon ba' doemna njang halé di sinoë. Tjit njankeu njang

oelôn meunabsoe, gatakeu bôh ma'na loempoë kamoë!" Ban dji-leungo sabda meunan lé Sinja' Agam Tjoet, seureuta ngon djidèe-lat radja, djikheun: „Éntja Alah ta'ala, Toeankoe ampôn! Jôh oeroë djéh dilèe seureuta ngon di keue goerèe peuet, kon njo oelôntoean njoë njang meudjandji keumeung bôh ma'na loempoë Toeankoe ampôn? Lom kon ngon seureuta na neukarônja keu oelôntoean: saboh kréh meusarōngan lom ngon saboh peudeueng neutampō', ngon saboh boengkōih ranoeb moeboh roe meuih, seureuta ngon reunggét limong reutōih neu'? Djeunoë ba' Toeankoe ampôn peutrang di keue halaja' njang na, na atawa tan?" Teuma seu'ôt sabda radja: „Njang alat njan bandoem tjit beuneuri oelôn ba' djaroe gata, djandji bôh ta'bi loempoë oelôn."

Lom djipeu'e' seumah ba' radja lé Sinja' Agam Tjoet: „Oeroë djéh kon na trôih keunoë ba' Toeankoe ampôn sidroe oereueng niba' hakim poelan, nandji Sipoelén, oelôntoean joe bri thèe keunoë ba' Toeankoe keu haj droë oelôntoean njang nan Sinja' Agam Tjoet, oereueng njang keumeung bôh ma'na loempoë Toeankoe Ampôn, djeunoë teungoh geumeung poh maté ba' panté Kroeeng Mirah, sabab djilho inong Abeusi di rèt raja, ba' reudjang Toeankoe toelōng bè' djan geupoh maté? Teuma pakri tjit djeuet Toeankoe ampôn kheun ba' oereueng njan hana neutoeri, lompï neukheun: Hana oereueng njang keumeung bôh ma'na loempoë oelôn, malingkan tjit meung goerèe peuet?"

Teuma seu'ôt sabda Soelôtan: „Njan oelôn toewo!" Teuma djaweueb lé niba' Sinja' Agam Tjoet: „Meung njo meunan Toeankoe ampôn, njankeu, haj Toeankoe, ta'bi loempoë radja keubeue!" Lom djimeutoetô Sinja' Agam Tjoet djihadab ba' goerèedji teungkoe siah: „Djeunoë, éntja' Alah, hoka droëneu teungkoe siah, njang goerèe oereueng doemna seureuta goerèe di oelôntoean? Kon na oelôntoean meugoerèe dilèe oeba' teungkoe? Lom kon na oelôntoean keubah amanat oeba' teungkoe: saboh kréh meusarōngan ngon saboh peudeueng neutampō', lom ngon saboh boengkōih ranoeb ngon-ngon alatladi moeboh roe meuih, seureuta ngon reunggét limong reutōih neu', bandoem areuta njan beuneuri niba' Soelôtan keu oelôntoean, njang ka oelôntoean keubah ba' teungkoe? Djeunoë ba' neukheun ngon neupeugah, na atawa tan? Bè' han teungkoe siah peugah jôh na di keue Soelôtan!" Jôh njan lé seu'ôt teungkoe siah njan: „Njang takheun njan, bandoem

na!" Teuma lom djitanjong lé Sinja' Agam Tjoet: „Oeroë djéh kon na trôih Po Ma' Sôm oeba' teungkoe? Kon na djimè amanat peuneusan niba' oelöntoean oeba' teungkoe? Lôn joe peugah, lôn njoë geumeung poh maté lé hakim ba' panté Mirah, sabab dèetjha lôn lho inong; teuma pakri tjit teungkoe kheun hana neutoeri, lompï neukheun hana oelôn njoë beuet oeba' droëneu, seureuta ngon neukheun hana keuneubah oelôn oeba' droëneu? Pakri njang djeuet keu meunan? Djeunoë ba' teungkoe peugah, jôh massa na di hadapan Poteu radja!" Teuma seu'ôt teungkoe siah njan: „Alah, njan, Po Nja', lôn njoë batjoet na loepa! Keureuna kon meung gata mantong njang teumeutrôh ba' lôn, di gob la'én doempi meunan tjit! Njankeu djeuet oelôn loepa." Jôh njan seu'ôt lé Sinja' Agam Tjoet: „Meung njo meunan neukheun lé teungkoe, njankeu ta'bi loempoë Toeankoe radja, teungkoe oelama djeuet keu keuleudë; djitoepeue na, djipakoë tan."

Ba' masa geupeugah bôh ma'na ta'bi loempoë radja njan, doemna ra'jat moeplôh ribèe hana sidroë njang na meutoetô, bandoem teu'iem mantong hana marit sapeue; malingkan njang marit tjit meung Sinja' Agam Tjoet sidroë mantong njang meutoetô, la'én bandoem tahe, doemna teungkoe oelama toendô' oelëe. Teuma lom djimarit Sinja' Agam Tjoet: „Hoka droëneu teungkoe sahbanda, njang ajah oelôn dan tha di oelôn? Djeunoë ba' neupeugah! Kon na neutoeeng oelôn njoë oeroë djéh keu aneu' seuboet droë? Lom kon na ngon oelöntoean hareukat niba' droëneu? Lompï kon na oelôn meulajeue oe Poelo Pinang seureuta ngon neubri soerat droëneu njoë keu oelöntoean, oelôn dja' bloë barang meuneukat? Dalam njan kon na lôn teumëe hareukat leubèh niba' lhèe reutôih ribèe reunggét? Doedoë niba' njan neupeukawén oelôn ngon aneu' inong droëneu njang nandji Tjoet Moerimon? Djeunoë neukheun ba' teupat, na hana ba' meuteuntëe, jôh na di keue Poteu radja ngon di hadapan sigala halaja' njang le!"

Teuma djaweueb lé niba' teungkoe sahbanda njan: „Njang takheun njan sabét! Na oelôn toeeng gata keu aneu' seuboet oelôn, na tahareukat, na lôn peukawén gata ngon aneu' oelôn njang nan Siti Tjoet Moerimon, aneu' toelôt njang di oelôn." Teuma lom djimarit Sinja' Agam Tjoet, djitanjong oeba' sahbanda: „Ada' ka meunan, jôh oeroë djéh kon na peuneusan amanat oelöntoean ba' Sipoelan, oelôn joe peutô' oeba' droëneu: „Lôn njoë ka keu-

nong hoekōm maté, salah djèetjha lōn lho inong gob, na djeunoë di panté poelén; ba' reudjeung neudja' lakèe ba' Hakim, bè' djan geupoh maté!" teuma pakri tjit djeuet neukheun ba' oereueng njan: „Hana aneu' lōn toeeng, hana reunggét hareukat, hana oelōn toeeng keu meulintèe oelōn; ba' bandoem oereueng lingka djeuet taparé'sa! Pakon han tatanjong; padjan na tom lōn meukeureudja? Gèt tapohdji landja djih njan ba' maté!" Njankeu djeunoë djeuet hireuen that oelōntoean njoë. Pakriban djeuet keu meunan, djeunoë ba' neupeugah!" Teuma seu'öt sahbanda: „Njan, aneu', oelōn na batjoet silab; sabab soesah lagoëna teungoh keumira, le that boet silawét tan gata di nanggroë!" Teuma seu'öt Sinja' Agam Tjoet: „Hoka Toeankoe ampōn njang radja nanggroë, seureuta ngon doemna ajah oelōn peuet droë goerèe radja, dan njang la'én doemna? Njoëkeu ta'bi loempoë Soelōtan njang djimeunan sahbanda djeuet keu boej! Na patōt oelōntoean njoë djijoe poh maté? Dji meung toeeng doemna areuta oelōn leubèh niba' peuet reutōih ribèe reunggét njang oelōntoean hareukat, bandoem njan djeunoë na lam djaroe djih."

Teuma seu'öt goerèe peuet, seureuta moepakat bandoem, geupeusabét ban njang ta'bi narit niba' Sinja' Agam Tjoet, seureuta geukheun: „Njokeu meunan ta'bi loempoë radja, hana sagaj oebah niba' ta'bineu njan, njoëkeu ka lahé!" Doedoë niba' njan lom djimarit Sinja' Agam Tjoet, djipeuseumah oebea' Soelōtan: „Njoëkeu, Toeankoe ampōn, inong gasien njang ta'bi djeuet keu poetroë lam loempoë Toeankoe; njoëkeu djih njang djeuet keu poetroë proemoh radja; djih njoëkeu njang peuleupaih oelōn niba' geupoh maté jōh di panté Kroeeng Mirah!" 'Oh lheueh djibōh ta'bi loempoë radja habéh ban peuet peue, jōh njan lé lheueh beudé niba' tantra goerèe peuet, meutindéh lapéh oe ateueh Radja Djalé ngon oe ateueh teungkoe siah dan sahbanda. Teuma tadjō Sinja' Agam Tjoet, djitjang radja, djitob teungkoe siah ngon sahbanda, ban lhèe droë maté di sinan, pahna di hadapan meudjeulih halaja' njang le.

Jōh njan lé teuma moepakat goerèe peuet droë dan ngon njang la'én sigala njang na. Landja lé Sinja' Agam Toet njan geutabaj, geubōh keu radja, peutimang nanggroë mat neuratja. Teuma inong gasien njan djeuet keu poetroë proemoh radja, geupeukawén

ngon radja Nja' Agam Tjoet. Teutab kheuradjeuen, aman raja  
ngon seunang nanggroë adé radja: boemoëpoetra bandoem troë,  
ma'moe banda, la'lém pasè' ngon boet mongkâ, bandoem geu-  
tham ngon geularang, doem geusoerôh ba' boet njang djroh ama-  
ra bén ma'roeih wanaha 'anèn mongkari, hingga ka bandoem djroh  
geu'atō ngon meusiga' nanggroë ban sineuna.

---



## V. KISAH RADJA TAMPŌ' DI PIADAH

'Adjajéb sōbeuhanalah, taleungo koekisah Malém Diwa  
Radja Tampō' nama ajah, gampōng Piadah teupat neuradja  
Njankeu neumat neukheuradjeuen, neumeukawén oe Malém  
Djawa

Di Malém Djawa sinan soelōtan, geurasi nan Radja Moeda  
Neumeu'aneu'pi na sidroë, oereueng binoë Poetroë Sahbawa  
Roepa sambinoë hana lawan, hana padan ngon tapeusa  
Na tamsé bah bintang timoe, njankeu iboe Malém Diwa  
Radja Tampō' aneu'neu tan, oe'ba' Toehan neuwoepinta  
Neumeuhon toelōng oe'ba' Alah, oe Awé Geutah neupeuteuka  
Di sinan na 'oelama sidroë, salèh han soë Teungkoe Panita  
Njanpi malé aneu'neu tan, neumeurakan deungon radja  
Sabé malé neumeusahbat, meugaséh that hana tara  
Ba' si'oeroë Toehan teukeudi, radja meudjandji ngon 'oelama  
Neumeulakée oe'ba' Toehan, aneu'neu tan trōih 'an toeha  
Toehan keu lōn aneu' tabri, neuleueng djaroë lé neubeuet doe'a  
Doe'a neubeuet njoë ban neukheun, sara neuleueng djaroë doea  
Rabbi la tadareuni pareudan, wa anta khoërōn warisin  
Toehan teurimōng doe'aneu njan, di hadapan Teungkoe Panita  
Meung na aneu' di lōn sidroë, keu teungkoe njoë lōn bri teuma  
Teungkoepi malé aneu'neu tan, misé laman han sapeue na  
Seu'ōt teungkoe meung na di lōn, Toeankoe ampōn keu meu-  
koeta

Oelōnteu bri keu Toeankoe, beukit sidjoedō moebisan doea  
Meunan djandji radja ngon teungkoe, neuwoë ladjoe oe atana  
Neupeugah ba' toean poetroë, djandji kamoë ngon 'oelama  
Meung na aneu' oereueng lakoë, teupoebeuet doedoë ba' 'oelama  
Lheueh niba' njan padoem oeroë, hamè poetroë aneu' ka na  
Geunab boeleuen sampoë toedjōh, teukeudirōlah bōh maté radja  
Maté radja toedjōh oeroë, sakét poetroë aneu' ka na  
Radja maté poetroë sakét, Sahbawa bit soesah raja  
Aneu'pi agam roepa indah, itam lidah meukeumala

Soë njang kalon teuhah babah, itam lidah dji'eu soekla  
Poetroë kalon manja' meutoeah, gadoh soesah dalam dada  
Poetroë madeueng doe' di dapoe, geunab laloe peuet plöih oe-  
roë ka  
'Oh lheueh madeueng poetroë laloë, dawō' moë-moë bidjèh  
mata

Raju' batjoet poetroë bōh nan, Malém Diman neubōh nama  
Ka'ōj teungkoepi ka sampōë, aneu' sidroë Toehan bri na  
Neubri aneu' oereueng binoë, djroh seureuloë nan Djalikha  
'Oemoe sadoem moeda saban, misé intan ngon meutia  
Haba teungkoe bahkeu 'oh nan, Malém Diman lōn tjalitra  
Toedjōh thōn 'oemoe Malém meutoeah, jōh njan meulintaih  
keumieng boengka  
Neukeumieng dja' oe Awé Geutah, ka neupeugah lé oebe' ma  
Jōh njan neudoe' di seuramoë, neukheun meunoë neumeuhej  
ma

Neutrôn keunoë hé ma si'at, na peue pakat lôn ngon gata  
'Oh neuleungo haba moemeunan, neutrôn jôh njan ba' aneu'nda  
Pakon aneu' tahej kamoë, takheun djeunoë bidjêh mata  
Tabri idin ma si'oeroë njoë, koetrôn oe boemoë koe'eu dônja  
Teuma seu'ôt maneu poetroë, sara neumoë ngon ie mata  
'Oh ampeuet goh koepeulalô, 'oh pintô gohlom koeba-ba  
Poepô' di oelêe gohlom poeli, aneu' pat koebri gata taboengka  
Meung han tabri ma soeroë njoë, bah koeboih droë dalam rimba  
'Oh neuleungo haba moemeunan, teupiké jôh njan poetroë Sah-  
bawa

Sara piké poetroë neu moë, salèh aneu' njoë bit dji boengka  
Meung djidja' ngon sakét até, salèh han lé koe'eu mata  
Beukeusit meunan haj aneu' droë, tanggõh kamoë oe ba' gata  
Koemeutanggõh meung lhèe oeroë, ta'asah gigoë boh até ma  
Teuma neu'e' oe meuligoë, beuka peutoë njang that raja  
Neutjo' idja saboh sangè, poetroë neu mè sigra-sigra  
'Oh saré trõih oe seuramoë, neuhej samlakoë sigra-sigra  
Beudoih aneu' keunoë si'at, njoëkeu hadjat ma di gata  
Beukeusit aneu' takeumieng dja', tjo' hé manja' neungoej gata  
Keupeue hé ma peukajan doemnoë, tjoet tè' kamoë gohlom raja  
Peukajan njoë meung han kangoej, koetie' lam apoej Sangè  
daja

Ada' na gaséh ma ngon sajang, idja boedjang di lôn hé ma  
Keupakonkeu aneu' idja boedjang, sabab gasien wang doekeu  
radja

Njang lôn lakée hé ma idja boedjang, mangat lôn geutang goem-  
ba' raja

Beukeusit meunan hé aneu' tjoet, ban meukeusoet aneu' di gata  
Teuma neudjō' reudjang-reudjang, lheueh njan neugeutang  
goemba' raja

'Oh rōh peukajan sileungkabpan, na doem intan tjahja moeka  
Boelée keunèng njang that leubat, njang leunté' that boelée  
mata

Koentōm idōng ban boengong meuloe, peunoh meutaboe gloem  
di dada

Reukoeeng panjang doem geularé', gigoë leunté' doem geu-  
djangka

Goekèneu gèt ban parōh ajam, gatja itam na doem badja  
Paleuet djaroë ban òn boendi, paleuet gaki ban òn boega  
Beutéhneu gèt meuboenténg padé, djaroë boebé toemba' nala  
Si manja' tjoet dilée seudang, goemba' panjang di djeumala  
'Oh saré lheueh njan neumeungoej, djeunoë neu'euj neungadab  
ma

Tabri idin lôn trôn oe boemoë, ma soeroë njoë lôn koeboengka  
Dja'keu aneu' beuseulamat, beudjeu'ōh la'nat mara bahja  
Teuma neubeudoih neumeulangkah, laloe neuseumah ba' teu'ōt  
ma

Lheueh njan neutrôn neudja' leugat, leupaih lé si'at leuen atana  
Ta'eu neudja' leuntah-leuntō, oelée bahō meukipaih tjina  
'Oh ban leupaih ba' balè koembang, neupeuseunang oe balè raja  
Saré leupaih neutebiet oe blang, neupeuseunang ateueng raja  
'Oh saré trōih oe Peusangan, neutamong keunan ba' 'oelama  
Ka neutamong oeba' déjah, ba' meunasah Teungkoe Panita  
'Oh saré trōih gaki reunjeun, geureuhēm siseun mangat soeara  
Ban neutjeungeu' oeléh teungkoe, neukalon hoe njeum di mata  
Ban neukalon njan oe boemoë, teukab djaroë Teungkoe Panita  
Ta'é' keunoë aneu' teungkoe, piōh hé po sikléb mata

'Oh neuleungo haba moemeunan, neutjo' lé jōh njan deungon  
tima

Neusrah gaki é' oe déjah, 'oh ban leumah teungkoe neusapa

Nateu keunoë aneu' teungkoe, sidjahtra po ateueh gata  
 Lheueh neusapa saleuem neuseu'öt, boengköih neusamböt ba'  
 'oeIama

Teupiké ba' até teungkoe, neu'eu lakoe njo aneu' radja  
 Njo njoë aneu' radja Tampö', meunan meurö' ba' neukira  
 Teungkoe neupiké neungieng lagée, ranoeb patè lajèe neudjō'  
 sigra

Lheueh neudjō' ranoeb njan keu teungkoe, neukheun ladjoe di  
 nab mata

Teungkoe neukheun ba' Malém Diman, aneu' badan tabeuet gata  
 Gata aneu' that meutoeah, tapeulheueh hadjat mbah aneu' radja  
 Teuma neudjō' lloh oe djaroë, neupoebeuet djeunoë sigra-sigra  
 Na meung barö neukheun aleuham, ka djeuet neupham ka lheueh  
 hidja

'Oh neukalon lakoe moemeunan, neubalé' nan aneu' radja  
 Neutjo' kitab ka neupeuhah, neupeugah neubalé' nama  
 Teuma neukheun haba sipátah, nan koepinah aneu' gata  
 Èn tja' Alah ka neuseu'öt, ban njang patöt neumeuhawa  
 Dilèe oentöng tjoet Malém Diman, djeunoë koepeunan Malém  
 Diwa

'Oh neuleungo meunan geupeugah, neuseumah Teungkoe Panita  
 Lheueh neuseumah neutjöm djaroë, neukheun meunoë lé Panita  
 Dja' tatamong oe meuligoë, beuet ngon adoë Ti Djalikha  
 'Oh neuleungo haba teungkoe, neutamong ladjoe oe atana  
 Neudja' ladjoe pantaih-pantaih, tröih ba' daraih neupeuteuka  
 Tamèh daraih neu'eu meusiseue', roeneu badeue' tjintramoela  
 Saré leupaih neutamong oe leuen, thatkeu soekeuen neu'eu roepa  
 Neu'eu roemoh limong roeweueng, bintéh roebeueng sisé' naga  
 Neungieng tamèh kajèe djatoë, njan di sagoë Meudang ara  
 Neu'eu tamèh bandoem indah, koeli teuroeah geupeugèt roengka  
 Toela' angèn eumpoeng mirahpati, ba' peuneupi leue' banggoena  
 Bintéh toenggaj ireuen-ireuen, geutjab boeleuen seudöng kala  
 Papeuen plangan poeta taloë, boeet djaroë aneu' deureuma  
 Oelèe reunjeun meutjoelè' sipöt, poejöh meulöt ngon tjémpala  
 Neungieng poepalang that bit goetoë, djō' djeunaloë geu'ikat  
 rata

'Oh saré tröih oe gaki reunjeun, geureuhèm siseun mangat soe-  
 ara

Djantōng pisang klat poeti' pisang noe, soë di leupoe di roemoh  
raja

Poeroemoh panita neuleungo soe, neu'eu ladjoe leuen atana  
Hana sidroë ampeueng lageuem, teudong di leuen Malém Diwa  
'Oh ban neutjeungeu' neungieng oe leuen, na doem boeleuen  
teungoh peunama

Petroë neu'é' oe meuligoë, neudja' peugoë Ti Djalikha  
Ka neutjeupét teuntang teu'öt, tō teukeudjöt Siti Djalikha  
Ban teukeudjöt mata djipét, até sakét sabab djaga  
Soëboe peugoë ma di kamoë, baranggasoë teumeureuka  
Meung njang inong doem koepaloe, agam oe timoe koepoebleut  
mata

Bè' kamarah keu oereueng nanggroë, lön njang peugoë bidjèh  
mata

Pakon tapeugoë ma teungkoe droë, takheun djeunoë peue keu-  
reuna

Njang koepeugoë e sambinoë, djamèe na sidroë aneu' teuka  
Ban djileungo djamèe na sidroë, ò' djikoendoë Siti Djalikha  
Djileueng tika keusangkeusöt, teubaj 'oh teu'öt manjang 'oh pha  
Djiböh ie dalam seurahi, ngon srah gaki djamèe teuka  
Jöh njan djisapa lé petroë ti, meutjakri ngon Malém Diwa  
Djantōng pisang klat poeti' pisang noe, é' oe leupoe hé sjèedara  
'Oh neuleungo soeara mangat, reunjeun neumat lheueng-lheueng  
doea

Ka neutjo' ie lam seurahi, neusrah gaki Malém Diwa  
Neusrah gaki neudongpi tjot, ie neusidjot dalam goeha  
'Oh saré lheuëh njan srah gaki, neutiti neudoeë' ba' tika  
Siti Djalikha doeë' lam bilé', pineung djipoelie' ranoeb keu

Bangta

Djitjo' tjeundawan njan oe djaröë, poelie' djeunoë pineung moeda  
Poelie' pineung pantjaloegam, masa' plah nam moeda plah doeë  
Djitjo' teuma keutoemboe biram, tjo' krاندam toeang meulaka  
Djitjo' keutoemboe na sidjoedō, barō-barō lheuëh geuteumpa  
Teuma dji'é' oe meuligoë, boeka peutoë saboh njang raja  
Tjo' pinggang plang sawa' soengkét, sidjahét deungon ie moeka  
Di gité' böh boh beuroenjong, djikandong krاندam soeasa  
Djisō' euntjien mata intan, oe badan ka djiploeeng tjahja  
Di inong djaröë intjien harimie, di gité' wie oenggaih deureuma

Djaroë siplöh han djeuet djikoeien, peunoh intjien Siti Djalikha  
 Bahō meutō singkèe meugra', djitoela' ikaj meugeunta  
 Tjo' adjeumat na lhèe pangkat, doea lipat ngon soeasa  
 Teuma djitjo' minjeu' sidjot, poeti' kroet boengong seulanga  
 Djitjo' soegōt meutjeuradi, meukhambi meuih ngon soeasa  
 Djisoegōt ō' meuhah-meuhah, si' oerat-oerat ngon tjeumara  
 Djitjo' soebang na ban tjawan, lètlot intan blètblot mata  
 Lheueh djimeungoej po linténg djroh, trôn di roemoh keudéh  
 ba' ma

Ō' di oelèe moepataih manjam, djroh niba' nang Siti Djalikha  
 Po ma poetroë neukheun meunoë, koepoeroenoë aneu' gata  
 Na kaleungo hé aneu' droë, ba' gèt poetroë taseumapa  
 Seu'ōt Djalikha ngon teukabō, djiseu'ōt ma po meunoë haba  
 Lôn hé ma han peue peuroenoë, sit ragoë droë ban leue' tjindra  
 Teuma djitrôn oe babah pintō, djitōb bahō djisom moeka  
 'Oh ban leumah oedjōng djaroë, teuma meunoë lé djisapa  
 Nateu keunoë wahé adoë, nateu keunoë hé tjèedara  
 Malém leungo narit geuseu'ōt, sang geutōt didalam dada  
 Bè' antara na neuseu'ōt, neubri likōt masam moeka  
 Geunab lhèe seun geusapa ladjoe, teupiké Teungkoe Malém Diwa  
 Qeba' Nabi lônpi salah, oeaba' Alah koemeudètja  
 Lheueh njan Malém neubōt djaroë, neukheun meunoë ba' Dja-  
 likha

Naboe kamoë poda Poetroë, naboe kamoë poda Djalikha  
 Teungkoe beudoih dja' mat djaroë, oeaba' Poetroë Siti Djalikha  
 Ka neudjō' ranoeb dalam karaih, djaroë doea blaih ateueh djeu-  
 mala

Njoë na adoë ranoeb toenong, hareukat reunong reudeueb lawa  
 Dilèe tawōdji ba' tjeukō, djeunoë tawōdji ba' boega  
 Malém djaweueb neukheun lagèe, neupeulahèe Ti Djalikha  
 Di lôn poda ranoeb lajèe, djeu'ōh peureudèe oereueng meukat ba  
 Lajèe ranoeb moedah meugantoë, tan gata adoë ho koemita  
 Ranoeb geupadjōh barō bitjah, seun sipatah kalam neuboeka  
 Patboe gampōng panè nanggroë, ho hadjat adoë keunoë gata  
 Djeu'ōh gampōng da djeu'ōh nanggroë, hadjat adoë sit 'oh poda  
 Gampōng hé da dí lôn di barōh, han that djeu'ōh 'oh koela  
 Gampōng djeu'ōh djara' nanggroë, mata oeroë lôn bōh keu tanda



Koereuengsa sireutōih radja di barōh, lam geunggam bōh doe  
lōn radja  
Lheueh njan poetroë beudoih reudjang, neutjo' makanan sigra-  
sigra  
'Oh saré trōih oe meuligoë, geuteuboeet di djaroë eumpang geu-  
hila

Saboh sagoë bōh kanèt boe, rot timoe beulangong dara  
Saboh sagoë geudjeulong panggang, teuma reundang saboh  
mata  
Boe geutagoeen boekon goegōh, eungkōt geutjroeoh meureutōih  
mata

Teuma geubōh boe lam hidang, tōb reudjang ngon sangè daja  
Teuma geupeutrōn oe seuramoë, peudoe' di keue Malém Diwa  
Siti Djalikha djibōt djaroë, kheun meunoë ba' Malém Diwa  
Neupeusingèt geupèt poebasah djaroë, neumakeuen adoë boe  
ngon sira

Malém seu'ōt ngon mangat soe, poda teungkoe di djeumala  
Kroe seumangat poda meutoeah, neudoe' pantaih sadjan gata  
Ka neutjo' ie neusrah djaroë, makeuen samlakoë adoë ngon a  
'Oh lheueh makeuen bandoea droë, pinah djeunoë idang raja  
'Oh saré trōih seuramoë dapoe, ka neupaloe Ti Djalikha  
„Boekon paléh djalang bisoë, han kateumèe lakoë Ti Djalikha  
'Oh djileungo haba moemeunan, djitrōn jōh njan sigra-sigra  
Leugat djitrōn oe seuramoë, djidja' sapa njoë Malém Diwa  
Nateu keunoë dalém teungkoe droë, nateu keunoë adoeen radja  
Naboe kamoë poda Poetroë, naboe kamoë wahé poda  
Meung ka ba' oe han ba' pineung, han mameung di lōn keu gata  
Di dōnja kon trōih akhirat, di lōn sah that a lōn gata  
Teuma Poetroë tjo' loh pira', djipeugala' Malém Diwa  
Neubeuet dalém sadjan adoë, lōn peuroenoë adoeen gata  
Na meung barō dhikheun aléh, teungkoe habéh ka neuhidja  
Peue tjit dalém han djeuet tabeuet, roë sit ka djeuet doem peu-  
kara

Peue tjit dalém eu ba' loh kamoë, sit ka malém droë dilée gata  
Teuma seupōt lé ngon oeroë, neukheun ba' Poetroë Ti Djalikha  
Idin poda lōn éh si'at, lōn sangat that leuboej mata  
Teuma neu'éh jōh masa njan, hinggā pangsān tō' lheueh isja

Nakeu oemoe siteungoh malam, doea djeuem klam wa'tèe seu-  
ninja

Tō teukeudjōt moeda samlakoë, neumeuloempoë Malém Diwa  
'Oh teukeudjōt ba' meuloempoë, ka neumeuhej njoë Ti Djalikha  
Neutrōn ketunoë poda si'at, na peue pakat lōn ngon gata  
Teuma djitrōn oe seuramoë, meutoetō djeunoë ngon Malém Diwa  
Pakon adoë lōn tapeugoë, peue boe loempoë Malém Diwa  
Wahé poda njang lōn peugoë, koeloempoë saboh rasia  
Lōn meuloempoë malam boenoë, lōn dja' manoë ba' Teupin Ara  
Langoe keudéh langoe keunoë, meulinteueng ô' poetroë teun-  
tang dada

Bè' tapatéh ma'na loempoë, djén peurawoë teungkoe gata  
Hana poetroë poetjō' kroeng njoë, leubèh ba' kamoë Siti Dja-  
likha

Han neupatéh beungoh oeroë, neudja' manoë ba' Teupin Ara  
Langoe binèh djéh langoe binèh njoë, meulinteueng ô' poetroë  
teuntang dada  
Neu'oeet asoë gléh ngon kalang, leumah gloem bintang joem  
sipeuha

Lheueh neumanoë salén basahan, tjo' peukajan Malém Diwa  
Sō' seuloeeue deungon badjèe, di oelèe tangkoelō' raja  
Neupalét ô' ba' inong djaroë, leugat neuwoë lé ba' poda  
'Oh saré trōih oe meuligoë, neuhej poetroë lam atana  
Poeti' pisang klat djantōng pisang noe, soë di leupoe e hé poda  
Naboe kamoë teungkoe meutoeah, keunoë neulangkah oe atana  
È' keunoë teungkoe djeunoelang, boe lam idang djiprèh gata  
Teuma neu'é' oe seuramoë, beudoih poetroë lam atana  
Poetroë bōh boe dalam idang, djipeudoe' reudjang keu Malém  
Diwa

Neutoenggéng geupét poebasah djaroë, neumakeuen djeunoë  
oeroë ka djoela  
Teuma neumakeuen teungkoe sidroë, hana neumeuhej Siti Dja-  
likha

Njang ka dilèe baranggadjan, neumakeuen njan sapat doea  
Ba' oeroë njan neumeuhej tan, poetroë masam ngon ie moeka  
Neupadjōh boe sibodjoe djaroë, nè'mat ka troë trōih oe dada  
'Oh lheueh makeuen geupinah idang, Poti tatang ngon tjeurana

'Oh lheueh neudjō' ranoeb lam poean, meutoetō jōh njan Malém  
Diwa

„Tadoee' poda beuteutab si'at, na peue pakat lōn ngon gata  
Teuma neudoe' toean poetroë, neudjō' oe djarōë ò' njang neuba  
Ban djikalon poetroë reubôt, djikeumeung tōt Ti Djalikha  
'Oh neukalon djikeumieng tōt, ka neureubôt sigra-sigra  
Tabri idin hé poda droë, lōn soeroë njoë djadh lōn boengka  
'Oh djileungo meunan toetō, ka djiba'e Siti Djalikha  
Teuma djimat lé di pinggang, ka meu'ilang Malém Diwa  
Meung sipadé han koetém tjré, balé maté sadjan gata  
Meung kon tatōb ngon tanoh tja', pat koebri dja' teungkoe gata  
Naleueng di leuen goh lom bitjah, goh lom ramaih lōn ngon gata  
'Oh neuleungo toetō seungkoë, ma poetroë neuhej lé sigra  
Tabri po ma Boedjang Tandj, joe mat Dati lōn koeboengka  
Teuma neutrōn ladjoe oe leuen, poetroë siseun mat ba' idja  
Jōh njan teungkoe boengka oe glé, djiseutèt lé Ti Djalikha  
Deungon ra'jat doem lam nanggroë, boengka djeunoë dalam  
rimba

Toedjōh oeroë toedjōh malam, ka peudjam teungkoe neuboengka  
Ka neu'é' glé neutrōn panton, leupaih leupon djeueb-djeueb data  
'Oh saré trōih oe joeb rambōng, neu'eu sang gampōng gèt seu-  
ninja

Teuma neupiōh si'at sinan, meutoetō jōh njan poetroë moeda  
Tabri lōn éh teungkoe si'at, lōn teungeut that leuboej mata  
Tamoeeng oelèekoe teungkoe djroh, lōn meung piōh sikléb mata  
Djipôt angèn seupoej-seupoej, mata leuboej teungeut njidra  
Teuma poetroë éh na sikeudjab, meung barō rab boelée mata  
Teungkoe Malém hej teuma boedjang, peurab reudjang keunoë  
gata

Hoka gata Boedjang Tandj, tamoeeng Dati lōn koeboengka  
Boedjang Tandj peurab dilée, djimoeeng oelée poetroë moeda  
Bōh neutjarōt bōh neupaké, kadrob Dati kapoewōë da  
Lheueh neukheun njan teungkoe meutoeah, neubeudoih pantaih lé  
neuboengka

Ban teukeudjōt po toean poetroë, neutjo' oe djarōë peudeueng  
raja

Maté aneu' Boedjang Tandj njoë, kapeungeut kamoë rimoeeng  
seuba

Teuma djidrob djipeutaloë, dji'ikat poetroë lhèe khan idja  
 Ka geupoewoë lé geu'oesōng, trōih oe gampōng Siti Djalikha  
 'Oh saré trōih oe meuligoë, ma poetroë meutoetō sigra  
 Kabōh ranté pantaih-pantaih, na bè' leupaih Siti djiboengka  
 Bōh di keu'ienng ranté beusoë, di djaroë ranté teumaga  
 Dalam neunoih kasrōng gaki, Si Nja'ti ka teungeut njidra  
 Oemoe lhèe oeroë djaga Si Nja'ti, djilakèe ie leupie teuma ba'  
 ma

Tabri po ma ie sigeutoe, reukoeengkoe that hoe boekon dahga  
 Ka neudjō' ie sadjan ngon boe, makeuen sigeutoe 'oh meurasa  
 Sara makeuen neudjéb ngon ajé, ie mata ilé ngieng oe ba' ma  
 Peue kangieng aneu' oe ba' kamoë, roë salah droë Ti Djalikha  
 Ada' kapatéh koepeuroenoë, djeuet keu lakoë Malém Diwa  
 Djeunoë njang gèt aneu' meutoeah, leungo koepeugah bidjèh  
 mata

Tjo' Koeroe'an aneu' oe djaroë, tabeuet keudroë lam atana  
 Lheueh njan geupeulheueh neunoih ngon ranté, teuma djitjo' lé  
 Koeroe'an raja  
 'Oemoe lhèe oeroë djibeuet sabé, loepōt até keu Malém Diwa  
 Teutab poetroë lam 'ibadat, poeboeet ta'at hana reuda.

---

## VI. HABA ASAJ DJEUET TJITJÉM TÉ'TÉ' WANG

Na sidroë Poja ba' djameun dilèe saboh masa, di Poja njan peuroemohneu na sidroë, peuroemohneu njan nan Po Likat, bandoea gobnjan lakoë binoë boeet meuladang, poemoela ngon tadjò padé, neutjeumeutjah dalam oeteuen.

Padoem lawét lam boeetneu meunan, Toehan bri aneu' inongneu sidroë djroh that roepa, geupeunan aneu'geu njan Si Té'té' Wang. Ho si'oeroë di Si Té'té' Wang njan makén raja, 'oh geunab oemoe tō' ba' akhé balèh, geupeukawén Si Té'té' Wang njan ngon sidroë agam oereueng moeda; nan agam njan Si Moela. Djidoee' di Si Moela njan ba' saboh doesōn.

Lheueh geupeukawén padoem lawét, djidoee' lintō njan sinan sadjan toean thadji Poja; doedoë niba' njan, Si Moela lakèe idin ba' toean thadji lakoë binoë, djikeumeung poewoë poeroemohdji oeba' gampōng droëdji. Jōh njankeu Poja ngon Po Likat neupeumoelang sileungkabpan alat peukajan keu aneu'dji Si Té'té' Wang: gleueng, koeroentjōng, gantjéng, peudéng, soebang, intjien ngon ikaj; bie' alat oereueng kaja, doempueu leungkab bandoem.

Na padoem lawét lheueh djipoewoë Si Té'té' Wang lé Si Moela oe gampōng teupat roemoh droëdji. Doedoë niba' njan di Si Moela njan, hana lé sagaj djitém poemoeboeet, malingkan boeetdji sabé lam meuseunang-seunang mantong, éh beudoih padjōh, la'én tan boeet. Bitpi meunan kajém tjit geusaweue lé thadji lakoë binoë; teuka keunan ma Si Té'té' Wang, neudja' kalon aneu'neu ngon meulintèe, meunan sabé dja' woë oelang, doea lhèe seun lam siboeleuen.

Ba' si'oeroë kheun thadji Po Likat, oeba' meulintèeneu Si Moela: „Haj Po Nja', pakri sabé di gata é' tadoee' di roemoh? Kon gèt tadjà' poemoeboeet lagèe di gob la'én? Hana oereueng agam njang meunan lagèe gata! Han djeuet djeu'ōh meung batjoet niba' takawaj inong, peue goena takeumiet sabé? Njoë di gata lōn kalon, hantom sagaj tadjà' mita raseuki peue njang na moedah? Djeunoë ba' tabeudoih bè' lé meunan tapoeboeet.

Ban Si Moela leungo narit thadji meunan, sapeuepi hana djibri djaweueb, séb meung dji'iem droëdji mantong. Bitpi sidoemnan narit toean thadji, njang di djih njan, hana tjit djipeudoeli; di djih ban boeet droëdji tjit njang djipoeboeet. Lheueh neukheun njan djiwoë di Po Likat njan oeba' gampōng droëdji. Lheueh niba' njan hantom na neudja' saweue lé oeba' roemoh Si Té'té' Wang.

'Oh ban saré leupaih woë madji, di Si Té'té' Wang ngon Si Moela bandoea djih lakoë binoë sabé boeetdji lam meugala'-gala' hana teudōh meukhém meukha'. Doedoë niba' njan padoem lawét, hana teuka lé madji keunan. Oebé-bé na areuta peusaka niba' madji bandoea, habéh djipoebloë gon djipeugala djipadjōh keu blandja.

Ba' si'oeroë teuma lom geuteuka keunan Po Likat, oeba' roemoh aneu'dji Si Té'té' Wang. Ban djikalon bandoem, oebé na areuta peunoelang, ka hana lé ka djipoebloë djipeuhabéh, jōh njan lé beungèh Po Likat, hoe ngon moeka mirah ngon mata, seureuta djitanjong lé oeba' aneu'dji Si Té'té' Wang:

Wahé aneu'koe Té'té' Wang, peugah reudjang ho areuta  
Hoka peudéng intjien oetaih, njan tapeugah po beusigra  
Han djeuet gadoh doem areuta njan, sikeulian matabeunda  
Tamè keunoë doemna barang, koemeung pandang koeparé'sa  
Handjeuet sapeue tapeu'oebah, peunoelang ajah deungan boenda  
Kah njoë doea geumaséh tan, han teulindan saweue Poja  
Di Poja neu'ingat djeueb-djeueb oeroë, neuprèh aneu' droë  
saweue bapa

Hantom sigo keudéh kadja', bit kah haj nja' tan seutia  
Peukeu goena aneu' meunoë, doem atra droë ka hilé ba  
Areuta habéh han sapeue lé, sabab pi'é si tjilaka  
Hoka tjeumara' deungan simplah, aneu' bagaih mè beu sigra  
Ajeuem goemba' njan ngon poentoe, beuna koe'eu keunoë kaba  
Pat gleueng djarōë deungan gaki, mirahmani euntoe' dada  
Pat koeroentjōng boengong tadjō', tjeumoetjo' ō' boengong  
djeumpa

Lheueh niba' njan, lom Po Likat kalon ba' goeloenjoeeng aneu'-  
dji Si Té'té' Wang, hana lé djingoej soebang; jōn njan lé lom  
djitanjong:



Té'té' Wang hé Té'té' Wang, hoka soebangkeu haj aneu'  
Ba' kapeugah djeunoë reudjang, doem atra Wang djeunoë ba' na

Teuma djiseu'öt lé, lé Si Té'té' Wang, djidjaweueb narit madji  
njan:

Wahé ma po ma meutoeah, pakon marah keu aneu'nda  
Areuta njang tabri doem ka mitoeeng, njang taboeloeeng dilèe  
lé ma

Keupeue djeunoë lom ta'oengki, doem tasoedi djinèh roepa  
Kakoepobloë keu padé tanggōh, ka koepadjōh doea-doea  
Wahé ma po po ma teungkoe droë, ka koepobloë keu beulandja  
Ka koepobloë doem sibirang, areuta peunoelang niba' gata

Ban Po Likat leungo habadji meunan, teuma beungèh lé jōh njan  
han ban poebla. Jōh njan lé djiseurapa aneu'dji njan seureuta ngon  
dji'ah oeba' Alah djimoepinta. Ngon teukeudi Alah djeuet lé aneu'-  
dji njan keu tjitjém té'té'. Meuseuté-seuté' djipo lé bandoea;  
dji'é' djitrōn po, meuseuté'-seuté', seurapa oereueng tjhi' teumeu-  
reuka.

Bandoea aneu' njan djeuet keu tjitjém, sinan kajém lam blang  
raja

Sinankeu djidoe' dalam djeundrang, oeroë malam djih lam  
soeka

*sneker  
pajah*

meung deut-deut boeta

koeja

sigra

tangga

paja

mita

sama

a

'Oh saré ka gléh ngon kalang, koejapi jōh njan neumeung gisa  
Djimat lé boeja koeja ba' gaki, ma neusoedi neuparé'sa  
Pakon kamat wahé oelōn, tawoë oe gampōng dja' oedéhtha  
Boeja seu'ōt jōh masa njan, koemeung peureulankeu hé Poja  
Ban neuleungo haba moemeunan, neumeulawan han ban poebla  
Di boeja njan djimat 'oh kong, koeja teudong han lé koeasa  
Koeja marit lom neuteuntèe, kaleungo kèe wahé boeja  
Koebri eumpeuen beungoh seupōt, njan niphōn tjoet koepeuraja  
Ho njang koedja' koemè sadjan, oeroë malam koepeulahra  
Njandoem goena dikèe keu kah, koemoepajah rō'-rō' masa  
Niba' pidjoet koepeuteumbōn njan, oebé badankeu ka raja  
Goenakoe gèt djeuheut balaih, kabri lé kah wahé boeja  
Kameung padjōh kèe njoë lé kah, njan kabalaih 'oh ka raja  
Boeja seu'ōt jōh masa njan, sabét meunan ban kheun gata  
Meung njo boet gèt djeuheut beunalaih, meunan peureunah  
djeueb-djeueb dōnja  
Kon beurakah haba lōn njoë, djeueb-djeueb nanggroë meunan  
djoega  
Ba' oeroë njoë han koepeulheueh, nabsoe ba' poeéh koepadjōh  
gata  
Koeja neuleungo djikheun moemeunan, neumeulawan that ba'  
njang ka  
Neumeulawan makén kong djimat, koeja meukarat han ban  
poebla  
Iepi taré' that teureudjōn, teungoh djitrōn oe koeala  
Hanjot alèe saboh di toenong, trōih lé langsōng keunan rab koeja  
Koejapi jōh njan neuhej alèe, kaprèh dilèe siklèb mata  
Alèe seu'ōt pantaih-pantaih, keupeue ta'araih tajoeë prèh bapa  
Peue tameung kheun ba' sirigab, lōn meukarat oe koeala  
Koeja jōh njan peugah reudjang, koemeung tanjong oeba' gata  
Boetteu njang gèt njo djheut balaih, tjoeba peugah sigra-sigra  
Alèe seu'ōt sabét meunan, ban njang takheun han meutoeka  
Masa moeda di lōn dilèe, keudéh keunoë kèe meutjo' hila  
'Oh ka toeha lōn han soë toeeng, djitie' oe kroeeng wahé koeja  
Kon meung lōn kheun tangiang keudroë, haba lōn njoë kon peu-  
boela  
Ada' han peue boet lōn trōih keunoë, tjit di sinoë teumpat  
hamba

Njang patöt lön doee' tjit di gampōng, sadjan leusōng kamoë  
doea  
Masa dilèe teungoh djroh-djroh, meuseunoh-seunoh meutjo'  
hila

Lōnpi moeda badanpi koeat, hana meung si'at na seuninja  
'Oh ka toeha teuma geuboih, geupeugadoh balé ie ba  
Njankeu haba lön kheun teupat, lön meukarat oe koeala  
'Oh lheuëh alèe peugah haba, hanjot landja oe koeala  
Boeja marit jōh masa njan, njo ban lön kheun wahé koeja  
Njo ban djikheun oelé alèe, na lom wa'tèe tanggōh gata  
Djeunoë koepadjōh bè' meulawan, koeja jōh njan marit sigra  
Han ka'ingat goena kamoë, malam oeroë koepeulara  
Koebri makanan beungoh seupōt, njan niba' tjoet koepeulara  
Tō' hat djeunoë kameung padjōh, teugoë toebōhkeu ka raja  
Meung ka'ingat goenakoe djroh, bè'keu kapoh kèe hé boeja  
Ada' han kadja' lé sadjan kèe, kapeulheuëh dilèe na koegisa  
Na meung kadja' di kah keudroë, ho nabsoe droëkeu hé boeja  
Boeja seu'öt reudjang-reudjang, pakon meunan tameuhaba  
Kon ka taleungo alèe peugah, soë njang salah soë njang beuna  
Meung njo boeet gèt djeuheut balaih, koepadjōh kah wahé  
koeja

Djimat 'oh kong koeja jōh njan, neumeulawan han ban poebla  
Koeja teungoh neumeulawan, leumah neungieng leusōng teuka  
Leusōng hanjot ba' ie ilé, ma neulambé oeléh koeja  
Sara neukheun kaprèh si'at, djéh pat sahbatkoe ka teuka  
Koemeung tanjong haba sipatah, beuna ngon salah kèe ngon  
gata

Boeja teu'iem si'at jōh njan, trōih lé keunan leusōng teuka  
Wahé leusōng kaprèh si'at, kabri nasihat keu kamoë doea  
Koemeung tanjong haba sipatah, beuna ngon salah kakheun  
ba' sigra

Leusōng seu'öt pantaih-pantaih, peue tapeugah wahé bapa  
Oe koeala lön meukarat, peugah teupat lön meung boengka  
Koeja jōh njan ma neupeugah, pantaih-pantaih neutjalitra  
Boetteu njang gèt njo djheut balaih, pakri peurintah haba gata  
Leusōng seu'öt sabét meunan, ban njang takheun njan han  
meutoeka

Di lôn dilèe leungo lôn peugah, meuseunoh seusah oentông  
 moeda  
 Djitob padé geunab oeroë, ngon alèe djaroe kamoë doea  
 'Oh habéh njan djiböh la'én, meusalén-salén hana reuda  
 Ladôm oereueng djitob eumpieng, djiböh boh tjeudieng padé  
 moeda  
 Seu'oeem-seu'oeem doem djipasoë, teutab lôn iem droë hana  
 haba  
 'Oh peungeuih boeleuen njoë lôn peugah, lôn djigalah lé  
 oereueng moeda  
 Peuleupeue' djō' djitob oe dalam, keutang-keuting djimeusoeara  
 Poenggōng-poenggōng lôn ka beusôt, tob-tob tjabôt hana meung  
 reuda  
 'Oh ka beusôt poenggōng lôn njoë, djitie' kamoë lam ie raja  
 Njankeu haba han djeuet dong lé, lôn takôt akhé oe koeala  
 Lheueh njan djidja' leusōng reudjang, boeja jōh njan kheun ba'  
 koeja  
 Ka taleungo narit leusōng, pakri oentông djeunoë gata  
 Seureuta djimat misé boenoë, tjoela-tjoeloë meulawan koeja  
 Teungoh meulawan meuteumeung djeu'èe, kaprèh dilèe kheun  
 lom koeja  
 Djeu'èepi trōih ka toë keunan, teumanjong jōh njan sigrasigra  
 Haba neutanjong misé boenoë, han peue djeunoë lôn tjalitra  
 Habéh neutanjong ka meuteuntèe, seu'ôt djeu'èe meunoë haba  
 Wahé bapa njoë lôn peugah, masa jōh meuntaih lôn oentông  
 moeda  
 Tjit djiseut breueh hana padoë, geunab oeroë tan meung reuda  
 Djiténg teupōng djiteumampoë, kon lôn sidroe la'énpi na  
 Djan poemeukroej ngon lôn djipôt, sangat hajoet lôn han tara  
 Di gob la'énpi moemeunoë, njang soekèe kamoë bandoem sama  
 Na tjit lôn ngieng di Da Lantoej, 'oh djan geungoej na me-  
 goena  
 'Oh tan geungoej geutie' oe joebmoh, meuligan tanoh djeueb-  
 djeueb angèeta  
 Meudjan geukeubah dalam kajèe, ngon-ngon abèe han treu kira  
 Geutjo' di sinan geutie' lam oeteuen, djiteuka oedjeuen kamoe  
 seuba  
 Meunankeu doem ban lôn peugah, kon beurakah lôn hé bapa

Han djeuet lôn dong di lôn lawét, lôn takôt tréb oe koeala  
 Lôn ngieng oeroëpi ka akhé, salèh han trôih lé oe koeala  
 Ada' han trôih lé oe la'ôt, meung bè' seupôt 'oh mieng koeala  
 Djeu'ëe ili lheuëh djikheun njan, tinggaj di sinan koeja ngon  
 boeja

Salèh mawot kèe oeroë njoë, maté sinoë ba' koekira  
 Meunan leumah dalam até, koeja piké dalam dada  
 Koeja meulawan boejapi djimat, that meukarat hana tara  
 Haba koeja lôn peudoe' si'at, moewoë riwajat keu Waki Saba  
 'Oh lheuëh djimeutjrë deungon Boebrang, djibeudjalan ho lang-  
 kah ba  
 Malam djidom oeroë djidja', peue meuroempa' njan djiseuba  
 Meunan-meunan geunab oeroë, djeueb-djeueb nanggroë djisa-  
 para

Ba' si'oeroë djibeudjalan, tō' 'an kroeng njan teumpat koeja  
 Djikalon koeja teungoh meulawan, ma djitanjong ban djiparé'sa  
 Wahé koeja peue boet di sinan, pakon meulawan soë ngon  
 gata

Tameulawan tjoela-tjoeloë, salèh soë-soë njang mat gata  
 Koeja seu'ôt reudjang-reudjang, jōh masa njan neutjalitra  
 Hé Peulandō' leungo koepeugah, djimeung padjōh kèe lé boeja  
 Masa tjoet djih koepeutimang, hingga seudang koepeulara  
 'Oh ka rajeu' di djih toebōh, djimeung padjōh teuma hamba  
 Goena njang gèt djeuheut balaih, hantom lôn ngo gah meunan  
 njang ka

Seu'ôt Peulandō' njoëu meunan, ban takheun njan tan meun-  
 toeka

Kon meung gata njang moemeunan, di gob la'én meunan djoega  
 Meung njo boet gèt djeuheut balaih, djipadjōh sah gata lé  
 boeja

Bandoea gata keunoë tateungoh, lôn hoekōm djroh bè' meuda'-  
 wa

Bè' dalam ie han djeuet lôn hoekōm, keunoë ba' lôn bandoea  
 gata

Tjit hana peue ngon mat-moemat, deungon mangat lôn hoekōm  
 beuna

Bè' tréb tateungoh keunoë oe darat, ba' koelihat meunang boeja  
 Ban djileungo narit meunan, keusoeka'an até boeja



Landja djiteungoh reudjang-reudjang, hoekōm sikarang hé toe-  
 anhamba

Meunan koeja djimeukalam, dji'é' jōh njan lé bandoea  
 Meu'ikōt-ikōt bandoea droë, djipeutoë ba' Waki Saba  
 'Oh trōih oe darat bandoea droë, Peulandō' djeunoë djiparé'sa  
 Oeba' koeja phōn djitanjong, takheun keunong ban tjalitra  
 Lheueh ba' koeja teumanjong Waki, lom djisoedi oeba' boeja  
 Di kah pakri tjoeba peugah, ban peurintah djitjalitra  
 'Oh lheueh djileungo bandoea blah, gata salah djikheun ba'  
 koeja

Djikheun ba' boeja gata meunang, treu' koehoekōm oeléh hamba  
 Meung njo meunoë hana meutjakab, tapeugèt teumpat sigra-  
 sigra

Balé tapeugèt teumpat meuhoekōm, na meung moephōm gob  
 eu roepa  
 Meung njo meunoë han meutjakab, geukheun bangsat lé gob  
 njang na

Dja' tapeugèt djeunoë meuseudjit, balé oebit bè' that raja  
 Meung 'oh djitheun lhèe geutanjoë, na meung sampoë hoekōm  
 sigra

Dja' tjo' boebeue ngon òn koeroesōng, djeumpoeng-djeumpoeng  
 keunoë taba

Oeba' koeja Peulandō' djisaih, bè' goendah-goendah treu' di  
 gata

Peue njang lōn kheun ba' tapatéh, ho lōn soerōh bè' meuda'wa  
 Na meung tapoh boeja paléh, tapeuhabéh ngon-ngon njawa  
 Na patōt gata djikeumeung 'oeet, djih niphōn tjoet tapeuraja  
 Poja seu'ōt gèt Toean Tjoet, peue tajoe boeet han lōn da'wa  
 Peulandō' seu'ōt reudjang-reudjang, djikheun jōh njan oeba'  
 poja

Bè' takheun-kheun lōn Toean Tjoet, ka geuseuboet Waki Saba  
 Poja seu'ōt gèt Po Waki, han lōn kheun lé njan keu gata  
 Lheueh njan Waki lom ka djikrah, tadjā' ba' bagaih wahé koeja  
 Gata talō patōtkeu pajah, di gob peue soesah oereueng beuna  
 Lam até boeja ka meulajang, kèekeu meunang meunan sangka  
 Koeja dja' lé reudjang-reudjang, òn koeroesōng neudja' mita  
 Neuwoë oe roemoh neutjo' parang, doem òn pisang neudja' mita

Ōn pisang thō deungon djeumpoeng, njan neugoelōng seu'ōn  
 neuba  
 Leupaih koeja tinggaj Peulandō', doea ngon Datō' Boeja raja  
 Oeba' boeja Peulandō' peugah, treu' bè' goendah njan di gata  
 Di kèe keu gata koegaséh that, misé djasat deungon njawa  
 Lom geutanjoë sabé binatang, di poja njan ma'noesia  
 Bè' katakōt bè' kagoendah, tjit talō sah poja tjilaka  
 Meunan djikheun oelé Waki, dalam até boeja that soeka  
 Bahlé tadjā' gata djeunoë, na reudjang sampoë teumpat kita  
 Meung njo taprèh ba' poja sidroë, tréb geutanjoë peue na laba  
 Tadjā' piléh boebeue thō-thō, keunoë ta'atō na meung sigra  
 Boeja seu'ōt njokeu meunan, reudjang-reudjang djidja' mita  
 Boeja angkōt boebeue lé keunan, ka meutamon han treukira  
 Koejapi neuba ngon ōn keuroesōng, sadjan ngon djeumpoeng  
 na siplōh raga  
 'Oh ka meutamon bandoem keunan, Peulandō' jōh njan teuma  
 beukata  
 Wahé koeja dja' koh djeunero, na meung tasinthob oeléh gata  
 Tabōh pageue lingka meuseudjit, teuma tapeudab ngon djeum-  
 poeng doemna  
 Ōn keuroesōng boebeue sadjan, lōn hoekōm njan salah ngon  
 beuna  
 Ba' piké lōn gata salah, dja' ba' bagaih bè' meuda'wa  
 Koeja dja'lé reudjang-reudjang, trōihlé patjang keunan sigra  
 Teuma neudjeulong lhèe-lhèe sihaih, 'oh han leupaih boeja  
 keuloea  
 Kheun Peulandō' djeunoë pakri, tatamong saré geutanjoë tiga  
 'Oh tatamong geutanjoë ban lhèe, soë peulagèe peudab teuma  
 Bahlé boeja tamong dilèe, gata peulagèe wahé koeja  
 Keureuna djih oereueng meunang, gata salahan patōt keureudja  
 Ada' koetamong ngon lōn sadjan, han soë kheun ban ba' koekira  
 Koeja seu'ōt njokeu meunan, boejapi jōh njan tamong lé sigra  
 Boeja tamong reudjang-reudjang, trōih oe dalam djimeuseuni-  
 nja  
 Oeba' koeja Peulandō' kheun, tapeutamong djeumpoeng boebeue  
 sama  
 Na tatamong teuma oe dalam, na meung reudjang lheueh keu-  
 reudja

Poja patéh ban njang djikheun, boebeue ngon djeumpoeng neu-  
tamon doemna

Ōn koeroesōngpi na sadjan, misé piasan oereueng tōt koeta  
Koeja peugah ka habéh keumaih, tamong pantaih geutanjoë doea  
Waki seu'ōt jōh masa njan, taleungo ban koekheun koeja  
Pakri lakoe lōn teugian, gaséh sajang koeja lé gata  
Asaj jōh tjoet teuka haro', lōn meuroeko' poera-poera  
Teuma djeunoë ka teugian, doë tapaban kon lōn sadja  
Taba apoej keunoë batjoet, lōn keumieng tōt poeb roeko' gandja  
Lompi tabri deungon bakōng, ōn keuroesōng sinoëpi na  
Hana bakōng koeja peugah, boelèe tapéh bahpi djeuet taba  
Asaj ka djitém teubiet asab, bè' meularat djeueb angèeta  
Gata bandoea pakri lōn hoekōm, meung goh poeléh lōn teugian  
raja

Rōh lōn hoekōm seun-seun siblah, oereueng salah djeuet keu  
beuna

Meunan djikheun oeléh Waki, koeja dja' lé pantaih sigra  
'Oh meuteumèe apoej ngon tapéh, djiba lé keudéh ba' Wakila  
Peulandō' jōh njan teuma djitjo', djibalōt roeko' poera-poera  
Teukoe Waki djipoera batō', djikheun sikra' treu' lom ba' koeja  
Boenoë koedoeë' ma koepiké, salèh maté gata ngon boeja  
Ka boenoë kon koe'oendang-oendang, boeja meunang talō gata  
Ada' ka talō doë tapaban, ka gra' Toehan ateuch gata  
Poja jōh njan teutab neu'iem droë, dalam até droë salèh pahna  
Hana neutokri peungadoean, meunan waham dalam dada  
Lam até boeja sangat keumang, han djitoeban droëdji pahna  
Lom Peulandō' djikheun meunoë, ba' poja njoë njang di loea  
Peuhoe apoej njan ba' djaroe, koemeung tōt njoë roeko' gandja  
Boeja jōh njan ka teumakōt, peue djimeung tōt kèe lé koeja  
Teuma teupiké dalam até, panè djibri lé Wakila  
Poja peuhoe apoej jōh njan, Waki reudjang lom beukata  
Peue lom koeja tōt meuseugit, bè' djiteubiet boeja tjilaka  
Bahlé maté djih di sinan, djimeung peureulan boenoë gata  
Hana ta'ingat boenoë djimeung kab, goenateu gèt ta'oeseuha  
Teuma djeunoë djeuheut tabalaih, ban djih peugah tan neutoeika  
Poja tōt lé reudjang-reudjang, boeja meulawan salé 'ala  
Djitadjō keudéhpi han leupaih, boeja soesah hana tara

Djigeumeutjie' sōbeuhanalah, toetōng reubah maté pahna  
 Amankeu maté boeja di sinan, Peulandō' beudjalan deungon  
 koeja

Pojapi neuwoë Peulandō'pi djidja', ho njang gala' djisapara  
 Poja seulamat oe roemoh neuwoë, boeja pindoë maté pahna  
 Ada' kon sabab toelōng Peulandō', meuhat doedō' lam kroeng  
 raja

Meuhat maté boeja tinteueng, njankeu oereueng akaj hana.

---

### VIII. KISAH PEULANDÖ' DJA' MOEPOEKAT

Doea plöh sa bhaih wahé polém, meula'én-la'én Waki Boejöng  
Mantong djidoe' djih di sinan, dalam kawan boee ngon loetöng  
Ba' si'oeroë djitjalitra, djimeuhaba Waki Boejöng  
Dja' oedéhta binèh pasi, mita raseuki wahé kawöm  
Ba' habéh doem bè' na tinggaj, tjo' ngon beukaj dja' ta'oesöng  
Djinèh makanan njang tapadjöh, djan tapiöh joeb-joeb arön  
Pat njang tadom joeb-joeb kajèe, ba' meulagèe wahé kawöm  
Keu oelön sidroë ba' tamalèe, keureuna kèe oereueng bri hoe-  
köm

Meunan djikheun doem ba' ra'jat, beudoih leugat wahé loetöng  
Tatjo' oerèt tamè ba' brät, peugèt poekat la'öt ta'aröng  
Dalam la'öt eungköt tasaréng, ta'adèe karéng tapeuhimpön  
Meunan pakat ba' peutoea, beudoih sigra djeueb-djeueb kawöm  
'Oh sadjan tröih oe binèh pasi, doee' meuriti di joeb arön  
'Oh lheueh makeuen padjöh khanoeri, Teukoe Waki joe me-  
himpön

Tadoee' ba' toë bè' saboh sapat, boeleuen seupöt that wahé ka-  
wöm

Ka geumeu'éh ba' malam njan, teutab sinan boee ngon loetöng  
Saré beungoh poetéh oeroë, beudoih sinaroë bandoem kawöm  
Eungkong tjagèe badeue' ngon gadjah, that barölah tadeungo  
ang-öng

Peutoea kheun joe moepoekat, tahareukat geutanjoë doesön  
Dja' tasrat meuj tapeugèt poekat, bè' lalè that mita oentöng  
Mita djalan doem geutanjoë, di sinoë bè' woë oe gampöng  
Keu peurahö toengoë-toengoë, lam la'öt njoë doem ta'aröng  
Oedéb maté bè' takira, bandoem rata sambé oentöng  
Tadong sinoë tamoepoekat, bè' meukarat woë oe gampöng  
Meunan djikheun oe ba' ra'jat, peugèt poekat boee ngon loetöng  
Djisrat poekat hana reuda, oerèt that bha gadjah oesöng  
'Oh lheueh poekat doempeue leungka, habéh kadja lampöng-  
lampöng

Oe tjōng toengoë djipeudieng landja, oe la'ōt raja ma djidajōng  
 Dji'eu kawan eungkōt njang bha, kheun peutoea peuleuheuen  
 dajōng

Kapiōh meung sikléb mata, la'ōt raja bè' that ta'arōng  
 Hana kawan oe teungoh la'ōt, sinoë eungkōt ba' oedjōng poe-  
 sōng

Oelōnteu njoë bah keu pawang, gata sikeulian aneu' dajōng  
 Njang mat amat doe' di darat, njang toengang that tjagèe  
 loetōng

Meung njang la'én meuhat djiploeeng, bie' geusoeen si raja  
 reumbōng  
 Djitie' amat djiploeeng oe glé, geutanjoë maté meu'ampōng-  
 ampōng

Njankeu djeunoë beu tapiké, tateungoh saré oe sagoë poesōng  
 Kawan koe'eu djroh meureuleueng, salèh taleueng ngon keuki-  
 rōng

Ada' kadra deungon seubon, toh na djitjhon djigrōb lambōng  
 Kadang rapeueng deungon moelōih, bè' lé reujōh khém Si Boe-  
 jōng

Djilabōh lé jōh njan poekat, kawan bha that teungoh djitrōn  
 Meurèe-rèe ladjoe oe darat, djijoe karat ladjoe dajōng  
 Pakon salèh han é' djidja', si raja oeta' njang meudajōng  
 Han meung batjoetpi na meugra', koeteumeung sipa' ba'-ba'  
 poenggōng

Saré mèhmoh poela-poeloë, boee sinaroë deungon loetōng  
 Apōh-apah hana bagoë, sabé keudroë misigōng-sigōng  
 Rimoeeng gadjah badeue' ngon himbèe, pakon keu kèe narit  
 meu'oedjōng  
 Ada' kon na kamoë doea lhèe, boee ngon himbèe djipeugah reu-  
 poen

Babah mantong ta'eu njang na, soeara teuma taleungo ang-ōng  
 Ba' beurakah njan taharab, hana sapat piké keu oentōng  
 Meunan djikheun sabé keudroë, seu'ōt doedoë Waki Boejōng  
 Peue kapeugah aneu' bisoë, koeteumeung pseudoë ngon-ngon  
 lampōng

Han é' kheun lé moeka paléh, dja' trōn keudéh woë oe gampōng  
 Geutanjoë toeha djipeudjajéh, han djitém patéh ho njang tasoerōn



Han djipeungo peue tapeugah, that kreueh babah si raja poeng-  
 gōng  
 Meung 'oh koebeudoih meuhat koetjitjah, koeramaih ba' djeuet  
 keu teupōng  
 Kon meung sidroë koepeusalah, bandoem koetjitjah njang me-  
 dajōng  
 Lheueh njan seungab hana lé reujōh, oe darat ka trōih ba' sagoë  
 lingkōng  
 Trōih oe darat ka djiteungoh, gamèh-gamoh boee ngon loetōng  
 Eungkong tjagèe badeue' gadjah, that barōlah ta'eu meurōn-rōn  
 Djitaré' lé landja-landja, peutoea moemat ba' galōng  
 Ka dji'araih wie ngon oeneun, tréb-tréb siseuen djidoe' djiting-  
 gōng  
 Poekatpi kong oerèt daneun, djipeudja' siseun habéh meurōn-  
 rōn  
 Njang leutéh reubah seulinteueng, saré kékengkeueng djimeukōng-  
 kōng  
 Rimoeeng ngon tjagèe saré moepōt-pōt, si raja geuntōt han  
 djeuet keu oentōng  
 Han djeuet sapeue moeka soeang, sit meung badan raja oebé  
 krōng  
 Gadjah seu'ōt moeka asèe, pakon keu kèe narit meu'oedjōng  
 Koeteumeung sromkeu oe la'ōt, bahlé ba' hanjot meu'ampōng-  
 ampōng  
 Poekat teuma rab teungoh ba', makén djipeudja' 'oh meurōn-  
 rōn  
 Binèh peurahō peutoea dong, taré' beu kong djikheun ba' djoen-  
 drōng  
 Lam alōn rab binèh reujeue', sang tjeratjeue' kawan keukirōng  
 Waki gabra djiseumeuseueb, bagaih lam reujeue' peutimoe lam-  
 pōng  
 Peudjab kadja bè' meulajang, eungkōt meuriwang keunoë ba'  
 galōng  
 Teungoh-teungoh joe peudjab kadja, reujeue' teuka lé me-  
 geugoelōng  
 Ka teuloengkob toengoë raja, peutoea han djeuet meung neutrōn  
 Dawō' pah-pōh peugah lagèe, moepoela oelèe lam ie masén  
 Lam reujeue' hanjot meurèe-rèe, moeka asèe proeet ka beuténg

Lam geuloenjoeeng peunoh anoë, Alah haj kamoë troë ie ma-  
 sën  
 Si'at loepöt hana koethèe, eungkong tjagèe djimeukhém-khém  
 Eungkötpi röh that sangat bha, kheun peutoea joe taboe ka-  
 réng  
 Keudéh tamè ba' loeaih data, taböh lam raga 'oh ka thō karéng  
 Njoë njang na djeuet keu raseuki, tamon di pasi joe ba' lapéng  
 Oereueng keumiet sidroë tabri, pantjoeri bè' djitjoe karéng  
 Meung djikeumiet djidoe' keudroë, djipadjöh troë djigoeréng-  
 goeréng  
 Boee djiseu'öt soë keumiet biléh, tajoe djihé sinan joe lapéng  
 Hana meung sidroë aneu' paléh, djidja' keudéh lam ba' boegéng  
 Dawō' djidja' mita peunanta', peue meuroempa' boh djambèe  
 kléng  
 'Oh ka tatham sang tatoela', doem tajoe dja' ho-ho la'én  
 Teuma seu'öt rimoeeng ngon tjagèe, bahlé ba' himbèe joe keu-  
 miet karéng  
 Baranggadoem é' dji'angkèe, moeka asèe bahlé bè' la'én  
 Keupeue goena meung doea lhèe, sidroë himbèe han é' djigiléng  
 Habéh djandji keumaih pakat, dja' böh poekat lam ie masén  
 Bè' tapiöhpi meung si'at, ba' hareukat wahé Polém  
 Han djeuet le peue teungoh moepoekat, ta'eu makén rab kawan  
 seuridéng  
 Kadang meuteumeung boh-boh langsung, pisang klat toeka ngon  
 karéng  
 Meung ka soenggöh tamoepoekat, sit geu'euntat geunab moesém  
 Lah ka tadong doea lhèe at, deungon sahbat beu tamentém  
 Bè' moepoh-poh ngon rakan sahbat, soeara sihat bè' meudeung-  
 kéng  
 Di kèe keu gata sajangkoe that, sang lam djasat aneu' njang  
 koetjhén  
 Na sang aneu' teubiet lam badan, ban sikeulian gata hé polém  
 Njoë njang koejoe keubadjikan, bè' kreueh tjeukang moebiséng-  
 biséng  
 Teuma djikheun lé peutoea, dja' oedéhta lam ie masén  
 Laböh poekat beungoh sindja, eungköt that bha kawan seuri-  
 déng  
 Meunan djikheun lé peutoea, ba' tantra poekat ngon njaréng

Lheueh njan beudoih bandoem rata, kheun peutoea han soë  
djeuet saréng

Geunab oeroë laböh poekat, eungkôt le that hana bandéng  
Han soë kira han é' dapat, djitaboe leugat lam-lam boegéng  
Boee ngon himbèe djipeugèt seueng, djeueb-djeueb reuleueng  
djambō karéng

Djeueb-djeueb data doem djeueb panté, ka djeuet keu glé eung-  
kôt ie masén

Meunankeu boet geunab oeroë, tamam bhaih njoë wahé Polém  
Bahkeu doemnan njang geupoeproë, haba njoë doem meula'én-  
la'én

Lôn sambat kisah Geureuda, po lam miga droë djilajang  
Haba Geureuda lôn kheun batjoet, doedoë meukeusoet keu Waki  
njan

Akhé meukeusoet doem keu Waki, sabab daki akaj tadjam  
Badan raja reuloej boemoë, teumpat djih njoë poetja' glé lanam  
Teukeudirōlah ba' si'oeroë, Geureuda pindoë trōn di manjang  
Di Goenong Hidjō djitrōn sidroë, djeueb-djeueb nanggroë mita  
makanan

Pat na meugah na raseuki, djipeureugi po meusrang-srang  
Trōih oe la'öt binèh pasi, ma djidja' lé oe joeb arōn njan  
Ban dijkalon eungkôt le that, djipeurab leugat Geureuda keunan  
Djipadjōh lé ban jang hadjat, gala'dji that hantom meunan  
Njangka-njangka hantom meunoë, ba' oeroë njoë le that ma-  
kanan

Boee ka djiploeeng teusoet ngon lidah, djidja' peugah reudjang  
jōh njan  
Peue lom tadoe' gata bandoem, Waki kheun peue boet tjit  
kaman

Han tatoepeue eungkôt ka habéh, toeha paléh djipatéhan han  
Han djipeungo oelōnteu tham, aneu' djalang minah sinan  
Dja'lèh kawoë di kah ba' wang, minah reudjang ba' teumpat njan  
Bè' kakeumiet njan eungkôt kèe, moeka asèe koewiet di tangan  
Keudéh keunoë meutoela' deungki, djikheun raseuki Toehan bri  
njan

Sit ka tréb that koemeung peureugi, oe pasi mita makanan

Meunan djikheun lé toeha paléh, meung boh beutéh oebé arōn  
njan

Boelée panjang meulapéh-lapéh, na sang bintéh moeka datō'  
njan

Babah raja na boebé krōng, meung boh idōng boebé toengoë  
njan

Koelét mata kameugoelōng, meung boh poenggōng boebé panté  
njan

Aneu' mata boebé peuet taba', tangkoera' raja hana ban  
Sajeueb doea djan djikeupa', meuhaja' boekét raja njan  
'Oh djideumpé' sangat leusōh, na ban goerōh dalam awan  
Teupat djidoe' di Goenong Hidjō, djilalō mita makanan  
Peulandō' tahe teukab bibi, pakon koedja' bri eumpeuen si djih  
njan

Koepoh ba' maté njan koetadi, pantjoeri Datō' Srangmanjang  
Ba' tjagèe Waki djipeugah, dja' lèh kah ngon rimoeeng kaman  
Katham landja pantaih-pantaih, poh ba' reubah ba' maté sinan  
Bè' na meung djan djipoh balaih, doea droë kah sidroë datō'  
njan

Kawiet djaroe kasalib djoengka, that tjilaka si paléh njan  
Karamaih ba' djeuet keu sira, tō' tjilaka hantom moemeunan  
Rimoeeng beudoih deungon tjagèe, moeka asèe kaprèh sinan  
Meunan djikheun rimoeeng ngon tjagèe, beungèhdji han mée  
tjeukén han ban

Kakeu djiploeeng meudilée-dilée, dji'eu lagèe tō' paléh njan  
'Oh ban dji'eu bit raja that, djipeurab djitanjong soë njan  
Soë nan gata wahé Datō', peue boeet tadoe' padjōh ikan  
Eungkōt njoë doem areuta kamoë, soerōt djeunoë kawèh reu-  
djang

Peue boeet keunoë toeha paléh, kawèh keudéh hé Srangmanjang  
Koeteumeung poh kah ba' teu'éh, datō' paléh that tjilaka  
Geureuda seu'ōt pantaih-pantaih, ma djipeugah sigra-sigra  
Peue doë kakheun meunoë meudéh, meung goh habéh leugat  
koeseuba

Proetkoe that deue' koebeudoih ba' éh, karéng biléh mangat  
raja

Toetō seungkoë that datō' paléh, koetrom keudéh njan ba'  
moeka

Djipeurab lé pantaih-pantaih, djireupaih Geureuda raja  
Ban djihila niba' beutéh, aneu' paléh bè' meuseunda  
Kamoë toeha badan leutéh, kawèh keudéh bè' binasa  
Teu'otkoe njoë meunjeum peudéh, aneu' paléh djoengkat raja  
Rimoeeng tjagèe saré mèhmoh, ka'èh-ka'oh ngon Geureuda  
Djiklo' djiklông han soë toe'oh, reu'oh peunoh ka bandoea  
Geureuda kheun haj ka'ingat, meung 'oh koemat djeuet keu sira  
Koerámaih ba' hantjō loemat, meung ka koemat koosalib  
djoengka

Rimoeeng tjagèe han djingo lé, djiklo' sabé oereueng toeha  
Geureuda beungèh han soë toekri, ma djimat lé ka djiwiet doea  
Pataih takoe ka meugoelé, kakeu maté sinan teuhanta  
Tjagèe djiploeeng ka meudeuroe, djitadjō ladjoe ba' peutoea  
Geureuda po ladjoe-ladjoe, até koejoe meunjeum lia

Dalam oeteuen ka djidja' doe, dji'eu lakoe poera meusa  
Tjagèe ka trōih oe binèh pasi, Alah pakri ka tjilaka  
Kamoë doea ka djitadi, lé pantjoeri ka binasa  
Rakan kamoë sidroë maté, ka meugoelé dalam djoenga  
Ka djitrom ba' oelèe até, teuga boekon lé Datō' Toeha  
Han dji'isib meung boebé padé, baranggadoem lé djih teutampa  
Seu'ot gadjah asèe paléh, dja'lèh ka'éh haj tjilaka  
Han sakon djeuet moeka badjeueng, sidroë oereueng han é' dji-  
tampa  
Meung oereueng tjhi' leumoh toeleueng, kah njoë oereueng that  
peukasa

Waki seu'ot peue kapeugah, kadja'lèh kah keupō' raja  
Kapoh ba' maté njan katjitjah, bè' meung babah njang na raja  
Meu'é' kapoh tō' paléh njan, kawoë ninan koebōh panglima  
Si Nja' Rajeu' nan koerasi, djarōë gaki radja raja  
Himbèe ngon tjagèe djeuet keu Sipa'i, djan kah peureugi dji-  
'iréng lingka  
Gadjah leungo até gala', bah kamoë dja' koetjoeba tampa  
Koepoh ba' maté koehantjō oeta', teu'eumpa'-eumpa' datō'  
meureuka

Gadjah beudoih ka djitindja', até gala' hana tara

'Oh trōih djidja' ba' tamon eungkōt, meuseu'ōt sambōt deu-  
ngon Geureuda

Teubiet keunoë peue boet lam garōt, mè noë joem eungkōt njang  
ka kaseuba

Bè' di sinoë kameung meureubōt, koewiet atōt koeplah-di moeka

Ba' that raja han koetakōt, Geureuda seu'ōt bōh katjoeba

Gadjah tadjō ma djireupaih, alōh alah han treukira

Ba' ri lakoe sangat djoeah, panè doë kah aneu' badjeueng

Hana meung djan droë koepeudjeulaih, koetrom ba' pantaih ba'  
seulinteueng

Gadjah beungèh hana tara, meuhila-hila saré kéngkeueng

'Oh djibeudoih ka djitampa, Geureuda seumpom ba' kareueng

Gadjah djiploeeng leugat djigoendja, djikheun hoka aneu' ba-  
djeueng

Kèe teungoh doee' djidja' wa-wa, ba' djisangka hana toleueng

Djikira meung djih njang na teuga, kèe njang toeha djikeu-  
meung kéngkeueng

Gadjah leugat ma djikatjèe, djiploeeng meurèe-rèe lam ie pa-  
seueng

Peulandō' kheun djéh sie asèe, boee ngon himbèe soera' seu-  
meureueng

Rimoeeng badeue' djloeéh ngon tjàgèe, saré kra-krèe djikhém  
kéngkeueng

Ma djitanjong djikheun soë pagab, koe'eu meukarat talangoee  
kroeeng

Peue boet keunoë tamè reubat, soë joe meukat djibōh ateuh  
roeeng

Pat salèh kroeeng tameueng bōh Ihom, di roeeng koekalon ta-  
meukat joeeng-joeeng

Sit meung babah njang na mantong, meung djiko teubong si  
geupoh geusoeen

Pakri meung keu gob djeuet kapeugah, leubèh lom kah kala-  
ngoee kroeeng

Gadoh ngon ingat apōh-apah, srōt aroeah ba' langoee kroeeng

Bè' njang geubōh kah keu Waki, meung Sipa'ipi han geutém  
toeeng

Meung doemnan bhe bit geutoeri, teukhém Waki 'oh saré gleuen  
Teuhah babah leumah goesi, meutaloem bibi ka meukoeloeem



Gadjah jöh njan malèe keudji, tanjong Waki pakon kaploeeng  
 Himbèe tjagèe soera' gabra, djikheun gata sangat geusoeen  
 Doeroë roengkôm koe'eu that bha, soenggôh raja peue tjit geu-  
 soeen

Gadjah teukoej toendô' oelèe, that bit malèe gob kheun geu-  
 soeen

Teulaihpi that hana lagèe, paléh that kèe meusawa' rangkeuem  
 Hana moepeue-peue kèe djeuet 'ajéb, sabab ngon siblét poetéh  
 toeleueng

Ngon sabab doeroë kèe djeuet 'ajéb, hana djan tréb meuh at koe-  
 meung ploeng

Koeteumeung boih droë baranggaho lé, niba' djipaké koeteu-  
 meung meugloeeng

Meunan leumah ba' djipiké, djibeudoih lé landja djimeung  
 ploeng

Peulandô' hej ma djilambé, gata até sang timoh di roeeng

Barang peue boeet han djan meung piké, tatadjô lé lam-lam  
 rangkeuem

Peurangeuj gata sang oereueng poengo, baranggaho djikeumieng  
 ploeng

Narit si njan katém leungo, meung si ano boebé seukeuem

Taniet asèe djidrôih bangké, ba' thatdji lé djiplah reukoeeng

Bè' na sagaj trôih lam até, sigeupoh djahé 'akaj boedoeeng

Meung kon ba' kèe teuka narit, peue ta'isib djih kheun  
 djitjreuen-tjreuen

Gadjah leungo saléh njo bit, ban njang narit peutoea keudjroen

Lheueh njan Waki peugah padan, deungo kaman kah njoë ban-  
 doem

Ban njang koekheun bandoem rakan, bè' bantahan saloen ma-  
 loen

Pakat ba' kèe njoë na saboh, tateumeung poh Geureuda ba-  
 djeueng

Bandoem kah njoë dja' kabeudoih, dja' meurawoh lam-lam oe-  
 teuen

Bè' meung sidroëpi na leumah, kaminah sinan lam goe'oeng

Bahlé meung kèe sidroë peurab, di kah ka ndab sinan lam  
 goe'oeng

'Oh koemeuhej bè' teudhab-dhab, koekheun larab that koeloepa

Habéh piké keumaih pakat, Waki leugat dja' lé ladjoe  
 'Oh sadjan trôih ba' Geureuda, djitanjong landja panè talaloe  
 'Oh ban leumah dji'eu roepa, djikheun landja Alah haj koe  
 Koesangka soë-soë dilôn gata, Alah haj radja han tom koe'eu  
 Ka padoem tréb hana tom teuka, di lôn gata röh éndatœ  
 Éntœkœ asaj masa dilœ, pakrikeu kœ djeunoœ haj Teungkœ  
 Dœsakœ le sang ôn kajœ, jöh dilœ tan koethœ haj doe  
 Geureuda seu'ôt teuma meunoœ, pakon kamoœ tajœœ dja' eun-  
 droe

Kameung dja' poh oelônœ njoœ, ra'jat keunoœ tajœœ dja' palœ  
 Peulandô' seu'ôt teuma meunoœ, hana kamoœ thœ sigeutœ  
 Hana lôn thœ boetdji meunoœ, hoka djeunoœ Si Hantœboœœ  
 Sampöh mata poera djimoœ, Peulandô' njoœ that bit le lakœ  
 Djeunoœ haj ajah neudœœ' sinoœ, oelônœ njoœ neukheun-kheun  
 lakœ

Pat njang salah neupeuroenoœ, areuta lôn njoœpi na sigeutœ  
 Ka padoem tréb lôn hareukat, pajah lôn that hana lakœ  
 Mata peudéh moeka poetjat, keurawat badan lôn haj koe  
 Aneu' miet djéh doem tapagab, sabab djoengkat djipoh éndatœ  
 Geureuda jöh njan ka teusinjom, maméh ranôm atédji seu'œ  
 Teutab sinan makeuen minom, Peutoea jöh njan poera beuradœ  
 Djipoera pét na sidjamong, djikli' meudeungong djihej éndatœ  
 Na sikeudjab djipoera pét, Peulandô' soelét le that lakœ  
 'Oh ban djaga djimoœ meuréb-réb, dônja njoœ ka séb hana lé  
 nabœœ

Han lé hawa keu dônja njoœ, saléh djeunoœ koelôb lam kœboœ  
 Ngon ie mata saré djôhdjah, Alah-Alah haj Toehankœ  
 Geureuda tanjong pantaih-pantaih, peue boe salah njang djeuet  
 haj tjoetjœ  
 Bè' neutanjong han djeuet lôn peugah, teungoh soesah oelônœ  
 haj doe

Atékœ njoœ rasa beukah, makén pantaih djitanjong ladjœ  
 Geureuda kheun kœpi goendah, peue peurintah hé aneu' teung-  
 kœ

'Oh lœueh djimoœ sampöh mata, peugah landja ba' éndatœ  
 Oelôn djeunoœ djadéh maté, that meusampé meuteumeung éntœ  
 Keudéh keunoœ djipoera goelé, Peulandô' Kantjé le that lakœ  
 Ka neutanjong bah kœpeugah, saboh peurintah boenoœ lôn eu

Dalam teungeut lôn hé ajah, karōnja Alah lôn eu lakoe  
Teungoh lôn éh teungeut mangat, leumah 'alamat Toehan bri  
sroe

Lôn loempoë nanggroë keumeung kiamat, gadoh ingat oelōnteu  
koejoe

Boemoë langèt habéh hantjō, teupoerō bintang meutaboe  
Kareueng batèe habéh hantjō, ie la'öt le ngob poetjō' oe  
Ngob meureutjoe doemna goenong, geumpa meudeungong meu-  
go'-go' ladjoe

Sabé meugo'-go' hana teudōh, langèt roentōh goenong hantjō  
Ma'noesia habéh maté, timoe bangké doem meutaboe  
Lam ie raja habéh ilé, han sapeue lé haj doe teungkoe  
Keureutam-keureutoem boemoë ngon langèt, doemna manjèt han-  
tjō leuboe

Toepheun ribōt goerōh kilat, ngon seupōt that hana lakoe  
Meunankeu haj doe oelōn lihat, teungeut si'at jōh lôn beuradoe  
Poetjō' arōn njoë njang na leumah, la'émpi keumaih doem ie  
paloe

Sinan njeum lôn hana moeminah, oelōn tangah lakèe bantoe  
Ba' Toehan lôn meuhon titah, ie raja bōhbah dji'é' ladjoe  
Kareueng boekét habéh roentōih, badè goerōh that meu'oe-'oe  
Langèt boemoë habéh loerōh, Alah haj beh pakri lakoe  
Seureuta lôn moë hana teudōh, lôn kli' reujōh paro ngon soe  
Geureuda deungo saré pahpōh, adjaj ka trōih hé Toehankoe  
Alah-Alah ho koedja' kèe, meurèe-rèe djimoë lé ladjoe  
Koekeumieng dong hana kajèe, ie meurèe-rèe ngob poetjō' oe  
Djimoë djikli' saré reujōh, Alah haj beh ka meulakoe  
Djeunoë matékoe ie sampōh, njawong toebōh hantjō leuboe  
Djigoelé droë ateueh boemoë, tango djimoë that leusōh soe  
Pakri keu kèe ho trōih djeunoë, oeroë njoë sampoë ngon 'oemoe  
Djiseumpom droë djigoelé-goelé, kèe njoë maté hé aneu' teung-  
koe

Gata sadjan lōnpi tjré-bré, boh até oeroë njoë koe'eu  
Ba' oeroë njoë keupoetōihsan, boekon sajang asoë keuleumboe  
Boekon that weueh ba' koepandang, oelèebalang maté sadjan  
doe

Ngon ie mata rō that djingeurang, Peulandō' reudjang jōh njan  
djimeusoe

Bè' lé goendah that doeka'an, doë tapaban kheunda' Toehankoe  
 Kon meung gata njawong hilang, lönpi sadjan lön lam koeboe  
 Njang meunjawong bandoem maté, peue tapiké ta'iem hé doe  
 Njandoem 'akaj Peulandō' Kantjé, ma djikheun lé na saboh lakoe  
 Niba' kamoë leumah piké, njeum lön han maté gata haj doe  
 Bah koe'ikat gata koeranté, na bè' ilé ie raja paloe  
 Han meuteumeung kalon meung bangké, doedoë pagé soë na  
 'oemoe

Soë na oedéb djikanoeri, na meung meuri djeurat éndatoe  
 Joeu beuet doe'a oeba' paki, teukanoeri ban njang lakoe  
 Bri seudeukah deungon tahlé, pahla neubri lé Toehankoe  
 Ban sikada é' teudapat, tröih-tröih ba' hat hamèh raboe  
 Töt koemoenjan beuet di djeurat, meulia that koeboe éndatoe  
 Bahkeu doemnan njang ragam njan, djeunoë la'én njan hé boh  
 até

Oeba' bhaih njoë le peue lagèe, deungo hé sampèe njoë lön misé  
 Geureuda jöh njan jo meutat-tat, djeunoë meuhat djadèh maté  
 Peutoea meuhej lé ngon ra'jat, meugrietneu that landja djipang-  
 gè

Hoka kah doemna rakan sahbat, keunoë leugat jöh goh koeroehé  
 Beu habéh doem keunoë kapeurab, reudjang leugat bè' kadong  
 lé

Landja djiploeeng ta'eu teudab-dab, djiloempat si'at ka tröih lé  
 Ban sadjan tröih djitanjong leugat, peue boe pakat kamoë ta-  
 panggé

Peue katanjong aneu' djalang, moeka soeang boeta até  
 Dja' meuteumeung bandoem ngon wang, ampôn sbarang dèesa  
 kah doem lé

Njoëkeu oeroë keusoedahan, lheueh njoë karam hantjō reulé  
 Ba' oeroë njoë doem tapandang, singoh hilang njawongteu tjré  
 Ma djitadjō meudilèe-dilèe, éndatoe kèe han koeteumeung eu lé  
 Badeue' gadjah loetōng ngon himbèe, poemeu'aih kèe hé doe  
 boh até

Saré mèhmoh keulangkabōt, ba'-ba' teu'ōt djiseumah lé  
 Wie ngon oeneun nab ngon likōt, djiseu'ōt dèesa hana lé  
 Hana dèesateu ba' kamoë, sara djimoë djigoelé-goelé  
 Gadoh ingat hana soenjoë, tō' paléh njoë teu'éh sang bangké  
 'Oh teukeudjōt jo meutat-tat, djimoë leugat han tatoekri

Peutoea kheun piōh si'at, njoë na sahbat bandoem saré  
 Bè' ta'oebah ban koepakat, geutanjoë rab keumieng maté  
 Meung si'at treu' trōih alamat, tanda Kiamat njan phōn lahé  
 Soë na oedéb njang seulamat, sakét mangat beu tapiké  
 Beudoih bandoem dja' tjo' oerèt, ri njang gèt-gèt daneun ngon  
 awé

Dōnja njoëpi rab meuloengkob, sit hana got langèt reulé  
 Kakeu djidja' djiploeeng djidhot-dhot, deungon oerot raja oebé-  
 bé

Djibeureukaih landja-landja, oerèt that bha tamon boebé glé  
 Peutoea kheun landja-landja, ikat beu sigra bè' tadoee' lé  
 Geureuda tanjong soë ta'ikat, oerèt le that tapeuhasé  
 Peulandō' seu'ōt teuma leugat, droëneu meuhat bè' ie goelé  
 Bè' ie raja rōn oe la'ōt, na meusangkōt toleueng bangké  
 Ba' arōn njoë neugisa leugat, bè' neutakōt keu meunaté  
 Meung si'at treu' teuka toepheuen, angèn ngon oedjeuen ie  
 dji'é' lé

Teutab maté bandoem tjateueng, meung toleueng han me-  
 teumeung eu lé

Han tatoepat mita koeboe, djeurat éntoe njang ka maté  
 Han pa'idah meung sigeutoe, ikat ladjoe bè' le piké  
 Di geutanjoë ban njang oentōng, Waki Boejōng ka djimoë lé  
 Ngon ie mata meugeugoelōng, Waki Boejōng poeweueh até  
 Geureuda sadjan ka djipoh droë, poela-poeloë djigoelé-goelé  
 Toembō' dada djireuet-reuet droë, aneu' bisoë bit djadèh maté  
 Peulandō' kheun oeba' gadjah, ikat di kah bè' kadong lé  
 Ma dji'ikat pantaih-pantaih, Geureuda soesah goendah até  
 Oerètpi raja oebé-bé ba' oe, djiroet ladjoe ba' oelèe até  
 Panjang-panjang soeloe-soeloe, awé dagoe kong han sabé  
 Habéh oerèt lhèe plōh seun brat, Waki peurab ma keunan lé  
 Tjoeba hé doe tageuriwat, pat njang brō' that oerèt maté  
 Pat njang han kong na koetopat, tamah leugat ngon-ngon awé  
 'Oh lheueh djijoe djigra' lé droë, poetōih taloë doem boebé-bé  
 Pat njang ka brō' taloë poetōih, habéh loerōh bandoem reulé  
 Ba' arōn leungo na sang geumpa, kajèe raja rab meugoelé  
 Peutoea kheun dja' lèh tjo' lom, ri njang kong-kong sabé-sabé  
 Djidja' lé pantaih han djan djidong, djiseumpom 'oh djipoewoë lé  
 Ban saboh glé ka habéh djom, le that mantong han é' kheun lé

Dji'ikat lé saré mèn-moh, 'oh djeunoh han djeuet oengie' lé  
 Himbèe tjagèe saré dèhdoh, keutèh-keutoh bandoem saré  
 'Oh saré kong ka dji'ikat, djigeuriwat hana é' lé  
 Hana meung djeuet djimeu'oengkab, Waki peurab djitanjong lé  
 Pakri ban djeunoë ajah meutoeah, ba' neupeugah neupeulahé  
 Pat njang han kong beu neupeugah, na lôn joe tamah bè' teu-  
 keusé

Geureuda kheun han lé koeat, hana sapat hé boh até  
 Peulandō' hej bandoem ra'jat, ngon isarat han that lahé  
 Djipeurab lé pantaih leugat, toh boe pakat djeunoë tapiké  
 Pakat njang na leumah ba' kèe, angkōt batèe kah njoë bandoem  
 Tamon keunoë jobj kajèe njan, tabōh nisan geutanjoë bandoem  
 Njang that raja batèe itam, kadja' reudjang kah njoë bandoem  
 Keu geunantoë tabōh nisan, Geureuda reudjang tanjong peue  
 takheun

Salèh oelôn tameung tipèe, meunan lagèe ba' koepeunjeum  
 Peutoea kheun bè' le lagèe, keureuna kèe kon aneu' badjeueng  
 Toembō' dada djireuet ngon oelèe, moë meurèe-rèe Waki Boe-  
 jōng

Meung ba' bibi ta'eu lahé, srabkeu até Geureuda badjeueng  
 Hana patōt lôn meudeungki, bè' Alah bri até teusreueng  
 Ba' keurawat djaroë gaki, soë njang deungki maté seulinteung  
 Toehan balaih keu djih la'nat, soë njang oemat até meutjabeueng  
 Njankeu haj doe beu ta'ingat, bala ngon nè'mat kon ba' oereueng  
 Geureuda deungo mangat that até, ma djikheun lé narit dji'am-  
 peueng

Koe'eu batèe raja boëbé-bé, ka djeuet keu glé tamon meureu-  
 leueng  
 Batèe le that koe'eu lingka, ho tameung ba koe'eu kèngkeueng  
 Ma djiseu'ōt lé peutoea, lôn toerab lingka lôn bōh ngon ka-  
 reueng

Lôn peugèt njoë koebah gata, kadang teuma tinggaj toeleueng  
 Tō' hat maté doedoë gata, njoë keu tanda batèe kareueng  
 Teungoh-teungoh peugah haba, batèe that bha djeuet keu reu-  
 leueng

Ba' gadjah keureuléng mata, djibahsa lé Waki badjeueng  
 Peue lom kadong peurab landja, tō' tjilaka peuhantjō toeleueng



Kaseumpom batèe njang raja, kapoh di moeka bah teugageueng  
 Bè' na meung djan djibleut mata, kapoh landja ba' teulinteueng  
 Binatang paléh le that bitjara, bah mangat djra aneu' badjeueng  
 Beudoih gadjah djitjo' batèe, ateueh oelèe phôn djidijeueng  
 Geureuda kheun éh peue lagée, kameung poh kèe aneu' badjeueng  
 Gadoh ingat hana djithèe, rimoeeng tjagèe djitadjō kékgeueng  
 Bandoem rata djimat batèe, Geureuda asèe djikli' seumeureueng  
 Ba' tangkoera' phôn djiseumpom, batèe ghon-ghon boebé-bé ba-  
 teueng

Moebalé' mata ka teudjeulong, ka teudong sang mata oedeueng  
 Ngon ie babah ka meulandong, boee ngon eungkong djisoera'  
 kékgeueng

Njanpi hana katoepeue lom, djeunoë koepeudjom Geureuda ba-  
 djeueng

Batèe raja boebé-bé krōng, phôn ba' hidōng pataih toeleueung  
 Asoë ngon toeleueng habéh loerōih, Alah haj beh teuma djikheun  
 Alah haj kèe adjaj ka trōih, makén soenggōh djipoh doem kék-  
 keueng

Djibōt batèe hana teudōh, lhèe peuet reutōih sigo djiseumpom  
 Teusoet ngon oeta' djipo darah, djikheun pantaih rasa njan lom  
 Hantjō moeka reuloih babah, tō' gadjah plah kapadjōh lom  
 Njanpi han lé kamoetah darah, di sinoë djeulaih njawong koe-  
 peudjom

Teungoh djikheun sara djipoh, gadèh-gadoh boee ngon eung-  
 kong

Njanpi han djra haj tō' geupoh, tjoeba beudoih djeunoë njan lom  
 'Oh lheuuh maté koeboih euntèe, datō' asèe kapadjōh lom  
 Djeunoë koetōt koepeukroej abèe, tō' jèe pangkèe bah koeping-  
 kom

Koepeungeut sinoë koetipèe, joem eungkōt kèe han kabri lom  
 Kèe hareukat kah toeeng wasé, that meusampé po rimoeeng teu-  
 gom

Kasangka droëkeu han maté, han soë pinah lé ba' njang ka-  
 dong

Han maté lé teugoh raja, han soë tanpa djidjeuet teugom  
 Meung ngon kèe njoë han djeuet meuda'wa, koesalib djoengka  
 koegidong-gidong

Koeramaih ba' djeuet keu sira, sigeupoh raja meung badan  
mantong

Meunan djikheun ba' Geureuda, peutoea ma kheun teuma lom  
Kasoera' haj doemna ra'jat, ngon soera' njang that ba' meudeu-  
ngong

'Oh lheueh maté njan Geureuda, soera' gabra boee ngon eung-  
kong

Djihej saré meugeuloera, meulingka bandoem ka djidong

Batèe djimat doemdji saré, djisrom bangké Geureuda ka djom

Djisoera' ngon djihej saré, njeum reuloih glé soe meuda'om.

---

## IX. KISAH ABOE NAWAIH

Teukeudirōlah teuma doedoë, ba' si'oeroë sabda Radja  
Aboe Nawaih deungo kamoë, nam boh keunoë leumo taba  
Beu na djanggōt doem leumo njan, ngon sadjan oetōih beukata  
Koepoh maté meung hana njan, ingat bè' han maté gata  
Lōn bri 'idah toedjōh oeroë, nam sampoë leumo ba' taba  
Njang meudjanggōt marit pandoë, lōn pasoë sireutōih dina  
Meung hana trōih droë ta'ingat, koepoh meuhat maté gata  
Datang seumah ampōn Dèelat, ban njang hadjat Doeli Beuginda  
Ka han reudjang trōih bah 'oh leumbat, 'oh ka koeat lōn bitjara  
Toelōng Toehan Rabōn Èdat, trōih hadjat Meuhameulia  
Aboe Nawaih teuma geuwoë, meuhon droë niba' Beuginda  
Oe teumpat ka ladjoe geuwoë, doem meuntroë sinan beukata  
Ba' siseun njoë Aboe Nawaih, sang han leupaih deungon radja  
Njan pakri djeunoë rèt njang djlahi, ho kilaih pakri tadaja  
Meuhat radja neupoh maté, meung han hasé kheunda' radja  
Meunan marit doemgeu saré, geupiké han é' soë daja  
Aboe Nawaih 'oh trōih geuwoë, doe' sidroë piké lam dada  
Pat leumo njang meunan bagoë, marit pandoë djanggōtpi na  
Sang-sang soesah niba' até, geupiké kheunda' Beuginda  
Meuhat geutakōt teuma han hasé, neupoh maté oeléh radja  
Trōih nam oeroë deungon malam, sinan diam piké landja  
Teuma leumah ka meuri pham, oeroë nam geubeudoih teuma  
Aboe Nawaih geudja' sidroë, dalam nanggroë pandang roepa  
Ka meuteumeung oereueng nam droë, djanggōt han soë njar  
meureula  
Geubri saleuem teuma keunan, moemat tangan doe' seureuta  
Aboe Nawaih tanjong jōh njan, peue geubōh nan oeroë njoë ka  
Padoem oeroë njoë ka na boeleuen, tjoeba kheun ban nam droë  
gata  
'Oh geudeungo meunan hireuen, oeroë boeleuen moephōm hana  
Geuseu'ōt hōm boeleuen oeroë, di kamoë hana trōih djoega  
Aboe Nawaih seu'ōt meunan, pakri roë lōn hadab Radja

Bahlé singoh lôn dja' kaman, beuna sadjan ban nam gata  
 Meungadab Doeli Soelôthan, han djeuet han gata lôn bawa  
 Meunan pakat teuma djeunoë, oereueng nam droëpi ka rila  
 Siplôh dina geubri sidroë, 'oh sampoë singoh ba' Radja  
 Singoh geunab oeroë toedjôh, leumo meureugôh nam boh geuba  
 Trôih oe balè teuma soenggôh, dong di barôh dêelat radja  
 'Oh ma'loem piôh ba' makam, oereueng nam piôh ba' djeumba  
 Teuma sabda Tjahi Alam, pakri matjam njang lôn joe ba  
 Toh taba leumo lôn peugah, ban njang oelah njang lôn kata  
 Aboe Nawaih lé isjarah, sadjan seumah ba' Beuginda  
 Ka neutoenjo' ba' oereueng nam droë, njan djeunoë leumo ka  
 lôn ba

Sabda radja neukheun meunan, na patôt njoë njan ma'noesia  
 Lôn joe ba leumo meureugôh, njang soenggôh pandoë beu-  
 kata

Tapeugah njoë pakri djatôh, gata koepoh pakon hana  
 Aboe Nawaih seumah doedoë, ampôn kamoë Po Meukoeta  
 Neutanjong ba' oereueng nam droë, njoë peue oeroë ngon boe-  
 leuen ka

Teusinjom Njangdipeutoean, sabda toean tanjong sigra  
 Haj peue oeroë njoë geupeunan, bilangan boeleuen padoem ka  
 Datang seumah oereueng ban nam, walahoe a'lam Po Meukoeta  
 Boeleuen oeroë hana trôih pham, Tjahi Alam han trôih djoega  
 Teuma landja datang seumah, Aboe Nawaih meunoë kata  
 Njan pakri ampôn Dêelat Sjah, ban lôn peugah na meutoeka  
 Doem han meu'oh boeleuen oeroë, siplôh bagoë la'én ganda  
 Di lôn sah leumo njoë ban nam droë, marit pandoë djanggôtpi na  
 Meung njo oereueng djitoe'oh kheun, oeroë boeleuen na keunira  
 Njoë bit leumo roepa bajeuen, Poteu hireuen deungo haba  
 'Oh neupiké njoë bit meunan, peue énsan djanggôt meusén nga  
 Keupeue doë rôh marit oetôih, wadjéb harôih hana bida  
 Meung njo tan piké njang halôih, njokeu han trôih ma'noesia  
 Saban-saban ngon binatang, bè' tapandang djanggôt sahdja  
 Kamèng randô' doem sibirang, djanggôt pandjang hibat roepa  
 Padoemna beuroedjoe' balèe, meutèe-tèe djimeusoeara  
 Toh pa'idah na meuteumèe, djih geuthèe 'akajdji hana  
 Adat meunan oereueng ban nam, ta'eu matjam ma'noesia  
 Bit njo beuna 'oh halôih pham, piké dalam até doemna

Teubiet 'akaj baranggasoë, soë peulheueh droë niba' bahja  
 Bōh akhirat bōh dōnja njoë, sinaroë 'akaj tamita  
 Meung tan 'akaj dan 'èleumèe, oedéb angkèe sia-sia  
 Hana teudōh keunong tipèe, le that lagèe djipeusoena  
 Meung na 'èleumèe deungon 'akaj, malèe kandjaj han di gata  
 'Oh doem soesah meunan sagaj, meung na keunaj roegoë laba  
 Poteu bri dina sireutōih, sabab oetōih han binasa  
 Aboe Nawaih Koeala Harōih, keudéh trōih teupat dirinja  
 Nam plōh dina bajeue djeunoë, meugah han soë le bitjara.

---

## X. KISAH KALI RADJA HARŌNON RASJIT

Ama ba'adoe haj boh até, tadeungo hé toeha moeda  
Teuka sidroë aneu' Meusé, keunan trôih lé maniaga  
Oe dalam nanggroë Bôgreudat, doee' meukat banja' blandja  
Ka padoem tréb sinan leumbat, le hareukat ka han tara  
Padoem na tréb teuma doedoë, peukeumaih droë kheunda' gisa  
Doem areuta himpôn djeunoë, kheunda' woë oe Meusé landja  
Hana leupaih teuma jôh njan, teukeudi Toehan leumah rahsia  
*Kala kada* sit ka meunan, tapaban ilah ngon daja  
Ba' simalam njan beumimpi, beu'éseutiri meunan roepa  
Meukawén ngon aneu' Kali, djeunamèepi ka lheuuh geuba  
Limong reutôih djeunamèe geubri, Gôseuti aneu' Mèelana  
'Oh teukeudjôt niba' mimpi, peue ta'abi ingat lam dada  
Beungoh oeroë njan geupeugah, 'oh leumah rakan sineuna  
Aneu' Kali lôn meunikah, ka soedah djeunamèe lôn ba  
Teuma djeunoë meusjeuhoerah, seun sibabah meuthèe haba  
Ba' Kali njanpi ka meugah, keunan langkah trôih Mèelana  
'Oh ban trôih ba' aneu' Meusé, geutanjong lé bit di gata  
Meukawén deungon boh até, ka hasé tabri ngon dapha  
Aneu' Meusé teuma peugah, bit leumah meunan rahsia  
Teuma Kali njan seu'ôt bah, ka nikah deungon aneu'nda  
Toh tabri kaman djeunamèe, oebé lagèe tapeuhaba  
Aneu' Meusé djaweueb han mée, peue neulakèe ba' lôn dapha  
Njan sabab oelôn meuloempoë, di kamoë meukawén hana  
Beungèh K'halhi hana bagoë, bri keunoë bè' lé meuda'wa  
Ka geurampaih aneu' Meusé, geutjo' lé doemna areuta  
Habéh doempuepi ka hana lé, tjo' sabé djeueb-djeueb peukara  
Njang na tinggaj meung di badan, peukajan badjèe ngon idja  
La'én habéh sikeulian, tinggaj tan sapeue areuta  
Kakeu soesah aneu' Meusé, gadoh piké tan bitjara  
Blandja hana sapeue lé, roesa' até oereueng teuka  
Dja' adoe haj keudéh keunoë, djeueb meuntroë sigala toeha  
Tan beurani baranggasoë, keureuna njoë Kali Radja



Lagi oereueng meu'èleumèe, doem geuthèe salah ngon beuna  
 Na patôt tateugah goerèe, meung kon teuntèe han keureudja  
 Aneu' Meusé sangat soesah, ho peugah han sakon goena  
 Hankeu na soë tém peurintah, keureuna meugah Kali Radja  
 Aneu' Meusé doee' lam goendah, teukeudirôlah saboh masa  
 Sidroë inong meukat makanan, le seunoeban 'oemoe toeha  
 Aneu' Meusé djidoee' sinan, beuhoetangan 'oh bè' lapa  
 Teuma kheun inong toeha njan, tadjâ' kaman keudéh gata  
 Meung soë la'én pa'idah tan, 'èleumèe han 'akaj hana  
 Malingkan ba' Aboe Nawaih, roepa tjeudaih le bitjara  
 'Èleumèe le piké bagaih, hilém leupaih djeueb peukara  
 'Oh djingo lé aneu' Meusé, meunan piké inong toeha  
 Meurasâ oe dalam até, djikheun lé oelôn neudja' ba  
 Lôn dja' sidroë hana ladém, oereueng malém ramaih hana  
 Kadang-kadangpi han geutém, gata kajém keunan teuka  
 Teuma Adjô njan dja' sadjan, boengong tangan mè ban kada  
 'Oh trôih keudéh moemat tangan, Adjô kheun ban ba' sjoëkoena  
 Na sangga-sangga hamba Alah, keunoë langkah nanggroë kita  
 Hana sapeuepi na salah, keunoë soedah maniaga  
 Njang na batjoet boetan Paki, beumimpi saboh rahsia  
 Meunikah ngon aneu' Kali, sang djibri meudoem ngon dapha  
 Trôih Kali teuma dja' lakèe, djeunamèe akan aneu'nda  
 Teuma pakri njang meuteuntèe, ban 'èleumèe meunan djeumba  
 Aboe Nawaih seu'ôt meunan, toh hoka droë njan lôn paré'sa  
 Aneu' Meusé teuma sampoë, tanjong njoë haj oereueng moeda  
 Pakri ban di gata loempoë, ba' kamoë peugah oebé na  
 Leubèh bè' koereuengpi meunan, ba' Toehan leumah neu'eu ka  
 Aneu' Meusé peugah jôh njan, ban peureuboetan leubèh hana  
 Djeunoë deungon gaséh toean, oelôn tan sinoë saboh na  
 Keureuna lôn saboh dagang, keunoë datang maniaga  
 Han soë gaséh deungon sajang, lôn meung poelang tan blandja  
 Malingkan ngon teungkoe gaséh, balaih keudéh oe Blang Mahsja  
 Di sinoë hana ngon moeléh, ngon lôn sidéh datang hana  
 Areuta han kawôm bie' tan, njang na badan ngon njawong sadja  
 Toelông gaséh djeunoë toean, soë la'én hana oepaja  
 Soë la'én han é' pseudoeli, keureuna Kali Poteu Radja  
 Malingkan ngon gaséh Soëdi, hamba ini dagang teuka  
 Aboe Nawaih deungo meunan, teusingomkan reumèh moeka

Sara neukheun meunjo meunan, na kaman beurani gata  
 Tadjuet peugah di hadapan, ba' Soelōtan doem peukara  
 Aneu' Meusé seumah jōh njan, meung ka toean joe peuhaba  
 Éntja' Alah lōn beurani, boeetan Kali lōn tjalitra  
 Keudéh oeba' hadapan Doeli, meung ka Soëdi soerōh kata  
 Meung ka meunan bōh tadjā' woë, pat djeunoë piōh di gata  
 Aneu' Meusé seumah meunoë, ba' Adjō njoë doedō' hamba  
 Sinan makeuen pagi peutang, meuhoeutang ba' oereueng toeha  
 La'én han soë gaséh sajang, djeuet datang ba' toeanhamba  
 Aboe Nawaih kheun dja' tawoë, teuma doedoë lōn toeeng gata  
 Djan lōn panggé beu trōih keunoë, ba' boeetan njoë lōn bitjara  
 Adjō beudoih geumeuhon lé, aneu' Meusé woë seureuta  
 Aboe Nawaih teuma piké, dalam até leumah kira  
 Hana leumbat padoem akhé, geupanggé moerit doem njang na  
 Deungon si'at meuhimpōn lé, beusa keutjé toeha moeda  
 Aboe Nawaih peugah meunoë, dja' malam njoë bandoem gata  
 Roemoh Kali binèh soengoë, 'oh sampoë tabitjah landja  
 Tamè tjangkōj sadjan ngon lham, euntreu' malam dja' sineuna  
 Bè' tapatéh barangsoë tham, bahlé kiam bitjah landja  
 Adat proë haj njang djipaké, talawan lé bè' gli geunta  
 Oelōn soerōh njan tapeugah lé, doem meunan hé tapeuhaba  
 Moerit deungo meunan teuntèe, soerōh goerèe hana da'wa  
 Peuhase droë doempeue njang mée, ban kheun goerèe bè' me-  
 toeka  
 Mè ngon tjangkōj teuma ngon lham, awaj malam geudja' landja  
 'Oh trōih keudéh hana diam, poeboet matjam goerèe adja  
 Roemoh Kali ka djitoeweueh, djilimeuih soenggōh han tara  
 Meuthèe lé teuma oe ateueh, meunan ka deuih geu'eu roepa  
 Geutanjong lé pakon meunoë, tapeugah soë soerōh gata  
 Tameung reuloih roemoh kamoë, toh sabab proë ngon keureuna  
 Ka djipeugah lé teuma pantaih, Aboe Nawaih joe keureudja  
 Bahlé reuboih roemoh boebagaih, soenggōh leupaih kamoë teuka  
 Teuma geutham lé di sidéh, han djipatéh doemdji rata  
 Geujoe minah han djimoeléh, djikoeeh njang djéh hana reuda  
 Doem peurab geukheunda' paké, djilawan lé ban geu'adja  
 Teuma kirōt disinan lé, hana sabé kiam gabra  
 Ba' Soelōtan teuma meugah, meunan oelah djipeuhaba  
 Aboe Nawaih joe peurintah, Dèelat Sjah neujoee toeeng sigra

Aboe Nawaih ka trôih keunan, adab Soelōtan Dèelat Radja  
 Teuma sabda Njangdipeutoean, pakon meunan boeetan gata  
 Tajoe reuloih roemoh Kali, boeet han meukri toh keureuna  
 Datang seumah ampōn Doeli, lōn mimpi sinan peudeuna  
 Peunoh meuih di sinan asoë, sabab lōn njoë joe keureudja  
 Sabda Radja tanjong meunoë, haj mée loempoë tapeutjaja  
 Datang seumah ampōn Doeli, wadjéb mimpi iman kita  
 Sabda Radja meunan pakri, kitab siri meunan njang na  
 Datang seumah ampōn Doeli, niba' Kali kitab njan na  
 Doem ka meunan neumoepenti, hoekōm neubri meunan ka na  
 Sabda Radja njang ka lahé, tapeugah lé soë meunan ka  
 Datang seumah njang ka hasé, aneu' Meusé geurampaih ka  
 Keureuna loempoë beu'éseutiri, aneu' Kali djeunamée na  
 Limong reutōih njang ka djibri, meunan mimpi ba' rahsia  
 Kali deungo meunan patōt, neudja' reubōt djih njan teuma  
 Piha' Kali njan geutakōt, neupoeboeet njang hana djeumba  
 Poteu deungo meunan seumah, peurintah Kali meunan ka  
 Djatōh sabda ba' Dèelat Sjah, meunan oelah boeet di gata  
 Teuma Kali ka geu'iem droë, oebah djeunoë ka ngon moeka  
 Phōn teuthèe kah salah djeunoë, bit Kali njoë ma'siet raja  
 Panè hoekōm njan ban dapat, djibōh adat njang kon djeumba  
 Niba' Poteu sabda datang, neupoelang areuta doemna  
 Malèe Kali njang gob pandang, boeet han reumbang ateueh

bandja

Doem areuta njang geurampaih, ka neupeudjeulaih oeléh  
 radja

Keureuna boeet Aboe Nawaih, boekon tjeudaih geubitjara  
 Meung soë la'én hankeu leupaih, hana kilaih 'akaj hana  
 Malèe Kali boeetan tiwaih, dilèe pantaih that geureuga  
 Njoë ka djeuheut ba' Toeankoe, ngon gob eu ka hitam moeka  
 Njan sabab peutoerōt nabsoe, toeeng teungkoe 'ibarat rata  
 Teuma djeunoë aneu' Meusé, mangat até hana tara

Ka poelang areuta tan lé, hana sabé soekatjita  
 Keu Aboe Nawaih geubri jōh njan, areuta njan doem sikada  
 Aboe Nawaih tanjong peue njan, di oelōn han oepah gata  
 Hana hadjat keu pa'idah, peunajah hana lōn kira  
 Lōn poeboeet keureuna Alah, na bè' soesah ma'noesia

Aneu' Meusé kheun seudeukah, kon oepah keu toeanhamba  
 Aboe Nawaih kheun peue ilah, ka leumah Toehan eu roepa  
 Njang seudeukah bè' deungön sjoë, nakeu oeroë singoh loesa  
 Dja' hana peue ladjoe tadjä' woë, oe nanggroë ka lama teuka  
 Lheueh njan ba' Adjō djiwoë reudjang, bajeue oetang oebé-bé  
 na

Aneu' Meusé djimeuhon droë, boengka djeunoë teuma gisa.

---

## XI. KISAH PEULANDŌ' NGON NABI SOELOËMAN

Doea plōh peuet bhaih lōn peuhaba, deungo rata adoë meutoeah  
Ba' Peulandō' lom meugisa, lheuēh geureuda badeue' gadjah  
'Oh lheuēh maté djih bandoea, Waki landja djiploeeng pantaih  
Djiploeeng oe glé di Peutoea, lheuēh seureupa badeue' ngon  
gadjah

Padoem lawét djidja' lam glé, meureumpo' lé saboh djeumeulah  
Meuteumeung ngon Nabi Soeloëman, tjit di sinan teungoh teu-  
marah

Nabi teungoh neutarah kajèe, hana lagèe sangat pajah  
Apōh-apah hana lagèe, hantom dilèe neuteumarah  
Waki peurab lé djikatjèe, saleuem dilèe pantaih-pantaih  
Asalamoe 'aloëkōm hé ja Soëdi, gata Waki ba' Poteu Alah  
Wa 'aloëkōm salam hé Po Waki, neutanjong lé Nabi pa'oh  
na langkah

Peulandō' seu'ōt lōn peureugi, meusapé ba' djalan Alah  
Lōn dja' mita meung raseuki, Poteu Alah bri peue na moedah  
Roekōn boh troeeng tjampli-tjampli, lōn peurab lé lōn meu-  
langkah

Njokeu meunān seu'ōt Nabi, tanjong Waki ba' Nabiōlah  
Keupeue kajèe doem neutamon, sang-sang bangon peugèt meu-  
nasah

Boekon keu njan hé Po Waki, akan meuligi lōn joe seuleu'ah  
Keumeuligoë Poetroë Siti, roepa na ri boeleuen peuet blaih  
Poetroë Boeloekéh nan geurasi, that djōhari tjangkla' leupaih  
Soë njang kalon teukab bibi, han tatoekri mita ilah  
Meutjeula' mata mirah ngon bibi, beureuhi soë njang ngiëng  
dasah

Ngon roepa djroh soeara sang bansi, oereueng lari le njang  
reubah

Hana ngon sa pi meung sidroë, djeueb-djeueb nanggroë njang  
ka geupeugah

Njankeu oelōn peugèt meuligoë, ra'jat sinaroë habéh lōn krah

Dalam oeteuen dja' koh kajèe, moeplōh ribèe ra'jat barōlah  
 Djijoe doe' lōn keumiet kajèe, moeplōh ribèe ra'jat barōlah  
 Djijoe doe' lōn keumiet kajèe, meunan dilèe ka djipeugah  
 Oelōn ta' lé batjoet-batjoet, ban njang na djeuet oelōn tarah  
 Geutanjoë han tom mat beuliōng, hana oentōng bagi Alah  
 Teubiet reu'ōh meugeugoelōng, na sang djitrōn ie raja djōhdjah  
 Tjoeba tangieng oeléh gata, pat njang tjidra beu tapeugah  
 Ba' njang khoet tjot tabōh tanda, ngon boet gata tameuseudeu-  
 kah

Keureuna lōn tan biasa, pajah' raja reu'ōh-reu'ah  
 Meunan neukheun oeléh Nabi, seu'ōt Waki han peue salah  
 Ma djidja' lé ba' oedjōng kajèe, dji'eu lagèe Nabi tarah  
 Nabi ta' lé batjoet-batjoet, sinan ka djeuet ja Rasoelōlah  
 Keunoë neuta' ba' njang manjang, ba' teupat njan lhō' sileu-  
 paih  
 Pat njang manjang djipeugah lhō', pat njang boengkō' djijoe  
 tarah  
 Ba' njang teupat djikheun kiwieng, djipoera ngieng ngon mata  
 siblah

Nabi meuta' landja-landja, di Peutoea doe' poemeugah  
 Ma neupatéh ban djikheun njan, djipeugah manjangpi neutarah  
 Nabi sangka djih njan teupat, tan peurasat meuboebé drah  
 Nabi kheun ba' Waki Boejōng, lah na oentōng gata meulangkah  
 Ada' meung han tjit lōn sidroë, hana ba' soë lōn joe teugah  
 Tamah han djeuët teumat beuliōng, ka meunan oentōng neubri  
 lé Alah

Neuta' landja tan neupiōh, teubiet reu'ōh saré bōhbah  
 Peulandō' djikheun ta' ba' soenggōh, bè' neupiōh ja Nabiōlah  
 Na meung reudjang lheueh meuligoë, teupat Tjoet Poetroë  
 njang that indah  
 Oelōnteu kalon teupat ngon boengkō', pat njang ka lhō' djeuet  
 lōn teugah

Ada' singèt lōn peuseunang, pat njang manjang lōn joe tarah  
 Bè' neutakōt ladjoe neuta', tjit lōn ha'-ha' pat njang salah  
 Nabi seu'ōt njokeu meunan, pat njang manjang tajoe tarah  
 Ba' njang khoet lhō' tabōh tanda, meuhat tjidra rōh lōn tarah  
 Gaséh sajangteu keu kamoë, di sinoë goena tabalaih  
 Meunan neukheun oeléh Nabi, seu'ōt Waki éntja' Alah



Lah ba' piha' lön binatang, ada' meung han djeuet lön tarah  
 Tjit patöt mée lön dja' toelöng, ho neusoerön lön meulangkah  
 Ba' piha' lön teu binatang, doë lön paban gaki peuet blah  
 Lön meung poeboeet meunoë-meunoë, koeasa droë tan boebé  
 draih

Pakri lön mat ngon beuliöng, ka meunan oentöng neubri lé Alah  
 Meung njang mée djeuet lön neusoeröh, toë ngon djeu'öh goeda  
 pantaih

Seu'öt Nabi sabét meunan, ban takheun njan hana oebah  
 Tjit ka koethëe kah peuet gaki, han katoekri boeet teumarah  
 Ba' katém ngieng meung siblah mata, pat njang tjidra ba'  
 tateugah

Ja Habibi meung njo keu njan, tjit na laman peugah-peugah  
 Sara neumarit teungoh neuta', Peulandö' ha-ha' Nabiölah  
 Ba' teupat njan ja Habibi, lhö' sikali bè' lé neutarah  
 Ba' teupat lhö' djikheun manjang, ma di sinan djijoe tarah  
 Nabi patéh ban djih peugah, han boebé drahipi neubantaih  
 Sangat pajah teubiet ngon reu'öh, ma neupiöh Nabiölah  
 Hingga neudong ba' oedjöng kajëe, neuteuradjëe pat njang salah  
 Ban neukalon oelé Nabi, ba' joe Waki ka meusalah  
 Ba' teupat lhö' djikheun manjang, Nabi jöh njan beungèhneu  
 leupaih


Neumeung seuko' Peulandö' Kantjé, ma djiploeeng lé pantaih-  
 pantaih

Até sakét kajëe roesa', neutjo' sikra' lha teumarah  
 Peulandö' paléh kapeungeut kèe, kaprèh dilëe koedjéb darah  
 Ma neusrom lé oeléh Nabi, keunong Waki ngon lha teumarah  
 Peulandö' keunong niba' keu'ieug, ka teugageueug ladjoe reubah  
 Nabi tadjö neukeumeung drob, ma djiloempat djiploeeng pantaih  
 Nabi neuriwang teupat dilëe, oeba' kajëe njang neutarah  
 Neungieng kajeë habéh roesa', leupaih neuta' ba' djipeugah  
 Teutab neu'iem ma di Nabi, dalam até sangat teulaih  
 Di Peulandö' aneu' badjeueng, dalam oeteuen djiploeeng leupaih.



# DAPEUTA ASOË KITAB NJOË

	Ön
Moekadimah .....	3
I. Haba aneu' miet bie' oereueng le 'akaj .....	5
II. Haba wa'siet radja oebe' aneu'neu peuet droë bangta ...	8
III. Haba Pa' Pandé .....	15
IV. Haba Sinja' Agam Tjoet .....	30
V. Kisah Radja Tampō' di Piadah .....	53
VI. Haba asaj djeuet tjitjém té'té' wang .....	63
VII. Kisah koeja ngon boeja peulandō' hoekōm .....	66
VIII. Kisah peulandō' dja' moepoekat .....	75
IX. Kisah Aboe Nawaih .....	91
X. Kisah Kali Radja Harōnon Rasjit .....	94
XI. Kisah peulandō' ngon Nabi Soeloëman .....	99





## RALAT

- òn 6 bandja 12 ba, njang bit-bit: ba'  
 „ 17 „ 28 dilikôt „poeroemohdji” tatamah: njan  
 „ 26 „ 22 keu moedahan, njang bit-bit: keumoedahan  
 „ 40 „ 38 dilikôt „oelôn” tatamah: mèpi ka bandoem keu  
                   gata! Djeunoë tabri idin keu oelôn woë  
 „ 44 „ 7 dilikôt „djeuet” tatamah: keu  
 „ 59 „ 31 dhikheun, njang bit-bit: djikheun  
 „ 85 „ 15 Toepheun, „ : Toepheuen  
 „ 96 „ 32 reuboih, „ : reuloih  
 „ 96 „ 36 kirôt, „ : kirōh
-







